

中華民國郵局特准掛號認爲新聞紙類

Ta Tung 大

同

中華民國六年五月十五日發行

編輯主任 英國莫安仁

編輯所 上海北四

川路一百四十

三號

全年十二册定價貳圓
半年六册定價壹圓壹角
壹册定價貳角郵費在內

第 一 卷 第 五 號

本報發行十有餘載向蒙 各界歡迎同人曷勝榮幸來年報務仍
由英國莫安仁先生主任編輯內容益求刷新以副 閱者雅望社
論擇中外重要問題按照世界觀念詳爲論列以助進國人斷事之
力其有歐美各國名報論說足資中國人士之觀感者本報亦擇尤
選譯以餉閱者他如政治法律工藝宗教各門最近科學發明大要
青年運動之法開採礦山之學在於中國今日需要正切本報亦廣
搜新說按期刊登俾 各界諸君皆得明其大意文苑詩話選論照
舊附刊以助餘興 各界諸君凡訂閱本報一份直與全閱中外名
報少所差異售價從廉以期普及全年十二册定價大洋二元半年
六册定價一元一角郵費均在內倘蒙訂閱請先 惠示空函恕不
奉答專此佈告諸惟

公鑒

編輯所上海北四川路一百四十三號
發行所上海河南路四百四十五號

Ta Tung Pao

Vol. XXIII. No. 5.

May 15th, 1917.

Third Series

Principal Contents

Illustrations:—

Counting German Prisoners.
Munitions on the way to the front. In the Australian lines.
A cycle corps taking cover. Firing a big gun.
The ruins of a house. Firing a mountain gun in the Balkans.
A bridge built by the R. E. in Egypt.

Leading Articles:—

The present World position
Britain and the Dominions.

Editorial

"

World Topics:—

The Constitutional position of the German Emperor (*concluded*)
President Wilson's Message to the Nation.
Frenchmen in bondage (*concluded*)
The Japanese Potato King.
Destruction of a race.
The Humanising of Industry.
The School as an agency of Peace. Translated by:

Nineteenth Century

Percy Alden, M.P.
Isaac Mason

Critiques:—

Corruption in official life.
Reform in English Education.
Japanese Politics.

Editorial

"

"

Summary of News:

The Art of Government:—

ELEMENTS OF POLITICS. Chap. XI. The Maintenance of Government.
Morality of the State and other Institutions.
LAW. Exemptions from responsibilities.
HEALTH OF THE STATE. Tuberculosis & Lupus
(Prepared by Isaac Mason)

Prof. H. Sidgwick
C. D. Burns
C. S. Kenny, LL.D.

Sir G. Newman

Religion:—

Village and Tribal (Prepared by L. Hodous)

Prof. Herman

Industries:—

Irrigation in Mesopotamia

G. D. Knox

Science:—

The stuff that atoms are made of.

C. R. Gibson

Miscellaneous:—

Advance of America in the Science of Agriculture. (*To be continued*)
The War on Alcohol

Chow Ping Wen

Athletics:—Camping (*To be continued*)

Literature:—Poems and Essays.

On writing poetry.

Selected Essays:—The reorganization of Finances.

Wang Kuan-i

PUBLISHED BY

THE CHRISTIAN LITERATURE SOCIETY,

143 North Szechuen Road, Shanghai.

Address all communications to the editor, EVAN MORGAN.

Price \$2 per annum; 20 cents per copy. Payment to be prepaid by cheque or postal order,
not in postage stamps.

南京圖書館藏

大同月報民國六年第五册目錄

第三卷第五號第十四期
年第五百七十四期

圖畫

英軍點查德國俘虜之圖○連往戰域軍械之圖○澳洲軍人陣線中之景象○自行車隊取得蔽障之圖○大礮發放中之景象○戰地房屋被毀之圖○巴爾幹戰域中發過山礮之圖○英軍在埃及修造之臨時橋梁圖

社論

論世界之現象
英與各屬地聯絡之問題

莫安仁 哈筱泉
莫安仁 哈筱泉

譯論

論德意志皇帝憲法上之地位 (續)
美總統威爾遜之演說詞
法國人之囚奴苦痛
僑美日人中之洋芋大王
殄滅異族之不道
實業上之人道主義
學校中和平之作用

王調生 公潔 智生 公潔 莫安仁 一葦 莫安仁 梅益盛

評論

論政界賄案之多
英國教育行政上之進步
論日本近政

王調生 莫安仁 莫安仁

中國大事記

外國大事記

法政

政治學要義 (續)
國際道德論 (續)
英國刑律綱要 (續)
衛生行政論 (續)

王官鼎譯 義吾譯 王官鼎 梅益盛 哈志道

宗教

宗教與社會之體制 (續)

何樂益 黃治基

實業

工程學要義 (續)
近世科學思想概說 (續)

王漱石 王漱石

雜纂

說美國農業推廣部
英美之禁酒

鄒秉文 愚公

運動法

文苑

養一齋詩話

潘德輿

選論

整理財政條陳

王官彥

英軍點查德國俘虜之圖



Counting German Prisoners.

運往戰域軍械之圖




Munitions on the way to the Front.

象 景 之 中 線 陣 人 軍 洲 澳




In the Australian lines.

圖 之 障 蔽 得 取 隊 車 行 自



A Cycle Corps taking cover.

大 砲 發 放 中 之 景 象



Firing a big Gun.

戰 地 房 屋 被 毀 之 圖




The Ruins of a house.

圖之礮山過發中域戰幹爾巴



Firing a mountain gun in the Balkans.

圖梁橋時臨之造修及埃在軍英



In Egypt; a bridge built by R. E.

社論

論世界之現象

莫安仁 哈筱泉

本月英國對於敵國。又開大攻擊。人咸稱爲安拉斯之大攻擊。查去年夏季。在桑莫河亦曾設有大攻擊。共三月之久。旋因天氣阻礙。以致停止攻擊。但日日繼續而作攻擊敵軍之勢。本月開此大攻擊。英國所組織者。出征之軍五隊。每隊五十萬人。五隊共二百五十萬人。戰線達於法界者五十英里。而於本國所防禦之軍隊。亦有五軍隊。係作爲保護本國疆域而設。故英國現共有應戰之軍人。五百萬名。此五大隊。在於法國界內。施行戰術者。已奏凱歌。因將德國總司令恩登白所抉擇之地勢。已經破壞。俘虜德軍一萬五千名。並獲大礮三百尊。軍器無算。此次德國被俘及受傷之軍。共四萬人。退出之地。被英佔領者亦不少。德國善戰之名譽。至此已掃地殆盡。當開戰之初。未嘗不欲率其精銳之師。殄滅比利時。蹂躪法蘭西。豈知英振臂一呼。而德軍披靡。其影響於德國之軍權主義。不能完全無缺者。蓋以此戰爲最也。此次大攻擊。適與世界前途之和平有關。在德人當日以爲。其兵力莫與敵者。故人之唾罵。不顧人之條約。亦不顧自謂力足以制勝。乃至今無成效主義。亦復失敗。恐以後他國欲效德人之尤者。亦當有所鑒戒。殆自謂縱甚完備。然以德之完備較之。必不能及。德且失敗。嗟。無及。因藐視他國條約及法律者。必有罰以隨其後也。後人果有不逞之心。迴思今日德之結果。不得不有所顧慮。且促弭兵會之成立。昔日海牙會有和平談判之議。德皇拒之。蓋德皇重勢力。不重和平耳。今其主義已明明不能達到。大約後日。

海牙會欲達和平之目的正自不難此爲關係於世界者也

本月法國亦對於敵國着手大攻擊雖事僅數日然亦成績大著破壞德國之礮壘甚多俘虜其受傷之軍人二萬名合計德國之失戰鬪力者共十一萬且獲其軍器佔其地勢尤爲不少德軍在老恩之戰略悉被法軍破壞且法軍更於老恩地方占有勢力觀此可知數日之戰誠與世界有密切之關係也顧不偉歟

現在英法聯軍將有壓倒德國軍力之勢全世界人衆皆引領而望因英法之勝德非僅關於英法實關於全世界之人衆苟德能取勝即留尙力之風於世界苟聯約國能取勝即留尙理重法之風於世界尙力不過以力存於數人之手尙理重法則理與法洵爲普通人民所共需力存數人之手衆人咸聽其命令若實行理與法不必唯人命是聽但憑法理是從也伊古以來尙力者不肯輕易舍去而人民將羣起而反抗之此等情形其表著於外者即爲法國革命之時代以及中國近數年來之改革與俄國今日之現狀德民伏於皇權之下久已欲得而甘心普魯士之民更有甚焉前數年間普皇曾許其民以普選舉權而卒未之予現在其國之人民要求於皇皇曰戰事方殷不暇及此若過此以往自當以此權畀予德名報記者哈爾登曰普皇之言烏足恃特恐勝則吝之敗則不待予而吾民將破壞以爭之矣總之以兵力勝世界阻止人民之進步此爲人類之大憲故反抗此主義爲人人應盡之義務而其所以主張者即助人進化以達完全之地位而已夫理與法二者衆人當明晰辨之不可含混因此爲人類之大要二

三年間歐洲危險之象。環生此危險之象。爲世界之人所最有關係者。此險象。維何。卽德之兵力。幾乎破壞英法之兵力。所幸英法軍隊誓死固守。以抵制之。此乃有天幸。以致文明不墜。故一二年間。深冀英法兵力戰勝。全德兵力。然當搖動未定之時。人爭以合衆國一言爲斷。因其國之朝野。素注重於法理。不措意於兵戎。况又爲民主國政體。夙持孟祿主義者乎。故德之破壞。比利時中立。合衆國當仗義執言。以爲人望。且其總統威爾遜。又以道德著於時。乃延之又久。威總統以忍耐出之。其國人不知英法流血以爭者。卽其素所主張之意旨。以致德猖獗愈甚。竟以潛艇政策爲禍全球。至此而合衆國始出而折德。以爲古今萬國所不能容。此其裨益於歐戰者何限。蓋加入雖晚。而其人明敏。其財充裕。其物品繁殷。卽此一舉。已足保全歐洲舊日之文明。於不墜。且立時獲效。卽防制德國之潛艇政策。是該政策破壞商船無限。而德尙無厭勢。欲將海面之船。盡行殄滅。俾英國絕糧。而後已。故合衆國正備載貨小船一百艘。皆用木質。載重一百墩。故同式製造。期於速成。因木質尺寸同。鐵釘尺寸同。易於製造耳。惟鐵甲艦無工人製造。亦不必造。蓋以英艦抵德艦而有餘也。茲所竊望於他國家。從而起之。能如合衆國之明敏。造船斯爲幸矣。

今日世界文明之現象。甚佳。惟對於德奧頗抱不寧之感。因德奧先以戰勝英法。俄自許茲則已成虛願。故心亦怏怏。然猶怙惡不悛。觸怒合衆國及中國。幾如中瘋之犬。致令世界戴仁抱義之國家。羣起反對。不惟德奧之險。卽在巴格達耶路撒冷之地位。亦險。英法俄步步爲營。以緊接之。堪司炭聽堡亦現不支。

之象。今則世界各國不願與德奧通好。故其景象頗爲不佳。然幸經此挫折。俾世界民智發達。較前爲甚。此爲人類之大幸福。以後世界之人類永享和平康樂之休風。卽生存爭競之說亦可稍替。或謂戰鬪可以期發達。爭競可以期進步。余謂不然。總之此次歐戰。舉從前不能定之巴爾幹問題。土耳其問題。堪司炭聽堡問題。可以次第解決。俄國亦變爲共和國。制後日必資助於歐洲。因前爲專制他國不與之同心。現在必能攜手相助。故歐洲今日之痛苦。將來自撥雲霧而見青天之日矣。

英與各屬地聯絡之問題

莫安仁 哈彼泉

歐戰風雲一起。不但蹂躪民生。卽各種器物。用具。屋舍。田園。破壞亦不可勝計。將來人材缺少。金鐵銳減。食品困乏。皆意中事。因此戰局。浪費浪擲者。無算。後日必舉一切制度。改絃而更張之。與前之歐洲大相逕庭。爲昔人所不辨識。譬如今日法地作戰。其境內地。面因炸彈而破壞者。目擊之。而心悲焉。前之鄉里。今無蹤迹。前之樹木屋廬。今成瓦礫灰燼。前地。平而今增高。前地。高而今平坦。前之地。殼而今沈之。於地。層下矣。前之地。層而今升之。於地。殼上矣。至於前爲平坦。今爲阱陷者。不計其數。故人咸云。前日之肥地。今轉爲磽土。而不能耕種矣。觀此可知一切制度。將大改革。不得率由舊章。但改革未必盡善。亦或有利。爲人人所切盼者。因由苦可得甘耳。惟利發生於何方面。不可逆觀。姑從利之方面。進一說。卽英國之一利者。爲政治問題是也。

英國近百年來。漸產生一大問題。卽本國與各屬國。以及各殖民地等。彼此親愛。方爲美舉。查前百數十

年間。此問題即已發生。因英政府措置未善。以致失敗。即美國當日以英不善治理。致使美國脫離而獨立。故英恍然大悟。對待各屬國以及各殖民地等。即有改良之政策。總而言之。即使各地有自治之權。是如戰勝脫蘭斯法耳。後亦令自治。其效驗已彰明大著矣。雖然英之辦法固尙未達於完全之點。使其自治亦當聯絡。或謂徒云聯絡不足。以得其心。當使彼此成爲一大團體。方足痛癢相關。故多年有此問題。究未知以何法固結其心思。又或謂建一衆議院。然亦非易事。因各處選派代表來英。而所商議者。究以何題爲要。如云在倫敦而議他屬國之政治。則是侵犯各屬國自治之權。研究數年。迄無成議。前者英政府特開大會。召致各屬國所派之代表。卒以不得要領而散。茲經大行改革之秋。當有以促成此問題。也是爲幸。

譯論

論德意志皇帝憲法上之地位 (續)

王調生

德奧二國之盟約。主旨在於防禦。觀於德公報宣布盟約之公文。既可明瞭。而其盟約本文之中。又復有『擁護歐洲和平』。『本盟約純然爲防禦之盟約』。『本同盟爲平和共同防禦同盟』。諸語。則此盟約之純爲防禦盟約。殊難強辯。奧國爲侵略之戰爭時。德國殊不負必出相助之義務。德皇之侵略俄法。不能藉口於此盟約。以自卸罪。其事自明瞭也。

當一八八八年六月十五日。佛特力克帝逝世。維廉第二嗣位。數日之後。六月二十五日。二十七日。皇帝向帝國議會普國議會宣諭。其論文中。固顯然宣言。彼將謹守憲法行事。非帝國或其同盟國實際受有

攻擊之時不宣告開戰也其在帝國議會之宣諭略如後述。

德國皇帝之重要職務對外在保持帝國反抗侵略對內在執行帝國法律帝國之最高法律是惟帝國憲法遵守憲法實為皇帝之職權就外交政策而論余意在竭力維持和平余雖好武整治軍備然實無輕於開戰之心須知德之治兵正所以維持和平非至德國或其同盟之國受有攻擊戰事必不可免之時定不開戰而貪功也云云。

維廉第二又以普魯士王名義宣告普魯士議會兩院之開會其諭詞略如下述。

朕既嗣位特召集國會并依普國之憲法作莊嚴之誓詞如下 朕宣誓朕當視憲法為固定不可違背朕之治國當全依憲法法律上帝其助朕焉。

德國為此二諭詞時固明許繼位之後守護憲法不求伸張帝權非至帝國或同盟之國實際受有攻擊戰事必不可免之時不向他國宣戰而德意志與奧斯馬加匈牙利所締結之盟約德帝亦明言其為防禦盟約并謂斯為歐洲各國均衡之基礎言猶在耳何可強辯哉。

依照憲法凡皇帝之命令皆應由帝國宰相副署宰相即副署表明負責但此項副署負責之規定亦不過僅為具文蓋皇帝所任命之宰相苟為庸懦之人則皇帝欲其副署何項命令彼亦即副署何項之命令也維廉第二繼位之後即抱自為宰相之主義首免俾士麥之職另簡庸懦之人繼任俾其奉令維謹不敢為拒絕副署之事繼俾士麥後任帝國宰相者共有四人其性質大抵如是而伯賽門荷韋格氏則可謂為庸懦之尤者也。

俾相對於宰相用卑順之官吏本不謂然在一八九二年七月俾氏嘗有一演說大致謂幼帝行事全取

獨斷宰相若全服從則宰相將成爲皇帝之祕書此項專制政治危險殊甚甚願有一與皇帝相對稱之機關以相調劑云云俾氏蓋全不以幼皇之專斷爲然者也

俾相退職之後八年之間竭力贊助國人著書演說擁護憲法保持各邦之獨立性質設立限制以防皇帝專橫防止侵略之戰爭且主張奧國與俄國因巴爾幹問題而決裂時德國可不相助蓋德國本無助奧爲攻擊之義務而巴爾幹問題與德國亦無大關係也

德之攻俄攻法德帝非特違背帝國憲法抑且不遵創國者之箴言且不得藉口於德奧盟約以爲辯護俾相之遺言有曰聯邦議會者代表德意志聯邦之統治權者也依照憲法非至德國受有攻擊之時皇帝之宣戰本以得聯邦議會之同意爲必要是以德帝對於法俄爲合乎憲法之攻擊祇可行於俄法攻德之時他皆弗能也

德宰相伯賽門荷韋格一九一四年八月四日在帝國議會之演說詞如左

皇帝曾諭令法國境界無論如何不得侵犯法國之動員令與德國同時發布對德宣言法軍當退處界內十基洛邁當而不謂實際乃全相反飛機則擲放炸彈矣法步兵之偵探馬探則侵入亞爾薩司洛連矣照此情形法國雖未宣戰固已破壞和平攻擊德國矣余接參謀部長之報告如下法軍在八月二日以偵探越界前來其事顯然爲其軍官所命令此外又有飛機在德境擲放炸彈直至南德意志法國軍隊在於蘇歇洛區者亦攻擊德國之軍隊以保守其境界德軍則謹守命令只爲防禦焉

觀乎前述之報告諸君當知德國已居於緊急之地位緊急之時無所謂法律我軍已占領盧森堡或者已進入比利時之領土矣依照德參謀部長之報告法國乃首先開戰以飛機攻擊德國者自德宰相在德國議會作此惡意之演

說以後德國之官吏私人復述此言不可勝數。德國白皮書則又有後列各言。

數小時後約午後五時之間。法國陸軍海軍之全體皆奉有動員令。次日之清晨。法國遂即開戰。

德人發行『德國眞言』『大戰事實』書冊之中其宣言如下。

在德國軍隊發出德國境線之前。多數法國飛機已飛入德國。經過比利時盧森堡之領土。并無一言通知比國政府。同時德國政府又探知法國軍隊將進入比國。德國政府不得已乃向比政府要求。請其准許德國軍隊前進時得經過其領土。

依照德國大學教授佐士夫科勒一九一五年所著書冊中之宣言。則法之攻德也。固非航空而來。直係越境之攻擊矣。其言如下。

諸君當知吾德請求法國守其中立。法國之回答吾德之請求也。乃在派遣軍隊越境來犯。此固背乎海牙會議所成立之萬國公法矣。

德國向法國之宣戰書如下。

法總統鑒。德國之政界軍界當局。現查有若干之嚴重敵意行爲。乃由法國軍界飛行家。行於德國領土。有若干飛機。則飛行經過比利時領土。公然侵犯比國之中立。有一飛機。則計圖破壞韋斯爾附近之建築物。又有他之飛機。在愛斐爾地方發見。有一飛機則在卡司怒及紐威堡附近鐵道擲於炸彈。

余今所以通知閣下者。法國對於德意志國家。既然有攻擊之行爲。德國當然認法國爲戰局中之一國矣。

依德國駐比公使塞爾司克之言。則法之攻德也。非以飛機往攻。亦非越境往攻。特自一飛船上相攻擊耳。此德使一九一四年八月三日午前一時三十分對於訪事之宣言。登載比國公報者也。

迄於近今。法國在空中或邊境。首先向德開戰之言。已不甚聞。著德國政治家。在德參謀部及德國南部。

各。城。者。雖。確。切。調。查。對。於。德。宰。相。在。於。議。會。覆。述。參。謀。部。之。報。告。所。謂。法。國。飛。機。在。德。國。鐵。道。線。擲。放。炸。彈。直。至。於。德。之。南。部。者。迄。未。能。得。有。實。據。指。出。實。在。地。點。待。至。戰。事。責。任。在。於。何。國。受。有。法。律。上。之。審。查。之。時。則。此。造。謠。之。人。捏。法。先。攻。德。之。誣。言。以。爲。德。國。侵。略。法。國。之。遁。辭。者。自。無。難。於。水。落。石。出。也。其。他。各。問。題。如。參。謀。部。之。謊。言。是。否。係。政。府。命。令。其。僞。造。抑。係。參。謀。部。自。己。之。所。造。作。德。帝。是。否。願。得。此。項。謊。言。抑。係。樂。於。開。戰。之。武。人。造。此。謊。言。藉。以。脅。迫。德。帝。亦。將。隨。之。而。解。釋。就。著。者。之。意。言。之。德。國。宰。相。及。國。務。員。甲。戈。氏。當。戰。機。危。迫。之。時。自。謂。於。奧。國。致。塞。哀。的。美。敦。書。之。內。容。不。甚。明。瞭。此。言。當。係。出。於。至。誠。吾。人。可。假。定。外。交。上。之。危。機。全。係。德。國。武。人。領。袖。所。造。成。法。先。攻。德。之。謊。言。或。亦。爲。彼。等。之。造。作。用。以。脅。迫。德。帝。及。宰。相。者。也。德。國。務。員。甲。戈。氏。及。次。長。錫。馬。門。氏。當。與。法。國。駐。德。大。使。比。國。駐。德。公。使。談。判。之。時。自。謂。其。無。權。且。謂。外。交。上。之。操。縱。權。在。武。人。領。袖。之。手。可。以。爲。余。言。之。證。明。也。

德。國。武。人。領。袖。藉。謊。言。之。作。用。以。德。帝。爲。傀。儡。使。之。違。憲。宣。戰。既。如。前。論。雖。然。戰。端。之。開。縱。由。武。人。爲。之。逼。迫。法。國。首。先。攻。德。之。謊。言。縱。由。武。人。爲。之。造。作。德。帝。對。於。戰。事。之。責。任。仍。不。得。由。此。而。脫。卸。蓋。武。人。皆。德。帝。所。用。之。人。用。人。者。對。於。所。用。者。之。行。爲。當。然。負。有。責。任。也。

德。意。志。之。憲。法。一。方。爲。授。予。德。意。志。民。族。以。權。利。之。憲。章。一。方。又。爲。普。魯。士。與。德。國。他。邦。所。結。之。契。約。德。民。之。選。舉。議。員。權。利。固。由。斯。而。保。證。德。國。各。邦。間。之。關。係。以。及。普。國。領。袖。聯。邦。之。權。限。亦。由。此。以。規。定。德。國。憲。法。就。皇。帝。總。統。之。職。權。限。制。甚。嚴。普。王。承。受。帝。位。允。諾。遵。守。憲。法。彼。對。於。帝。國。之。根。本。大。法。固。當。然。

負。遵。守。之。義。務。德。意。志。之。憲。法。不。特。關。係。普。魯。士。外。各。邦。之。權。利。抑。且。關。係。於。德。意。志。民。族。全。體。之。權。利。德。意。志。之。各。小。邦。依。照。憲。法。對。於。好。動。之。普。王。固。有。制。動。機。之。作。用。至。聯。邦。首。領。皇。帝。之。遵。守。憲。法。則。不。特。關。係。南。德。意。志。人。而。已。即。普。魯。士。國。民。亦。與。密。切。相。關。也。各。邦。之。首。領。不。僅。爲。一。貴。族。而。止。且。爲。帝。國。中。之。一。分。子。皇。帝。所。籌。畫。之。侵。略。戰。爭。各。邦。首。領。對。之。固。有。操。縱。之。權。利。各。邦。首。領。所。以。限。制。皇。帝。之。職。權。者。非。僅。由。於。其。個。人。之。關。係。一。邦。之。關。係。乃。本。於。德。意。志。民。族。全。體。之。關。係。者。是。以。皇。帝。宣。戰。權。之。制。限。德。國。前。帝。俾。相。及。他。之。舊。臣。前。皆。認。爲。有。理。蓋。以。其。關。係。德。國。全。體。之。利。害。也。正。當。言。之。德。國。之。憲。法。一。方。面。爲。普。王。與。各。邦。元。首。及。自。由。城。所。結。之。契。約。一。方。面。又。爲。皇。帝。與。德。意。志。人。民。所。結。之。契。約。維。廉。第。二。破。壞。彼。與。各。邦。元。首。間。及。國。民。間。所。結。之。正。式。契。約。違。背。其。繼。位。時。之。官。言。勿。論。其。出。於。本。意。或。因。愚。懦。受。欺。勿。論。其。自。願。爲。此。侵。略。之。戰。事。或。任。武。人。之。播。弄。致。此。有。違。憲。之。宣。戰。其。責。任。要。無。可。卸。除。使。歐。戰。之。結。果。德。人。戰。敗。德。國。各。邦。對。於。德。帝。之。問。罪。斯。固。意。中。之。事。彼。德。帝。其。何。以。答。復。哉。 (全)

美總統威爾遜之演說詞

王公潔

美國威爾遜總統。近有對於國民之演說。勸諭國中男婦長幼同心戮力。維持美國國民主義。保全世界民主政治之勝利。以爲美國因時局之迫切。加入戰事。目的非僅在於自助。且當以廣大美滿之方法。援助協約各國。其言深爲美民之所歡迎。茲略譯之如後。

美國因保全民主政治人類權利之故。今已入於慘酷戰局之中。國內由茲而發生之問題。吾人亟當審

察。爲。之。解。決。海。軍。則。欲。其。強。固。足。以。致。勝。陸。軍。則。急。需。集。成。大。軍。然。此。二。者。在。吾。人。所。應。爲。之。偉。大。事。業。中。殊。爲。簡。單。之。部。分。吾。人。今。日。之。所。以。加。入。戰。局。余。認。爲。全。無。私。心。在。於。其。中。故。美。人。之。作。戰。可。謂。其。爲。爲。人。類。幸。福。權。利。而。戰。可。謂。其。爲。爲。世。界。安。全。鞏。固。而。戰。欲。貫。澈。此。項。主。張。當。犧。牲。利。益。之。觀。念。而。以。充。分。之。精。力。才。智。從。事。於。公。戰。吾。人。於。茲。事。關。係。之。大。與。夫。所。需。才。智。精。力。之。巨。固。當。共。爲。深。切。之。研。究。也。今。日。美。國。之。所。應。爲。且。須。善。爲。之。者。固。不。僅。戰。爭。而。已。馳。驅。疆。場。以。博。勝。利。自。屬。要。事。特。較。此。爲。尤。要。者。亦。復。不。一。而。足。食。品。爲。人。生。所。必。要。國。中。海。陸。軍。之。糧。餉。必。須。充。備。而。主。義。同。一。作。戰。甚。苦。之。協。約。各。國。美。國。亦。當。然。以。糧。食。接。濟。俾。其。無。虞。缺。乏。船。舶。爲。運。輸。所。必。要。勿。論。海。洋。潛。艇。若。何。橫。行。美。國。固。當。然。自。船。塢。中。出。船。百。艘。運。輸。必。要。之。貨。物。來。往。於。大。西。洋。之。兩。岸。日。常。用。品。工。廠。原。料。皆。爲。立。國。之。所。不。可。或。缺。美。國。當。然。自。國。中。農。田。礦。山。工。廠。各。地。集。取。充。分。之。生。產。物。供。結。美。國。海。陸。軍。人。家。屬。接。濟。協。約。各。國。作。戰。勇。士。并。維。持。大。西。洋。對。岸。之。各。工。廠。使。其。不。致。以。缺。乏。質。料。爲。苦。火。油。爲。航。海。駛。船。工。廠。鼓。動。機。器。之。所。必。需。美。國。當。然。以。美。產。火。油。供。給。協。約。各。國。船。舶。工。廠。使。得。自。由。運。用。不。憂。缺。乏。鋼。鐵。一。物。乃。製。造。軍。械。敷。設。鐵。道。製。造。用。品。所。必。要。之。物。美。國。當。然。以。製。造。軍。械。原。料。之。鋼。鐵。敷。設。鐵。路。之。鋼。軌。供。給。協。約。各。國。之。利。用。車。輛。馬。匹。既。可。利。便。運。輸。又。可。節。省。人。力。協。約。各。國。之。所。有。因。歷。年。戰。事。而。損。破。者。既。非。少。數。美。國。當。然。爲。之。供。給。總。而。言。之。凡。英。法。俄。意。諸。協。約。國。之。所。求。因。缺。乏。人。工。材。料。機。械。急。切。不。能。製。造。者。美。國。皆。當。然。爲。之。籌。備。爲。之。供。給。也。

際今日之時勢。美國工業。農業。造船業。礦業之生產力。海陸軍之軍備力。當力求其振奮。必使之遠勝於前。而後已。而其消費之也。又必須力求節省。使之適合於國家事業上之特別需求。美國明哲之士。類能知之。今余之所欲申明者。即國中之男女國民。凡於有益於此之事業。殫精竭慮。以爲之。使之獲有進步。其功殊足。比擬於馳突戰場之戰士是也。經營實業於國中者。勿論男女。皆能爲之。吾人對於此等之人。亦可謂其爲盡職於國務之軍士。盡力於援救世界自由主義之軍隊。是故國中。能執干戈之人。殊不能全從事於軍役。耕種製造。開鑛數者。乃立國之根本事業。非維持盡善。則戰事。何以致勝。各個人。盡其天職。雖未從戰。其功亦自與從戰於鎗林礮雨中者。相等。此吾美國人士及協約各邦人士。所應共知者也。

糧食一物。乃日常之所切要。交戰各國。今日需求更切。苟無充分之糧食。則作戰疆場之軍士。治工於國內之平民。何以保其健康。何自保其勝利。今日吾美國之自己。以及協約各國。固甚盼美國農業生產之發達。即在戰局既定之後。各國瘡痍未復。農產自難增多。其須美國之輔助。亦爲意中之事。吾美男婦老幼。苟能明於大義。洵當盡此責任。勿憚勞苦。治事田間。以求增益收穫。而南部各州之農家。在種棉而外。尤宜多植五穀。勿徒貪植棉之厚利。而兼顧世界之民食。吾美人愛國之心。既強。責任之心。亦重。其能共體此意。固意中事也。

至於商業界之行事。攸關於今日之時局者。亦重。且大國民所以希望於商人者。與夫協約各國所以仰

望美國商人者不過在以公正無私之主義行其轉運售賣之事而已商人當此萬目共集之時允宜犧牲貪得厚利之心設法營求各種商品運輸之便利且於糧食一項特別置意俾各協約所期望美國爲之供給者皆得充分取得而在於中國國民所以信任商人者亦日趨於深厚此余對於國內經營商業者所願爲忠告者也

鐵道爲轉輸之要具當極力求其捷速船舶之被毀於潛艇者既多當竭力構造以應需要而資補足礦質爲工業製造上所需之原料當盡力開採增其產出之量以資應用工品上製造之物品乃百事之所倚賴當改良其品質進多其出產此余對於鐵路家船廠主人礦工製造工人所願爲忠告者也

總而言之吾國今日立於重要之地位負有艱鉅之責任其所受之試驗程度至高惟有望於國中人士努力同心合作以爲之耳

法國人之囚奴苦痛

泰晤士報通信

(續)

智生

德軍之役使法民也嚴酷不道直與驅使奴隸無異當禾稼成熟收穫穀品之時役使尤嚴雖星期日及節日皆當一律作工不可免除無人敢於前赴禮拜堂或他之公共場所也某次有二女子禮拜日早晨前往教堂行禮拜式下午即被德官判處拘禁某次有一年十四歲之童子荒廢工事一日德官查知處以拘禁四日之刑某次有一婦人對於比利時俘虜贈予蘋果一枚德官即判以拘禁十日示懲某次有一婦人步出定限地界外二十碼德官判令拘禁四十二日并罰作苦工某次有一婦人年已七十九歲

因其女住居定限地界外之附近。抱有疾病。遂爾冒險越界前往看視。德官知之。不加憐憫。亦判處十四日之禁錮。此類之事。極其繁多。不可悉數。茲特舉其一二。以示例世人見之。當知法國爲德軍攻占之地。住民受德軍之虐待。苦痛極矣。

據愛恩地方之調查報告。則其悲苦之事蹟尤足令人憐憫。該地各小學校。六月以前。即已停辦。兒童之年齡。達八歲者。德人即強令工作。使其剝取菽豆。至於成年之人。則更以作事爲本分。德人爲之督責。嚴厲異常。必竭盡精力。爲之作事。而後可。雖星期日及節日。不能停息也。住民准其自種田畝。但當受德人之監督。田中禾稼。一經刈穫。即由德人強迫收去。或且將其穀物。售與原主焉。鄉村人家。蓄有母牛者。皆負有義務。以牛乳供給德軍。惟家中有嬰孩者。乃得以牛乳浮沫。留供嬰兒之食。耳。養雞之家。必以雞卵供給德人。德人定有常額。有時雞之所生者。或低於原額。則必訪求另購。以爲補足。庶乎其能免責焉。德國軍人需用臥褥。於是民間之臥褥。乃一掃而空。雖供幼孩寢臥用之小褥。亦皆爲德人收去。其佳者。或滿貯羽毛劣者。或塞以木質。刨花。德人精粗。并收不之擇也。且德人當強取民物之時。既用脅迫之手續。又作侮辱之言。詞財物。爲其取去。并不發給收據。直與攘竊民物。少所差異。德之國內。製造軍器需用銅質。德人乃在斯地。徵取銅物。家當銅物。勿論已。即門窗上之銅器。農業上之銅器。鄉村教堂之銅鐘。銅燭臺。亦搜羅而罄。盡其苛暴。可知已。

據立里地方之調查報告。該地食品稀少。價值昂貴。幼孩之病亡者甚多。壯年之人。罹於結核病者。亦復

甚衆。人民有爲德人所強迫流徙者。其橫受逼迫極可憐憫。去歲四月間。有若干人在夜半被德兵持械由臥榻中叱起。使之流徙出境。十一月間。又有居民一百九十八人。由德人擄去。作質。其中婦女多受侮辱。德人之暴橫。可謂極已。

右所論列者。凡有血氣者。當爲之共憤。已茲更述三事。如後閱者。當益爲之太息也。

在一千九百十五年之五月間。有二幼年女子。在大街市。中游戲。突然有德國警察前來。斯二女子於是奔去。而德兵竟從後開鎗斃其一。他一女子目睹之。莫如之何也。

某次有一婦人。向營糖果業。遇有德國醉酒之警士。遂爲其所擊。此婦人乃避入自己之店中。以求自庇。醉警仍復隨之入內。爭持之間。警士之手稍被傷害。而其婦遂被判處二月半禁錮之刑。

某次有一青年男子。年約十八歲。奉德官之命。從事於鋸樹之工作。當鋸取樹木之時。傷及其臂。因而腫痛。其人自知傷重。乃向監督之德人乞與療治。德人不特不允其請。反謂其人。意圖規避工作。判處拘禁。以相恐嚇。其人繼續工作。後創深不可救。治醫生遂將其右臂鋸去焉。

茲所論者。僅法人所受之苦痛耳。更論比利時人所受之苦難。亞米尼亞人所遭之殘殺。以及海洋商船。遭遇德國潛艇破沈之事。德意志皇帝罪惡之巨重。洵足駭人聽聞。吾不知其清夜捫心。果將何以自安也。

僑美日人中之洋芋大王

舊金山考察員通信

公 潔

在美國之加里福利亞省。治家之主婦。知西馬喬治之名及其洋芋者。不下數萬人。西馬喬治氏之洋芋。在加里福利亞省之馳名。實稱盛於一時。其所以致此之由。蓋加里福利亞省全體洋芋收穫之中。西馬喬治氏之洋芋。共占有四分之一之多也。（加里福利亞即舊金山）

就西馬喬治氏之爲人而論。亦僅爲常人。不甚聞著。其經營事業。所與往還者。不過代賣之掮客及日本之銀行家而已。西氏所營之農業。對於常人之生活。亦復少所影響。西氏定其洋芋之價值。自有定見。西氏所擬定之價值。常爲他人定價之標準。而他人所定之價值。又每不逮西氏定價之高。職是之故。西氏遂被稱爲壟斷家。操縱人。投機家。而其實則爲加里福利亞省之洋芋大王也。

西馬喬治氏之思想若何。言論若何。作事之定則若何。爲人所稱道記錄者。其數不多。當數年以前。彼攜家至於布爾愷萊之繁盛區域。即偕其妻住於此處。其妻亦日本人也。在其初居此地之時。頗召起輿論上之紛譁。但不久亦自止息。自此以往。西氏遂安然處於衆人之中。而供給加里福利亞全省洋芋總量。達於四分之一者。衆人竟不識其人。西氏爲人。性質甚爲堅毅。彼今日所占之地位。雖甚優異。而中心則未嘗自滿。尙懷有若干之欲望。有待於來日之償足。彼頗願入加里福利亞大學肄習歷史之學。但以彼農業芋田之多。事務太繁。雖欲讀史。尙苦無暇也。

西馬喬治氏之爲人。與加里福利亞省人民心理中之日本人。并不相似。彼較一般日本人爲高。其體度衣服車乘。皆與中美富厚之咖啡業主相彷彿。其立身也。剛正嫺雅謹慎。兼而有之。操英語甚純熟。亦較

普通日人爲佳。自稱其年齡爲四十二歲。體質甚爲強健。凡年達四旬外之人所難能之事。彼皆優爲之。彼常曲其身體。向下俯垂。令雙手著於地。而膝節未嘗曲也。彼居於加里福利亞省。歷有數年。其與人談及其所經營之事業。則自記者通信之前星期始焉。

西氏自言曰。余之至加里福利亞也。已二十有七年。同來斯土者。有同國之人七。皆懷有高大之欲望。有一人在此地大學畢業。轉而之東。學更精進。今爲英國大學教授。而余則漸以洋芋爲營業。余之何以爲此。并余亦不自知。但當初營斯業之時。卽懷盡力而爲之志。立意必使余之種芋。爲最佳之芋。蓋余之芋果爲最佳之芋。則凡他人所難於脫售之時。余仍可脫售而無所礙。而所得之代價。亦必較他人之得者爲較高也。余營種芋之業。操術如是。推而論及製造家。著作家。律師。醫生。其營業之所以能成功者。操術當亦不外乎是也。今年余之營業收入良佳。但在若干年前。亦有折耗者。總而觀之。余之營業。殊可以謂爲發達也。西氏於其洋芋營業所致成之財產。未嘗明言。大致在八千三百萬元之間。其上季之營業收入。約有一百萬元焉。

西氏於選擇洋芋種子。以及彼之種芋。何以於加里福利亞得有高價。未嘗明言。彼之言曰。凡有可營之事業。皆有人就而爲之。此勿論在於戰時。平時。勿論在於商業。農業。莫不皆然也。加里福利亞之洋芋銷場良好。而余乃就業於此。凡售物之市價。皆自有其限制。如雨澤稀少。次季洋芋收穫。未必甚豐。則市價高。雨澤得時。次季收穫。期其必盈。則市價廉。余殊未敢壟斷居奇。蓋余若壟斷以謀利。則他地之洋芋亦

或以價高之故而致運入於此地也。

洋芋之腐朽甚爲捷速。故收藏洋芋者不能如收藏菽豆及罐頭果品者之經久。若貯積多數而不售賣。則必召致損失。美國之業洋蔥者。去年因貯積日久而致損壞。據西氏之所知。其所損失者固甚巨多。業洋芋者當以此爲鑒也。

加里福利亞省。今日所最困難者。斯爲勞工問題。西氏謂彼當種芋之初。所用者爲中國工人。中國工人成績甚佳。但轉瞬舊工人年老。而中國之年幼者竟不肯業此。於是改用日本同國之人。日本人欲望甚奢。至美之後。卽思改途而就他事。乃復改用印度之人。成績亦不良。又試用墨西哥人。其結果亦正如此。現西氏固正選擇工人。以謀償滿其欲望也。西氏之所要求者。在用西氏之地。西氏之芋種。按西氏所指揮之法。以事種植。待至收穫之時。西氏乃與工人按份分有其芋。故工人之工作得力。收穫增多。西氏與工人雙方皆有利益也。

凡人從事於任何職業。皆當精研其事。以競至於其本業中之最高地位。西馬氏業種芋於異國。而其所成之聲勢財富。如許之鉅。洵足爲世界實業家之師模也。

殄滅異族之正道（土耳其人之殄滅阿米利亞人）

英國莫安仁述 一葦錄

土耳其之虐待阿米利亞人。Armenians 世人已耳而熟之。非一朝一夕之事矣。然至近頃。其酷虐愈甚。慘毒情形。直令人聞之髮指。揆其意。必盡滅阿米利亞種人而後已。近年改良之青年土耳其。視其前王。

愈無人道。置之歐洲文化之中。絕不相容。故歐洲人士之欲舉而投諸四裔以禦魘魅者。非無故也。他且勿言。卽就其虐待阿米利亞人而觀之。是豈得尙謂爲具有人心耶。往昔之酷虐。人猶曰以宗教之不同。（土耳其回教阿米利亞人耶穌教）故生厭惡之心。若以今日情勢而論。則直不容其生存於國內而已。則直以種族不同之故。務殲除之而已。

世人往昔但知土耳其虐待阿米利亞人耳。未能悉其細情也。今訪得其種種實狀。誠不能不訝其爲從古所無之慘酷矣。此等不道之事。雖係土人所自爲。然德亦不能辭其咎。何則。德苟發一言。土宜無不從。乃坐視而不之過問。嗚呼。德人之居心。尙可問乎。世人昔因該地教師與美領事館之傳述。或阿米利亞人受害者之自言。得知土人虐待之大概。今英國泰晤士報所載之詳細情形。則謂得諸回教徒所口述者。不愈信而有徵乎。茲特錄之左方。吾知閱者覽未終編。已推卷而起曰。不期天下乃有此至慘之事。抑其所言。僅以目擊者爲限。只其十分之一焉耳。所未詳者。猶至夥也。嗚呼。土耳其之罪惡。至於斯極。其爲天所不覆地所不載之人乎。

一回教徒曰。一九一五年八月之頃。予在穆斯村。見其村關以外。死屍無數。皆阿米利亞人也。有受槍擊者。有爲刀刺者。莫不傷痕徧體。身無完膚。婦女之屍。皆裸露身體。無絲縷之掩蓋。狼藉情形。尤難寓目。又於他處。見有婦孺五百。監守一空室中。予詢之守兵。乃曰。將遣之口外。再細詢之。則政府已派遣土匪若干。埋藏各要道。待其經過。或擄或殺。一任土匪之所爲。所有護送之兵士。已受命不得抗拒。袖手旁觀。待

其就盡而已。又於比別立城。見河渠之中。罔不滿浮阿米利亞人之屍。其時天氣炎熱。穢氣四達。又嘗經過薩爾忒城。去其城行約二小時。見左右兩溝。阿米利亞死者。堆如山積。以意測之。此兩溝中所容者。約爲萬五千人。後由薩爾忒城回至穆斯村。見有一物。狀如極大之馬棚。拘集阿米利亞人五百於其中。從馬棚之上面。拋擲引火之物。不一時烈焰飛騰。而此五百人遂全化爲灰燼。予所經行之路途。時見有阿米利亞人之死者。老弱男婦。無所不有。皆慘遭非命者也。又一日予由穆斯村至海膩士城。見四野之中。積屍無數。亦皆阿米利亞人也。由海膩士城至石耳氣士城。見有兩溝。亦滿貯阿米利亞人。一溝積男屍約四百具。他一溝則皆幼童也。至卡拿速班城。見其河中浮屍至夥。此皆予所目覩者。嗣至那亦忍安城。聞該地所殺之阿米利亞人。爲數亦不可計。四野之外。遺肢殘骸。彌望皆是。其有未及殘殺之遺氓。則悉驅入優斐滴江。以爲一網打盡之計。

又一回教徒曰。一九一五年四月。予在耳朱羅能城。一日予從君斯坦丁歸。路見政府之訓令。命將各地之阿米利亞人皆移至內地。不得處於邊境。予至耳朱羅能城。卽見阿米利亞人若干。被迫搬移。五月一日。予至尺比遜城。七月。又見一訓令。命將其地之阿米利亞人送至內地。予卽躬任護送之役者。故知此類訓令。所謂移送內地云者。特其託詞。實皆殲之於路矣。訓令又有副文曰。凡兵士之逃亡者。捕殺無宥。其實兵無逃者。所逃者皆阿米利亞避難之人。此副文之意。蓋謂凡阿米利亞人之逃者。捕殺無宥。其言兵者。僞也。嗣又有回教教主下一訓令曰。阿米利亞人。令我土耳其人流血無數。今殺之當。凡有阿米利

亞人速殺無恕。予聞遷往內地之阿米利亞人皆死於道路。其法先掘一渠。使所有之阿米利亞人立於其旁。然後聚而撲殺之。婦女孺弱。則多見殺於政府所養蓄之土匪。卽政府自辦孤兒院中之幼童。亦遭同等之慘死。美領事於某地創有孤兒院一所。其中嬰孩亦悉爲土政府所擄。載以小舟。盛以布囊。拋之於海。待其已死。乃取其尸積於岸上。七月一日。予奉令由尺比遜城。護送阿米利亞人遷往內地。計所部送者。爲男子百二十口。婦女四百口。幼孩七百口。行至官米士看賴城。又奉令將所有男口。另交一官。送至他處。聞行未久。卽全遭殺死。其婦孺仍令予送往而新闡城。路見死者無數。不問而知皆爲阿米利亞人也。遇土匪若干團。令予將所部送之婦孺交於伊手。予雖力抗未允。然逆計終非妥策。乃將所有之幼孩。凡遇回教教徒。皆勸其攜回撫養。計爲予前後所分遣之幼孩。數約二百。此二百幼孩皆安身有所。得慶更生矣。後又令予由而新闡城。部送殘餘之婦孺。往卡馬克城。既至該處。其地方官不願接受。予適亦抱病。乃奉令將所部送者。移交於摩哈穆特愛斐姆地。護往他處。聞該官長之意。阿米利亞人當使之常往來道路之間。不得定居某處。後聞摩哈穆特愛斐姆地言曰。由卡馬克城啓行後。爲時未久。卽遇土匪。令護送官吏將一切婦孺交伊領去。聞已悉數被害矣。予在尺比遜城之時。聞政府一下訓令。禁止回教教徒收容阿米利亞人。凡婦女之稍具姿色者。土耳其官吏莫不先施奸汗。繼加戕害。予在卡馬克城時。見一苦耳特部酋長監禁獄中。詢其所犯何罪。該酋長告予曰。予曾奉行政府命令。計殺阿米利亞人至七萬口。後以毆辱土耳其護送官吏之故。爲政府所囚禁。此酋長不久亦爲土耳其政府所殺。

二人所言如是。誠可謂天地間至殘忍之事矣。又有某君詢此二人曰。土耳其政府果具何心而出此耶。二人曰。此乃土耳其新政府之政策。世人疑爲由於宗教不同之故者。未悉其隱衷也。土耳其青年政府所定之政策。至可驚駭。蓋其意土耳其國境之內。但存留土耳其人。他種民族。概皆殺盡。不得留遺。今甫開始殘殺阿米利亞人耳。他種之人。尙未及料理之也。二人又曰。凡殘殺阿米利亞人時。未見有德人在場。然駐在土耳其之德國官吏。明知土耳其政府此等作爲。亦未聞有禁止之事。則其贊助可知已。

實業上之人道主義

莫安仁

人生今日。靡不以改造爲實業上之重要術語。但所謂改造。云者。出於常人之口中。常含有機械主義之意味。以機械之力爲重。以人力爲輕。按昔日之實業。原置重於人工。自近世機械發達。於是遂以機器代人力之用。而以人工伺應機器。昔日人工所作之事。今皆由機器作成之。凡大工廠。皆置有衆多之機器。而以多數之人。伺應機器之役。由此而生之利益。固自不少。然亦非全無弊害者也。本斯主義。工人遂不過爲發動力之機關。其生人之性質。幾因之而失去。揆諸事理。詎得謂平。此弊相沿。既久。後亦漸見改良。不僅以工人爲機關。并且待工人以人道。此種改良。就國家及實業各方面觀察。皆屬事理上之當。然夫資本家與勞動者之間。相待自當本於人道主義。國家之保護工人。前亦不過僅就消極方面行事。保護工人免於危害。苦難。其意專注於防患一方。今則不然。行事多注意於積極方面。務在發達工人之幸福。此種觀念。乃近時之所發生。主義在於保護工人人格。庶其勞工作用。可以完全。故其事之成立。基

礎并非在於愛人而在於實業組織之完全。夫資本家與勞工之關係原爲世界上一大問題。欲求社會經濟之發達完全。首當求資本家勞工之聯合一致。故吾人一方面求發生財富之機器。一方面仍當圖謀男女工人之興發。工人幸福實業亦利。昔日實業工廠範圍狹小。勞工與資本家多能通其款曲。今日工業範圍甚大。資本家與勞工情意殊難通洽。故昔日資本家得引勞工爲朋友而不視之爲僕人。今日則有所不能。此誠須別籌良法。互通情意。以貫徹人道主義之觀念也。

今日謀實業之改造。誠非可以僅注意於勞工懶惰工作不力。諸事或者主增加工資。或者主工人入股。管理營業亦皆非滿足之論。英國因受歐戰之逼迫。工事之振奮。遂有非五年前所可逆料之情勢。此項振奮自不可因戰爭終了而爲止息。蓋歐戰既畢之後。實業上之競爭較前當逾增強。欲求國中實業振新而不腐敗。保護工人方法之完全。是所必要。必工人之幸福發達。工人之身體康強。工人所爲之工作。然後可以期其完全而無缺憾也。是故欲謀工力之增進者。當注意於人之價值。資本家及勞工間之感。情常識亦須注重。姑設譬以明之。人之蓄有機器者。欲求其機器生產財物之巨多。首當注意塵土等物。不使沾染於機器之上。蓋以塵土沾染於機器。則機器之間發生阻力。生產財物即不能達於完全也。又如機器各部分所用之揩油。皆有特異之種類。苟施用或不適當。機器作用亦即不得而完全。人因之必須注意選擇。不可漫用。夫機器物也。人對於物猶須如此。注意豈對於生產財富之勞工而獨可以忽視乎。雇主之對於勞工亦允宜適當。注意庶實業可以發達完全。而且工人不但關係實業。抑且關係國家。

本於人道主義施行格致改良增進勞工幸福此固社會之大幸也。

右所論列者正與軍械工人衛生委員會所報告者相同斯委員會之構成有醫生有官吏有工人代表其職務在審察指正工業勞苦作工時間問題以及他項事實有害於軍械工廠工人之健康精力者紐滿君任此會主席君之功績本自不少曾任教育部醫官長任本會主席而後發布報告十五條其言皆甚重要政府製造局以及工業廠店皆爲所動軍械部大臣依其報告遂任用數百員司掌指正勸進工人幸福事務有五百人分巡各廠設法務令工人工作得有精力其功固自足多政府方面接受此報告後亦未嘗袖手旁觀力圖實行其說特設工人幸福局由羅恩特尼君總辦其事此舉尤爲善政戰事之後循斯主義力行不輟英之實業發達可操左券而資本家及勞工間之感情亦必日見融洽矣但有若干固執之資本家以爲工人作工時間愈長愈妙工人工作之事愈多愈妙他則非其所問對於此種事情或有反對之意此實可以謂爲謬誤夫工人之身體完全實業然後可以趨於完全若使工人視工廠爲監牢利用工人之勞力必使之一瀉罄盡而不容其剩餘此於其所經營之實業固有利而無害抑且可以貽害於國家也。

有蘇格蘭之工廠經理某彼所管理之工廠共有三所依從斯說在其廠中委任幸福職員據云自幸福職員設置工人之衛生幸福愈見增進工人作工精神亦愈見其貼切新法之效於斯可見原新法之所推行本於政府中軍械部之設立掌管增進工人衛生幸福之職員在於軍械部中誠爲必要不可

或。缺。英。國。軍。械。部。所。管。轄。之。製。造。廠。共。有。四。千。六。百。四。十。二。所。廠。中。所。雇。用。之。工。人。共。有。二。百。二。十。五。萬。餘。人。範。圍。既。廣。關。係。自。巨。當。軍。械。部。設。立。之。初。即。注。意。調。理。工。界。問。題。對。於。工。人。身。體。之。護。持。工。人。生。活。之。輔。助。用。心。良。多。由。其。提。倡。普。通。之。人。乃。知。資。本。家。雇。主。不。顧。念。工。人。之。身。體。工。人。之。健。康。對。於。工。人。衛。生。上。一。切。設。施。不。知。置。備。此。不。特。辜。負。勞。動。之。工。人。抑。且。令。實。業。不。能。達。於。完。全。地。位。以。人。類。較。機。器。人。爲。動。物。自。甚。複。雜。是。故。對。於。人。之。注。意。當。較。對。於。機。器。之。看。護。爲。尤。重。世。人。每。只。知。求。謀。機。器。之。完。全。而。於。工。人。之。弊。害。則。不。知。爲。之。祛。除。詎。可。謂。之。爲。允。當。耶。

(下期續登)

學校中和平之作用

譯美國和平報

梅益盛譯

夫。人。苟。非。常。受。軍。事。教。育。之。訓。練。則。戰。事。可。以。取。消。現。在。鼓。吹。和。平。主。義。所。收。效。果。之。不。圓。滿。者。正。因。吾。儕。勸。人。強。半。待。其。成。丁。之。年。腦。質。已。硬。其。腦。中。已。滿。貯。一。切。戰。爭。之。幻。象。然。後。始。教。之。以。和。平。雖。其。言。美。意。良。亦。難。感。動。其。先。入。爲。主。之。心。而。改。變。其。青。年。時。所。有。之。理。想。也。故。最。佳。之。機。會。莫。要。於。最。初。學。校。中。青。年。之。學。生。時。代。而。着。手。以。鼓。吹。和。平。主。義。焉。蓋。青。年。時。之。心。思。意。志。多。屬。溫。柔。活。潑。近。朱。近。墨。惟。師。是。率。或。圓。或。方。模。型。是。則。故。一。切。教。育。易。於。灌。輸。十。二。齡。以。前。之。兒。童。所。受。之。教。育。如。銘。印。在。心。永。世。勿。忘。故。現。在。世。界。各。文。明。國。多。行。強。迫。教。育。之。法。良。以。學。校。爲。最。佳。之。場。合。所。以。教。育。成。將。來。萬。國。之。男。女。好。國。民。也。然。則。今。日。各。學。校。對。於。彼。輩。學。生。之。教。育。爲。何。如。乎。對。於。戰。事。或。英。雄。或。他。國。之。情。形。之。教。訓。爲。何。如。乎。得。勿。教。訓。其。尊。重。他。國。及。維。持。各。國。之。睦。誼。乎。或。教。訓。其。自。覺。現。在。之。文。明。何。以。賴。世。界。各。國。之。

互。相。輔。助。乎。抑。或。教。訓。其。眼。光。囿。於。本。國。之。內。及。希。望。其。本。國。強。於。他。國。乎。或。教。訓。其。凡。事。皆。當。愛。本。國。而。不。辨。是。非。乎。德。國。學。校。之。歷。史。課。中。視。為。最。重。要。者。即。在。造。成。其。國。民。之。愛。國。心。彼。有。一。歷。史。教。授。書。云。『教。歷。史。之。宗。旨。乃。在。彼。輩。學。生。之。前。彰。明。吾。儕。皇。室。之。如。何。盛。興。吾。儕。國。民。之。如。何。勇。敢。故。能。在。彼。輩。學。生。之。心。中。播。其。愛。皇。帝。愛。國。民。愛。帝。國。之。種。籽。』彼。教。科。書。中。即。以。此。為。宗。旨。彼。又。云。『當。注。意。普。魯。士。歷。代。之。王。如。何。輔。翼。愛。護。國。民。至。於。隆。盛。更。當。注。意。德。國。國。民。不。可。少。之。本。分。即。不。疑。惑。而。服。從。其。國。上。之。皇。帝。之。命。令。也。』法。國。學。校。之。歷。史。課。本。其。宗。旨。仍。在。養。成。其。國。民。之。愛。國。心。彼。輩。在。一。千。八。百。九。十。一。年。有。對。教。師。之。訓。詞。曰。『歷。史。之。功。用。是。教。彼。輩。學。生。可。以。明。曉。其。為。法。國。國。民。之。本。分。以。及。對。於。人。類。之。本。分。也。』彼。法。國。所。視。為。法。民。之。本。分。者。即。當。設。法。奪。回。昔。日。失。於。德。人。之。土。地。也。在。英。俄。意。等。國。歷。史。課。之。宗。旨。其。精。神。亦。皆。相。同。若。在。吾。美。學。校。之。學。生。自。幼。孩。時。彼。輩。所。受。之。教。育。即。為。領。其。心。中。思。索。世。界。之。理。想。當。以。美。國。為。高。美。世。界。之。國。度。當。以。美。國。為。首。魁。故。學。生。之。心。中。皆。存。一。藐。視。他。國。尊。視。己。國。之。偏。見。觀。此。諸。國。之。學。生。幼。稚。時。所。受。之。教。育。是。皆。在。使。知。其。國。之。英。雄。也。然。則。吾。儕。與。彼。輩。立。一。何。種。最。高。之。模。範。乃。得。為。英。雄。乎。得。勿。以。能。鎮。服。天。然。之。亂。者。為。英。雄。乎。或。則。為。科。學。之。發。明。家。乎。或。則。為。制。勝。瘟。疫。疾。病。之。醫。學。家。乎。或。則。為。抗。拒。貪。婪。無。公。理。者。之。豪。傑。乎。凡。此。等。有。益。於。人。類。者。其。為。吾。儕。所。立。最。高。模。範。之。英。雄。歟。曰。皆。非。也。蓋。學。生。所。有。心。目。中。之。英。雄。乃。馳。騁。疆。場。出。入。於。槍。林。彈。雨。中。兇。殺。狠。鬪。之。軍。人。即。其。最。高。模。範。之。英。雄。也。乃。者。紐。約。城。派。有。一。委。辦。將。紐。約。城。所。有。學。校。改。易。其。舊。日。

依。次。編。號。之。學。校。名。稱。如第一學校第二而冠以美國古今偉人之名。其中選有四十人。皆爲戰績卓著之將軍。由是可見善戰之將軍。即可爲男女學生之好模範也。教育之理想家。卽爲鼓吹軍權之理想者。蓋彼輩常言。學生之心理。專喜聞國家之戰事。爲最有趣味。因兒童含有天然戰鬥之性。故授學生以軍械的玩具。則合其天然之性矣。然此等教育之理想家。彼殊未知兒童之心理。多以習見常聞之事。爲最有趣味者也。吾儕若常向其譚論戰事之離奇。英雄之豪邁。則彼自然以此等勇敢爲最有趣味之事也。吾儕若給與小刀小礮。及一切軍械的玩具。則彼輩將來卽喜用此種軍器。彼青年心中之思想。自然以忠愛其本國。莫如血戰疆場。爲國捐軀。之爲最榮譽也。國中旣彌滿此種思想。無怪乎萬國聯合世界進行之遲遲不前也。今有人主張宣戰之權。付之國民。特爲茲事投票表決。其意見然。現在之國民。在青年時多受軍事教育之浸漬。孳乳成以戰事爲有趣味。故若以宣戰之權。付之國民。則彼等亦必冒昧從事。而不細加思索。今欲以宣戰之權。付之國民。則不僅一方教學生以勇敢。更當一方教之以和平。使之兩兩比較。權衡折衷。乃爲妥善之政策。最可怕者。卽突然發生何種國際之紛爭。一時激動公憤。當國民怒氣填膺之時。各咸以扶助其國爲快。而不辨彼此之是非。惟以戾氣用事。今欲救正此偏弊之性。最善之法。莫如改良吾儕學校教授歷史之方法。吾儕當教學生重視他國。而不可任意藐視。應將英法德意俄等國所有之特長。如文學、美術、繪畫、音樂、理化、製造、工藝、商業、種種學術之擅長。見其價值。而得其輔助。或則教學生知此五十年中日。日本文明之如何大進步。或則教學生知中國最古之文明。雖缺乏歐美精良。

之機器少有鐵道之便利及物質上種種之進步然其國民仍得和平之幸福也尤當爲之述墨西哥何以有內亂之紛爭吾儕可以如何體恤彼等之艱難吾儕苟如是以教訓學生則人類兄弟之情自能漸漸發生而愈見深摯矣若教授吾儕本國之歷史不可教本國一切之戰事皆合於公理如本國以前有何過錯吾儕不可羞與學生解說而隱惡揚善亦不可將戰鬪之旗幟常懸於學生之目前使其歡迎此種事體轉當爲之解說吾美國中對於社會人類謀利益造幸福之著名人物學生固無不樂聞者他如探險家之冒險探查南北兩極及非洲赤道尤爲彼輩所樂聞者或再與之解說利用江河急流之水力可以發動機器或如修築堤防以免洪水之患或如沙漠乾燥之地設法築放堰水以滋灌溉或如中國大禹之平治洪水或如驅滅瘟疫瘴毒之治療生命凡茲種種皆爲造福人類之事較之凶殺很鬪滅絕人類之戰事其趣味尤爲濃郁也 有等人之思想以歷史不可無戰鬪歷史者不啻爲戰鬪而作也彼輩之意若不言戰鬪則無歷史可教也此語得勿過乎夫歷史中自有若干戰事然而教歷史者之講述戰事儘可從和平方面以立言固不可贊成戰鬪且從而鼓吹之也尤當與學生解釋戰鬪發生之原因或戰事之軍費及損害之結果吾儕若欲求將來之和平決不可少和平之教訓而此和平之教訓正今世界着手之機會也當在各學校中辨明文明之進化最需要者乃和平而非戰鬪更當教學生爲國而生爲擔當責任之大丈夫較之血戰疆場爲國而死者尤有效益吾儕當教學生自覺有價值之人是爲扶助他人者或則增進社會之快樂或則減少他人之痛苦或則開通人類之思想使之越加明曉

天然之美。福及人類之美。德此皆最有價值之好功夫。尤當教學生自覺。若非爲不得已重要之故。如保全國家之獨立自由。此外之戰事。無非有損害於人者。故將來學生成人之後。在彼思想中。不致重視誇耀執強權而求解決公理之事。必更求最上之良策。遇有國際紛爭之時。若有人妄挑釁端。則此曾受和平教訓之人。彼卽可以維持和平主義。而指導最好之良法。不須從往日專恃血氣之勇敢。且可率領其國家。進入於榮耀和平之道途也。

評論

論政界賄案之多

王調生

近數月間。政界發生之大賄案。有三。收買存土案其一也。練銅公司案其二也。津浦購車案其三也。在短時間內。發生賄案如許之多。而其案內牽涉之人。又均屬於國家之高級長官吏治之窳敗。一至於斯。可慨已。此三案中。惟練銅公司一案。近已依法發交法廷審訊。他則猶在彌縫查辦之中。政府之意見。其謂懲一足以警百。不欲概行窮治。歟。抑果如外間之傳言。懲辦所以待異己。而彌縫則所以庇同黨歟。記者不敏。未敢遽斷。所可怪者。近日北京報紙。載檢廳搜查陳錦濤之私宅。又發見煙酒公賣局長。因豫算案行賄之函件。使其言果非虛誣。是知治政界之賄案。猶之吳剛伐桂。伐而愈生。將欲窮治。則政海中之大獄。將蔓延而不可收拾。亦無怪乎政府之不欲盡行根究也。吁。可慨已。儉可以養廉。恥侈足以敗家。國一總長之俸金。月不過千元。而衣食住費用以外。又益以撲克嬉遊之資。

所入者既不敷於所出。遂不得不取盈於賄賂矣。記者詢諸英友。英國各部大臣之年俸。亦僅三千鎊。比諸中國總長之俸。多不過一倍餘。而英國衣食住費用之昂貴。則較中國多至六倍。然作官者皆足以自贍。以身試法。要求賄賂之人。頗爲罕見。則以居官者能自節約而未嘗競爲豪侈故也。由此觀之。欲整飭今日之官紀。其當以培養官吏之儉德爲要事與。

英國教育行政上之進步

莫安仁

英國首相喬治氏。在組織內閣之始。選任閣員。未嘗全依舊制。按照英國內閣組織成規。閣員必須爲議院中之議員。惟其如是。歷任首相之組織內閣。遂皆在議員之中。拔取閣員。喬治氏組織內閣之時。則未嘗以此自囿。其選任閣員也。不必以議員爲限。目光廣被於全國人士。惟求就某部之職事。擇適當之才爲之擔任。待其自願應選。然後設法擇地舉爲議員。故喬治內閣中之人物。多以稱職聞於國中。教育總長費是爾氏。原任夏佛爾大學副監督。關於教育上之學識頗深。但非爲議院中之議員。喬治首相以費氏才勝教育總長之任。遂以此法引入閣員之中。費氏就職之後。就英國教育法制中之應爲增補刪改者。皆應時勢之需要。事理之當然。爲之增補刪改。近提出教育經費案於議院。本年教育費用。較之前數年間。大爲增多。前者年約二十餘兆金鎊。今則增多三四兆金鎊。然議院之中。對於此案。幾於全體贊成。則費氏規畫之得當。可以知已。據其提案時之演說。經費之增多。大半由於增加教員薪俸之故。而強迫教育之年齡。前之定爲七歲至十三歲者。今則增加一歲。改爲七歲至十四歲。又鄉鎮學堂之中。除普

通科目而外。今又增授農業一門。學堂中獎勵學生之法。今已寬爲籌定。貧寒學生升學大學。亦經定有補助方法。學校中煩雜之考試。刪減若干。體質上之訓練。益臻完備。凡此數者。皆增加教育經費之所由也。夫英國處戰爭旋渦之中。支出戰事費用之巨。洵從來所未有。乃一面維持戰事。日支巨金以給軍需。一面仍整頓學制。不惜發達教育之費用。內外兼籌。本末并重。竊以爲頗足爲中國取法之資。中國近數年間。朝野上下。注意於國體問題。對於立國大本之教育計畫。轉而置諸不議。不論之列。中外有識之士。皆以爲中國現時之教育狀況。比諸前清末年。猶見其減色。學校中之一二佼佼者。皆清末之所遺存。非民國教育官吏之所設立。偶念及前哲百年樹人之語。竊不覺爲中國前途怦然而心動也。夫英國值戰事急要之時。對於教育人才之計畫。仍兢兢致意如此。中華民國邦基初奠。其所以謀自強而固邦本者。全視乎國民之道德才智體格之發達。質言之。卽全係乎學校中德育智育體育之完美。惟教育能於美備。斯國基可以安固。竊願中國執政。知其所當加意者也。

論日本近政

莫安仁

吾人對於日本近日之政事。有不能明瞭其用意之所在者。卽報紙之自由。似受當局之侵害是也。日本某報紙。因登載國會選舉候補人對於社會主義之意見。官吏知之。遂拘捕其報紙之主筆。而加之以懲罰。此事頗足令吾人聞而驚愕。夫社會主義。久已爲世界政治家議論之資料。各國之實行其主義者。亦所常見。日本當局。竟因報紙登載選舉候補人議論社會主義之意見。而有封報館罰主筆之事。豈日本

當局有壓迫社會主義使不能倡行於日本之用意歟不但此也選舉候補人之宣布政見乃各國之常事日政府拘罰報紙之登載選舉候補人議論者豈其意欲緘選舉候補人之口而不許其發揮政見歟可謂奇已又日本某報議論司法省次長辦事之優劣政府亦以爲不當拘而罰之夫報紙爲輿論之代表報紙議論國事足以宣達民意有利而無弊日執政壓迫報紙所以限制人民之言論自由卽所以妨害人民之安寧竊願日執政有則改之

日本前因議會反對寺內內閣遂有解散衆議院重行選舉之事總選舉之結果反對政府之憲政會較前減八十名共得一百二十二名國民黨增八名共得三十六名政府方面之政友會增五十一名共得一百六十三名中立議員共六十名內有五十名傾向政府政府方面在議院得大多數寺內首相當然聯任日人聞之忻喜者頗多蓋以寺內之爲人治事中庸不以偏激爲尙也寺內氏對於中國亦不持極端激烈之意見日本近時武人頗主偏用兵力寺內雖爲軍人不主此意其措理政事尙知尊重義理然昔日日政府對於大戰之態度頗有遊移之現象殊難謂爲全然正直戰事爲世界之巨害竊願寺內首相用其毅力早日致戰事於完結也

大總統命令

四月二日令 晉授張懷芝以勳二位此令 又令 特授張樹元以勳四位此令 又令 王會同李國圻榮志均授爲海軍上校此令

四月三日令 安徽省長倪嗣冲呈請任命蔡煥鸞爲桐城縣知事應照准此令 又令 陸軍總長段祺瑞呈請任命馬漢卿爲甘邊寧海鎮守使署副官長應照准此令 又令 陸榮廷給予一等大綬寶光嘉禾章此令 又令 李靜誠蘇建斌均給予二等大綬嘉禾章此令 又令 崔肇琳羅誠均晉給三等嘉禾章 郭椿森曾彥潘明潤均給予三等嘉禾章此令 又令 胡銘槃唐紹慧李國治鮑志鴻均給予三等文虎章王世清陸福祥劉家正均給予四等文虎章謝卓英馬鎮陸慶榮均給予五等文虎章此令 又令 陳祖虞逢恩承胡衍鶚鄭榮均給予四等嘉禾章 陳作楨盧澍鄉陳錦章均給予五等嘉禾章此令 四月五日令 派載濤管理鑲黃旗值年事務此令 四月六日令 兼署內務總長范源濂呈准署吉林省長郭宗熙咨請任命張晉升試署吉林省會警察廳警正應照准此令 又令 司法總長張耀曾呈山東高等審判廳書記官長范景恭因

病呈請辭職范景恭准免本職此令 又令 司法總長張耀曾呈河南高等檢察廳書記官長丁元魯另有差委請予免職丁元魯著即免職此令

四月十日令 特派陸榮廷爲兩廣巡閱使此令 又令 特任陳炳焜署廣東督軍此令 又令 特任譚浩明署廣西督軍此令 又令 署四川永寧道道尹張習懇請辭職張習准免本職此令 又令 任命廖名縉署四川永寧道道尹此令 又令 朱照著交國務院存記併發往山東交該省長酌量任用此令 又令 前政事堂存記之張治禮著分發湖北交該省長酌量任用此令

四月十二日令 淮安關監督杜鍾駿著開缺來京另候任用此令 又令 調任胡思義爲淮安關監督此令 又令 任命胡彤恩爲兩浙鹽運使此令

四月十四日令 任命謝邦清爲上海製造局總辦宋振綱署德縣兵工廠總辦此令 又令 交通總長許世英呈技正曾子模另有任用請予免職曾子模准免本職此令 又令 交通總長許世英呈請任命章以懋爲技正應照准此令 又令 江蘇省長齊耀琳呈考核各廳縣政績分別舉劾等語省會警察廳廳長

王桂林精明幹練應變有方淞滬警察廳廳長徐國樑膽識過人勤勞備著江寧縣知事吳其昌學優才裕政通人和均著以簡任職交國務院存記署淮陰縣知事趙邦彥才長心細勤政愛民署睢陽縣知事彭世祺持躬質樸爲政愛勤試署沛縣知事于書雲誠樸無華講求治理試署邳縣知事李時亮持躬廉潔處事安詳均給予五等嘉禾章署太倉縣知事溫紹樑操履謹嚴經驗宏富著給予六等嘉禾章署松江縣知事李恩露識力冠時才堪應變調署靖江縣知事藍光策沉毅有爲長於緝捕署江都縣知事周光熊才具開展聽斷詳明署銅山縣知事唐宗源才識兼優因應咸宜均著傳令嘉獎前署儀徵縣知事白士藝擅釋盜犯咎有應得著交文官高等懲戒委員會依法懲戒以示懲儆此令 又令

據司法總長張耀曾呈四川撫邊屯殺人犯李青山判處死刑惟情節可原請予宣告減刑等語本大總統依照約法第四十條將李青山原判死刑減爲無期徒刑此令

四月十八日令 據財政總長陳錦濤面稱因煉銅廠事次長殷汝驪有代人請託情事並據商人柴瑞周等稟稱該總長令其借墊股款并勒寫字據各情當派夏壽康張志潭查辦茲據查覆案關款項嫌疑財政總長陳錦濤財政次長殷汝驪均著免去本職

交法庭依法辦理財政部參事虞熙正司長吳乃琛均著先行停職一併歸案辦理此令 又令 財政次長李思浩著代理部務此令 又令 參謀總長王士珍呈稱吉林陸軍第三混成旅參謀長高傳符另調他差應請免去本職高傳符准免本職此令 又令 參謀總長王士珍呈請任命郭慶爲吉林陸軍第三混成旅參謀長應照准此令

四月二十日令 特任維佩金爲超威將軍此令 又令 特任劉存厚爲崇威將軍此令 又令 特任戴戡暫行兼代四川督軍此令 又令 任命劉雲峯爲四川陸軍第二師師長此令 又令 吳迺翼調署鹽務署場產廳廳長此令 又令 朱文鈞調署鹽務署運銷廳廳長此令 又令 塔旺布里甲拉給予二等寶光嘉禾章此令 又令 周善培文羌楊永泰會彥王侃朱祖蔭黃羣陳敬第黃永培聶其杰給予二等嘉禾章張孝準趙伸蔣方震林攝趙世鈺龔政章勤士吳志伊王有蘭張于溥彭程萬章梓耿毅何嘉祿馮嘉錫給予三等嘉禾章此令

四月二十三日令 特派王人文爲四川查辦使張習爲四川查辦副使此令 又令 四川自軍興以來兵隊增多餉需支絀上年疊經電商暫署督軍羅佩金酌定裁遣各軍辦法去後本年三

月據川軍師長劉存厚周道剛鍾體道陳澤需熊克武等電稱羅署督編道軍隊支配餉械主客各軍顯分厚薄各情續據羅署督電稱劉存厚陳澤需收束軍隊有意遲延正擬派員查辦間即據羅署督電稱劉存厚圍攻督署劉存厚則謂羅署督開砲攻擊所部並據各方電告省城連日槍砲猛烈人民生命財產損傷甚鉅著派王人文張習馳往澈查川民疊經兵禍瘡痍未復又遭此次重變本大總統實痛於心該查辦使務須秉公據實查覆勿得稍存偏徇在未經查覆以前責成戴兼督嚴飭在省川滇各軍官長約束所部勿論如何不准再滋事端其省外各軍各有維持地方之責不准擅離防守倘敢違抗軍律具在政府無所偏倚即決無所姑息所有此次被難商民並著該省長迅即查明妥為撫卹勿任失所此令

四月二十二日令 任命李如璋署綏遠全區警務處長仍兼署綏遠警察廳廳長此令 又令 國會議決暫行各縣地方分庭組織法本大總統依約法第三十條公布之此令

四月二十四日令 前因川滇兩軍在成都省城衝突疊由院部電飭雙方停止爭鬪茲據戴兼督電稱劉存厚於中央停止爭鬪之命置若罔聞仍攻督署等語崇威將軍劉存厚著即免職聽候

大同月報 第三卷 第五號 大總統命令

查辦所有在省川滇各軍責成該兼督嚴飭各該管官長即日開拔出城分別駐紮恪遵前令不得再滋事端倘仍延抗軍法具在定惟該管官長等是問此令 又令 兼署山東省長張懷芝署福建省長胡瑞霖兼署湖北省長王占元暫署四川省長戴戡署廣西省長劉承恩兼代雲南省長唐繼堯兼署貴州省長劉顯世均著暫行委任監督各該省司法行政事務此令 又令 山西省長孫發緒陝西省長李根源浙江省長齊耀珊湖南省長譚延闓廣東省長朱慶瀾均著特別委任監督各該省司法行政事務此令 又令 綏遠都統蔣雁行察哈爾都統田中玉均著特別委任監督各該管轄區域司法行政事務此令

四月二十五日令 准國會咨稱衆議院議員選舉法關於第五章選舉訴訟律解釋經本會議決解釋爲關於參議院議員選舉法衆議院議員選舉法之選舉訴訟不得援用普通上訴程序提起上訴等因合行公布此令

四月二十六日令 任命楊壽枏爲財政部次長此令

國內要聞

軍事會議要聞

關係重要之軍事會議二十五日開幕大總統並撰就開會頌詞

國內要聞

表示尊重軍事之意各項議案開幕後按日討論由段總理作主席說明開會之原因及討論之範圍就中對外問題經政府派靳雲鵬等連日向在京各督軍一一分別接洽其真相大抵皆能了解以此推測與會者當可表示一致贊成之態度云

二十五日軍事會議段總理報告外交經過情形畢申言宣戰時機不可放失各督及代表等略有討論旋即投票表決以一省為一權極端贊成入戰者過三分之二餘亦表示服從下會將議進行方法

議員對於許世英之質問

許世英自長交通以來種種劣迹千夫所指昨衆議院議員司徒穎等提出質問書舉其弊端共有七事茲覓得原稿照錄於左
為質問事查津浦鐵路租車係由日本漢森公司承辦總共租蓬車二百輛每輛每日租金四元以十五年為限到期該蓬車仍歸漢森公司核計每車價值不過四五千元總共租金每車每年需一千四百四十元二百輛則每年需二十八萬八千元矣以十五年總計共需四百三十餘萬矣聞從前有某公承辦以五年為期分年付息五年後該車輛全為交通部所有且利息亦輕尙未允准今與漢森公司之合同兩相較比其損失實屬不貲傳聞合同

實已簽定該部謬然以此種權利見許是何用意此應質問者一
彰德至石家莊鐵路歸商承辦查該路原為京漢津浦兩路間之重要幹綫交通部歷年議案均主張由國家辦理今該部盡翻前案改由商人曹某承辦不知是何居心此應質問者二

京漢路前因焦莊撞車將該局長俞某交付懲戒撤差另委別人近日該路疊次失事其貽禍比前尤大不止一路他路亦同此情形未聞設法整頓此應質問者三

該部向有花紅夫馬費津貼等項此係歷年陋規為數鉅萬民國復興各司人員曾公議裁撤及王次長個人提倡反對首先支領以致該部員司紛紛援例請領比前尤多此應質問者四

該總長到部伊始曾具呈總統將裁節經費列表聲報查該部添設人員比前尤多即如該部僉事原設三十二員今加為四十員主事原設七十員今加為百一十員電政管理局原設十三處近則改為每省一處又設交通會議藉端添聘人員所謂節省者何在此應質問者五

用人行政雖該部自有權衡惟因舞弊查明有據撤差者照例不應復用如奉天電政監督呂某前在京奉路時因挪公款撤差未久該部因其運動即行復用且該員向無電政知識乃竟以

三省電政監督重用是何理由其餘該部用人類此者甚多未及枚舉此應質問者六

滬寧鐵路原設有總管理處盛宣懷長交通時定為外國人三人中國人二人會議時取決多數故事聽命外人喪失權利不少盛去職後經部力爭始改定為中國人三人會議時以中國人為主席暗中挽回利權甚多自許氏到部後聞竟將合同取消反以外國人為主席且冒昧允許並未經過何等交涉不知是何居心此應質問者七以上種種疑點本員依法提出質問請政府於五日詳細答覆以釋羣疑是為至盼

川亂聲中之文電

羅督軍切責院部電 十萬急電北京大總統國務總理各部總長參衆兩院陸幹卿先生梁任公先生南京副總統上海孫中山先生岑西林先生唐少川先生李協和先生各省督軍省長等均鑒頃閱院參陸部致成都師長劉存厚寒電開真元電悉羅督請假業已照准來京嗣又來電陳述川事經大總統電令緩行復迭據羅督一再電請更換川中師長其第二師並已派劉雲峯接替等語川中為該師長桑梓之地倘因此衝突將至不可收拾川事糾紛政府亦不深悉但既有准羅緩行之電該師長應顧全川局

將經手事務移交即日首途來京另為擢用是為至盼等因竊查佩金前於上年十二月江日川軍第二師師長劉存厚起義功高無可位置電懇中央另任以相當職務旋奉院部佳電劉存厚有功國家現已籌劉任用籌定即行電達本年三月漾日佩金電陳裁兵情形復請將劉存厚仍照前議調京任用其第二師師長一職擬請任命陸軍中將韓鳳樓充任嗣因佩金請假入京中央電准以韓鳳樓代理督軍職務復電請以劉雲峯接充第二師師長奉院部四月灰日電劉存厚功在國家應准調京另行優用其餘一切事宜希毅力實行以期實效等因佩金前後各電均係分呈府院有案可稽是佩金所請更換師長專係劉存厚一人乃院部寒電竟謂迭據羅督軍一再電請更換川中師長直是挑動川中各師長舉起反對且佩金各電皆云敬候命令乃院部寒電竟謂其第二師并已派劉雲峯接替不識院部是何用意佩金此次裁兵係奉中央明令辦理即迭請調劉入京任用亦因該師長慾望甚奢非早調離川一旦逞其野心必致地方受害故始迫切電陳如院府為維持地方計早將該員調離何至有此次該師圍攻督署擾害兩城之事如以佩金措置乖方即立予罷斥亦無不可乃既電令佩金一切事宜希毅力實行並許調劉入京任用又始終

未發明令而一面又以佩金更換川中師長其第二師並已派員接替等語在迫切裁兵之時作此挑撥陵弄之策激動各師致釀事變佩金忝任督軍劉存厚本歸節制敢竟以部下攻擊長官實屬擾亂乃院部猶屢令佩金切勿操之過促寧非有意縱亂軍紀何在國法安存佩金此次專守軍署並未出攻城中人民目所共見且英法日領於劉存厚攻擊之夜均在署中亦所親睹惟部院因個人之進退而不顧地方之治安國事前途真堪痛哭應請大總統將佩金立予罷斥嚴重處罰以謝天下並將滇軍妥爲布置以維秩序不勝迫切待命之至暫署四川督軍羅佩金叩印

川軍旅團長公電 北京大總統國務總理陸軍總長參謀總長各省督軍省長上海各報館鈞鑒旅長等籍隸軍人義在服從中央用人豈敢過問然慘痛之極能不呼天乃者羅督治川無狀已由川軍各師長迭電詳陳茲再將其罪狀謹爲我賢明大總統總理總長縷晰陳之戴戡長川羅忌分權種種反對顯抗國命其罪一因反對省長嗾開公民大會并敢宣言將用武力對付以地方長官之爭權敢公然煽動內亂其罪二蒞任以來吏治民隱毫不關心朋淫聚賭日事荒嬉如成都文廟後街及府街爲彼淫窟計有三四又復嗜好甚深廢弛烟禁以致滇省大宗鴉片充斥各地

干憲瀆紀莫此爲甚其罪三川西巫匪吉娃前據綿行殺人越貨日數十起羅爲包庇縱逃殃民因之萑苻至今未靖距省愈近出案愈多其罪四蒞任數月勸提稅款逾七百萬對於中央一錢不解本省軍餉數月未發近因請假准親復勸提濬川源銀行紙幣七十餘萬并迫財政廳索取生銀窮搜極掘用途無聞其罪五裁兵節餉舉國一致辦理持平誰敢不道竊查滇軍去年入川計只十七營戰事平後所存者十一二營羅督電告詐稱兩師隨卽由滇招來徒手七千餘人迨奉嚴飭改編一師一旅因於駐省衛戍軍隊外警衛設團衛廠設營安插滇軍約近兩團仍達兩師人數弁髦命令明減暗增其罪六收束川軍改編四五兩師各爲一旅其餘三師每連減爲九十人并廢技科全部俾川軍根本破壞滇軍壘增川軍銳減強滇弱川奸計顯然其罪七到川數月兵工廠出槍五千餘枝彈三百餘萬顆全給滇軍不准川請反客爲主公道何存其罪八劉師長起義川中功同蔡戴近因裁兵主張公道犯彼逆鱗遽加撤換且對所部竟行攻擊昨夜迄今槍礮未息省城精華不惜糜爛其罪九似此奸回險毒誤國禍川軍民共憤用敢協懇迅予解決以弭川禍情危勢迫急痛陳詞無任屏營待命之至川軍旅長劉湘王齊舒雲衢陳洪範劉成勳龍光陳經余懋

辛團長陳能芳王麗中王炳章聶文光鄧錫侯廖謙萬成黃澤溥
田順懋賴心輝袁法俊曹文龍許澍張鵬舞郝熹李進成余昂向
傳義呂超喻培棣王維剛獨立營營長口道心楊文信陳光仁陳
國玉等同叩

羅督軍電云十萬急大總統國務總理各部總長南京副總統各
省督軍省長公鑒正密四川陸軍第二師長劉存厚因違抗裁兵
擁兵自衛蓄意謀叛擅開釁端等情迭經電陳在案本擬即以武
力戡定惟念川省屢經兵禍誠不忍重苦人民故迭被該師環攻
猛擊佩金始終曲予優容嚴束滇軍力維秩序昨由戴省長及英
法日領事出而勸令停止該師長業已遵照乃英法日領事甫到
本署該師長復縱所部繼續猛攻招集匪徒來城劫掠並縱火沿
燒本署周圍民屋無算哭聲震天各領事因守署中自午達旦種
種情形目所親見不意該師長如此橫暴蹂躪桑梓人民何辜罹
此荼毒現已調集滇軍力圖戡亂惟亂事未定之先恐又有以該
師長誤會衝突之說電陳中央請予寬容實無以肅軍紀而伸國
法查該師長調兵運械放哨穿城蓄謀已久並非一時誤會且轟
擊軍署燒殺人民實屬罪不容誅佩金職守所關非痛予剿辦上
無以對國家下無以謝人民况此次裁兵本係遵令舉辦前奉大

總統電令嚴厲進行勿爲謠言所奪等因惟有仰體鈞諭始終不
撓用紆中央西顧之憂並拯羣黎塗炭之苦仍懇中央力予主持
俾竟全功至佩金統馭無方實難辭咎應請從嚴議處謹布血誠
敬乞察奪暫署四川督軍羅佩金叩未列號印

四川胡峨及各公民電云大總統國務院各部參衆兩院民友會
鈞鑒羅佩金自督川以來恃武殘民恣肆暴厲軍心不服民怨尤
深前次反抗中央任命嗾使黨羽力拒戴戡又以一師之滇軍冒
兩師之薪餉川軍則搭發紙幣滇軍則籌給生銀種種不法均爲
王檢查使芝祥所深悉諒達鈞聽近日四川新聞及警華報各編
輯無辜被逮棍責數千刪日突派滇兵迫脅四師駐省軍隊令其
繳械解散不給欠餉並收沒自備衣物以致該師省外各軍聞風
憤怒實行戰鬪全省騷然且借裁兵爲名剽劫川軍一面召募滇
中徒手張其爪牙直欲據西陲抗違政府請假既准復嗾使部下
抗電阻行數日以來更欲以武力撤換劉軍長存厚沿街設哨繞
省屯兵軍隊縱橫互相戒備交通阻絕人民驚惶危在旦夕竊思
中央命令僅在裁兵彼乃肆其野心將護國首義之川軍悉行遣
散劉軍長率師多年功勳卓著川中軍民倚若柱石中央亦當視
若長城劉軍長一人之去留卽川省治亂安危所係攀轅叩馬萬

衆一心迫於桑梓之危務懇力予主持迅賜解決以出川民於水火不勝惶恐待命之至公民代表胡峻等及四川七千萬人同叩

政府爲中行辯護

參議員張烈等提出關於中行票價格低落質問書內稱中行名雖開兌實則鈔票使用市面或兌換現銀仍以九五九六折扣計算財政部置若罔聞中行總裁徐恩元辦理不善商民之受其痛苦非筆墨可詳而財政部一味袒護等語財政部覆稱查中行開兌以後鈔票之價格雖未能即復原狀然恆在九六九七之間較之未開兌以前之價格相差甚遠近日復經該行切實整理鈔票之價格已在九九以上其用與現金無異是該行總裁徐恩元並無辦理不善之咎即本部毫無一味袒護之心原書又稱平市官錢局所發銅元票日漸低落近日市面兌換以九折或八五折計算或謂奸商舞弊有說該局漁利致令小民受無窮虧損以中央政府所在之地點以財政部見聞所及之弊端竟忍坐視票價日跌袖手旁觀非特貽人民之痛苦且失國家之信用等語查近日銅元票價格之低落實由於銅元減少所致直東各省之制錢因被收買逐漸減少遂不得不運京津間之銅元以補其缺於是銅元之價格遂見增長銅元票之價格遂見低落奸商因之舞弊雖

不能免該局方維持之不暇詎有藉以漁利之事至本部對於銅元票價之低落迭經籌議發行輔幣多鑄銅元一面仍視市價之低昂隨時收買日來銅元票與現銅元之價格所差已屬無多並無九折或八五折之事國務院已照以上情形咨覆參院矣

陳錦濤自請查辦呈文

財政總長政府提出李經羲衆院已經通過陳錦濤因賄案尙在拘押陳前呈請查辦文節錄如下查本部前以各省私販制錢出口日多漏卮日大非自行明定章程設廠收鍊不足以挽回利權徒以國帑支絀無從騰出大宗資本正在籌議間適全國商會聯合會請願承辦是以有華商保利公司之議嗣因國會修改條件商利驟減遂阻進行惟此事中途輟止溢利甚鉅棄利可惜而前公司解散之後商本利息一切虧耗尙欲要求賠償本部爲外塞利孔內恤商情起見始議由部招股官督商辦無論前股東及一般紳商皆准照章投資務期美利普及毋令偏枯章程業經國務會議議決在案但欲求官商融洽日起有功必員司恪恭潔已竭保商裕帑之誠商人克矢公平絕壟斷售欺之術當將此義告誠承辦本案人員並傳知前公司股東剴切曉諭以利之所在往往藉名影射招搖撞騙之事倘有此情切勿受欺並應立即舉發以免與受同科並干究辦在正當股商將本求利儘可照章入股享法律上應有權利決不當有意外營謀乃近日報紙所載竟有運動費至數十萬元之鉅且涉及本總長名譽非澈底根究何以肅風紀而優商情相應陳請貴院呈明大總統遴派廉明大員嚴行澈查如有確據卽行依法懲辦以儆官邪云云

外國大事記

西歐戰信 海格將軍報稱。英軍攻占勒岳爾課突村。瑣爾格郎德村。芬斯村。得地三處。德軍大受創夷。倫敦三月三十日電

英軍攻占海科爾。并在該村之東續得進步。又攻占佳科爾等數村。敵軍有反攻者。皆為英軍所擊散。倫敦三月三十一日電

德公報言。白倍泊姆至克羅西爾之路途間。曾有戰事。強武之英法軍隊。在戰爭大蒙損失之後。得有土地若干。法軍在哇斯愛恩運河附近。得有進步。占地若干。倫敦四月二日電

海格將軍報稱。在三月間。英軍所獲德俘虜。共計一千二百三十九人。內有軍官十六人。又得野戰礮三尊。機關槍六十支。合一月二月三月英軍所獲之德俘言。共有四千六百人之多。

協約國包圍聖圭丹之事。已趨成功。該地英師在北約距二英里。法師在南約距二英里半。法軍正將攻入德將興登保之陣線。西境雖有雨雪地滑之困難。法國軍隊。仍勇猛在松末河境哇斯地方。擊退敵軍。占有重要之地位。巴黎四月四日電

英軍自蘭斯起至聖圭丹止。連日猛轟敵軍陣線。入夜更烈。英軍進入敵軍陣線甚深。英軍所占之敵陣線內。有維米山脊為坎拿大兵所據。鐵網密布。防守極嚴。英軍繼復進占該陣線後之敵軍

大同月報 第三卷 第五號 外國大事記

防務。除鞏固之戰壕線數道外。且有重要之地點數處。至今日下。午二時止。俘虜之解至英營者。共有五千八百十六人。內有軍官百十九員。另獲礮械極其衆多。倫敦四月九日電

此次英軍進攻。軍用百足大礮車。又經實用。其奏效頗為宏多。英軍繼續進行。敵軍雖在各地回攻。均為英國擊退。昨晨英軍俘敵之數已逾萬一千人。內有軍官二百三十六員。英軍獲礮百餘尊。白礮六十尊。機關槍一百六十三架。英軍飛機助戰甚力。英軍之勝利。多得其助力云。倫敦四月十日電

德軍在後退之時。自許英軍進攻之策略。將因德軍後退而破。今亞拉之大戰。即為對於德人良好之答復云。倫敦十日電

海格將軍報稱。英軍衝擊海立約爾及韋科爾諸村。并渡過科基爾河。占有該河東岸之高地。倫敦四月十二日電

英軍於星期五夜猛戰占聖圭丹西北一英里之法伊村。英軍奪獲佛榮爾村東西大路亞斯森西盎田莊。與太泊里爾田莊。陣地之重要者。皆為英軍所占。英軍且在巴卜姆至坎白萊路北面向克安前進。力逼敵軍。使之讓出斯加泊河北面之地。英軍奪獲維米站等處所獲之敵礮。內有八寸口徑之霰彈礮四尊。英軍於近今數役所得之地。已與魯斯大戰所得者相聯結。倫敦電

英軍奪獲蘭斯西北之錫德聖比勒村。又占西南之萊九村。獲戰利品甚多。英軍沿自斯加泊河至魯斯南面全陣線進逼。已抵維米脊地東二三里之數地。斯加泊河南面。猛戰相連。英軍固守其所得之地。且重創敵軍。英軍在巴卜姆至坎白萊路南北廣闊之陣線前進得地若干。俘敵四百餘人。倫敦十四日電。

星期日晨間敵軍在巴卜姆至坎白萊路六英里之陣線反攻。皆為英軍之所逐退。英軍在聖圭丹西北激戰後。占得格里科爾東面北面之地。且在哈夫蘭柯爾叢林附近前進。倫敦電。

法軍在香港巴業攻入德軍戰壕。獲戰利品甚多。法軍在十二三四日共擊墮敵軍飛機二十一架之多。巴黎十五日電。

德軍近在蘇瓦松附近聚兵有二十聯隊之多。法軍仍有進步。協約國近數日勝敵共有一百萬人之多。巴黎十七日電。

香巴業及亞爾薩斯間戰爭甚烈。法軍大舉進攻現已開始。英軍自九日已俘虜德國軍人一萬四千餘人之多。獲砲則有一百九十四尊。其他戰利品亦多。倫敦十六日電。

法軍猛轟數日後。今晨進攻蘇瓦松與萊姆間廣四十基洛邁當之德軍陣線。劇戰甚烈。敵軍兵力甚厚。大破甚多。但卒為法軍制勝。法軍已奪獲蘇瓦松與克拉查勒間德軍第一陣地。又在克拉

查勒東面。奪占巨凡柯爾南面德軍第二陣地。德軍在維洛叢林北面屢次反攻。均為法軍砲火擊敗。法軍迄今已俘敵兵萬餘人。且獲大砲及戰利甚多。巴黎十六日電。

在松末河之東西。在激烈之砲戰之後。法軍攻擊加斯愛斯萊倍萊陣線之南方。已取得其目的地。敵軍之防禦雖猛。然法軍在十三基洛邁當之陣線中。卒破敵軍之強固陣勢。而取得大龍愛賓。格夫科爾。塞立斯。及烏爾維勒南之數高地。此數陣地。皆為德將興登保所轄之陣線內。今已動搖。巴黎四月三日電。

海格將軍報稱。英軍攻占美資岡特爾之地。獲俘敵人若干。星期日。在亞拉南所獲之俘虜。現在加以點計。內共俘虜二百七十人。機關槍十七支。戰場汽車四架。倫敦四月四日電。

法國公報宣稱。法軍已擴戰線。攻擊普魯萊與聖海萊爾瑣普萊特路。雖雨雪交加。而敵軍之防禦抵制。又極勇猛。法軍已在十五基洛邁當之陣線間。全占德軍第一戰壕。巴黎十七日電。

十六日蘇瓦松及萊姆間之戰事。法軍所擊破者。乃德國精強之軍隊。據被俘之俘虜言。德將曾命令固守此地。但因受創大為巨重。遂致不支。法軍在蘇瓦松及萊姆間。所俘虜德軍人之總數。現在統計已達一萬一千人之多。巴黎十七日電。

海格將軍報稱。英軍在蒙攪勒普勒斯。前進得占敵軍戰壕。又在蘭斯地方。開炸地雷。攻擊蘭斯南方之敵軍甚有效果。自本月九日起。奪敵之砲。已有二百二十八尊。倫敦十九日電。

英法軍在西歐。自四月九日起。至四月二十日止。連日獲勝。俘敵共三萬三千人。獲砲三百三十尊。巴黎二十一日電。

德人所俘之英兵。迄今共有三萬四千人。英軍所俘德人。則有七萬人之多。又英軍失砲。共七十尊。內有五十尊乃自蒙斯後之時所遺。英軍所得德軍之砲。大小共有四百尊之多。兩軍武力之比較於此可以想見。倫敦四月二十二日電。

海格將軍報稱。星期一之戰。極其猛烈。德軍以七師團作戰。有重要地點數處。兩軍互為攻占者數次。敵軍被俘者有數千人。

英軍於夜間占領比爾海姆。尚在繼續前進。英軍共俘敵三千零二十九人。內有軍官五十六員。自二十三日起算。倫敦念五日電。英軍在司克爾普河之南。又見前進。得機關槍二支。飛機亦有戰事。德軍擊落者七架。被逐去者八架。倫敦念五日電。

有四千之德軍。聚於樹林之中。豫備進攻。為英國飛行家之所察見。英砲臺遂以毒氣砲彈向之發射。德軍創傷達於其極。

法公報言。全陣線有激烈之砲戰。法軍現以激烈之砲火。向香巴

業聖圭丹等地。德軍發射得有軍用汽車四架。軍需物品甚多。

英大臣勞伯樂之子軍官勞君。在戰域因傷捐軀。倫敦電。

法軍在比利時者。擊退敵軍之數攻擊。在松末河及哇斯河間。

法砲臺對於德營會為有力之攻擊。二十二日夜間。我軍飛機十四艘。在愛思河陣線。擲炸彈千八百。基洛格拉母之多。

法軍自十六日至二十六日。奪獲德砲已有一百三十尊之多。德

軍被英法軍破之軍隊。占百分之十二。英法軍勝利頗巨。計得機

關槍四百二十二架。俘敵兩萬又七百八十人。巴黎電。

東歐戰信。俄國公報宣稱。俄軍擊退敵軍。使之退出伊勒司突

及克勒俄南之陣線。敵人用化學炸彈。攻擊斯土化特地方之俄

軍。繼又散於毒氣。俄軍乃自斯土化特退出。稍被創傷。德國公報

宣稱。德國軍隊。在斯土化特之中央。攻占俄軍特爾倍橋頭之地

位。并獲有俘虜戰利品甚多。倫敦四月四日電。

巴爾幹戰信。路透訪員電稱。塞國軍隊。在三月間頗有進步。攻

占數鎮并軍械所。進向里西。布國軍隊亦有兩師團相抵敵抗拒。

但其結果仍塞軍得有勝利。塞軍已攻近里西。使非布軍有第三

師團趨至援助。則塞軍當已占領該城。倫敦四月十二日電。

布加利亞據云。現大有不靖之象。以蘇菲亞為最甚。居民頗思推

翻帝位。布土兩國人民現皆有厭戰之意。 雅典十二日電

美索波太米亞近信 自倍格達由英軍占領之後。英軍在巴勒斯坦。又得勝利。柏林人聞之頗懼。蓋英之於土。壓力甚重。若德人不急為赴援。則土軍必難以支持也。 倫敦三月廿九日電

俄國軍隊在美索波太米亞之愷沙拉巴突地方。已與英軍相會。協約國軍勢當更勝利。 俄京四月六日電

官報消息。英國墨德將軍。在十日。聚集狄亞拉河右岸之前進軍隊。而使該地之敵軍移至德爾他華。繼於十一日。又復進攻。使敵軍退去六里。殺土軍二百人。傷八百人。 倫敦四月十四日電

英公報載美索波太米亞消息。十七十八日夜間。英軍進迫夏太爾亞德哈姆。該地乃土耳其第十八師團所守。英軍包圍距底格里斯河十二哩之土軍。迄於今日。計俘虜敵軍官二十七員。兵士一千二百十七人。獲軍需尤多。 倫敦四月二十日電

埃及消息。英軍在巴勒斯坦地方。攻擊土軍之地位。英軍之陣線。計前進六英里有半。英軍所得之地位。現在已經布置穩固。英海軍亦助戰。戰事仍在進行。 倫敦四月二十日電

英軍在伊司太布那突。俘土軍官二十員。兵士六百六十七人。戰十四尊。來復槍一千二百四十支。土軍向北退約十英里。

英軍在底格拉斯河之右岸。攻擊敵軍。加以重大之創傷。并進攻勝利。占有薩馬拉之地位。 倫敦四月念四日電

海軍戰信 德國潛艇U三十九號。近在北海被沈。在二月八日。該艇曾襲擊那威船伊達號。伊達即駐。敵手請示止。敵艇長仍命繼續發砲二十五響。繼又以炸藥炸沈該船。 倫敦三十日電

亞爾威克加司爾號汽船。載重五千九百噸。十九日在大西洋距岸三百二十里處被沈。在一日前。彼於英船之中。水雷者。尙施救助。船中之搭客水夫。離船入五小艇。有一小艇。駛抵西班牙。其餘三艇亦經遇救。餘一艇尙在查問之中。 倫敦三月廿九日電

在大西洋南岸。從事襲擊之船。乃德人所虜美國帆船。而施以改造者。內藏有水雷。二枚。二快砲。并設有無線電。假扯那威旗。其所害之船。共已有九艘云。 巴西三月三十一日電

巴西汽船巴拿馬號。已被擊沈。水夫失蹤者十三人。巴人聞之。益形憤激。德奧營業鋪皆受監視。 巴京四月六日電

那威船那馬號。為德海軍艦虜去。那威政府要求放還。未允。

英海軍部宣稱。在七日八日夜間。英國海面飛機。炸擊齊布茹基德軍軍械處。均安然駛歸。同夜齊布茹基之外。英軍炸敵軍滅魚雷艇二艘。其一即沈。其一負傷。 倫敦四月八日電

美國公司船紐約號。計一零七九八噸。觸中水雷。船客平安。已移登他船。全數安好。該船亦鼓力向他處前進。華盛頓十日電

英海軍部宣稱。有醫院船加塞爾號。七九九九噸。在三月卅一日夜間。於中央運河內。未受通知。遽被水雷擊沈。據柏林德公報所載。該船乃德潛艇之所擊沈。又醫院船薩爾他號。亦觸水雷而沈。乃德潛艇之所施放也。倫敦四月十三日電

阿根廷船一艘。為潛艇擊沈。現方從事嚴密調查。阿京電

希臘船里斯士斯號。載重共四千零六十噸。載麥回國。保險法郎八百五十萬元。并由希政府擔保。又將駛行日程通告德政府。而仍為水雷擊沈。希政府已向德國提出抗議。雅典十二日電

英海軍部宣稱。商船之英國口岸者。在前一星期間。共有二千二百八十有一。而船之被沈者。逾一千六百噸以上者。共有十八艘。在一千六百噸以下者。共有十三艘。為潛艇攻擊而未沈者。共有十七艘。漁船之被沈者。共有六艘。倫敦四月四日電

英海軍部宣稱。杜萊格爾號一八八五噸。蘭佛蘭克號二二八七噸。十七日晚間。運送傷兵至英倫口岸。未受通告。遽被擊沈。德國近來疊次擊沈醫院船。故醫院船不必標明特別記號。但均攜有護照。杜萊格爾號所載者。乃輕傷兵。內有二十九人及水夫

十二人。不知下落。蘭佛蘭克號載英國傷兵二百三十四人。醫生五十二人。辦事員五十二人。失英人二十三人。德人十五人。英國巡洋艦雖在將被魚雷擊中之時。仍救起德傷兵一百五十二人。之多。使慶更生。倫敦四月二十二日電

英海軍部宣稱。前一星期。商船之抵英者。共有二千五百八十五艘。其他商船在中途。為德潛艇擊沈者。有逾一千六百噸者。四十七艘。在一千六百噸以下者。十五艘。為潛艇所攻而未破者。二十七艘。漁魚被毀者。共計九艘。倫敦四月二十五日電

各國近信

三月三十日。德國議院中。風潮甚烈。社會黨議員。大聲疾呼。謂德國之共和政治。必不可免。而議院對於外交之權。亦必須加重。某議員謂。德俄單獨媾和之議。恐不易於實行。德國宜先行民主政治。以慰人民之望云云。亞姆斯丹三月三十一日電

美總統威爾遜君。又致書國會。討論對德最後辦法。主戰者之條陳。紛入白宮。保守者亦竭力運動調處云。華盛頓一日電

美京人民。現以美德入於戰事。甚為鼓舞。各家門窗。皆揚國旗。男女皆佩國徽。兒童亦攜國旗入學。衆議院外交委員會長布勒德

已備宣告書布告美德入於戰事。其詞曰德國近時之行爲。全視合衆國爲仇敵。因之合衆國元老院衆議院認明美德已入交戰狀態之中。授權總統。不特能爲防禦。且可本其能力。對於德國實行戰爭之事云云。 華盛頓四月二日電

英大臣勞伯樂君。今日在國會衆議院中演說。謂近時格沙之戰。英國軍隊之被殺者總計四百。而敵軍被殺者有八千之多。故土耳其人之損失。較英人爲二十倍云。 倫敦四月二日電

俄國議員司考比勒夫宣言。德皇及德宰相乃自由之公敵。俄民欲與德民攜手。必先除去德皇室云。 俄京四月一日電

美元老院討論對德宣戰問題。延長時間十三小時之久。元老院議員威廉氏謂德皇族在位時。土耳其在歐洲時。美人當繼續作戰。美國衆議院議決對德宣戰問題。以三百七十三票對五十票之議決。贊成對德宣戰。 華盛頓四月六日電

美總統威爾遜對於國會對於國會對德同意案。已經簽字同意。美總統業已對於德國宣戰。 倫敦四月六日電

美行政部已求國會即時准撥美金四百萬元。充海陸軍費用。美國元老院第一次議決軍費一百萬元。係本諸總統之意。

有德人僑美者七十五人。美政府認爲有急害。業已捕拿。內有圖

謀炸毀運河橋梁之人。 華盛頓四月六日電

英皇電致威爾遜總統曰。余願代表英國敬賀美國。足下當國會演說。表示正大主義。加入戰局。敬告國民宣言書中。所發生精神上及實質上之效果。不可限量。當此世界最大戰爭之中。美國有此議決。實大有助於文明云云。 倫敦四月七日電

德皇對宰相建言。謂選舉改良之事。待至戰後於普魯士實行。可以允准云云。 柏林四月七日電

古巴元老院通過對德宣戰之議案。其代議院亦於同一時間通過議案。贊成對於德國宣戰。 古巴京城四月七日電

巴西與德意志之外交關係。現在已經斷絕。 丹京十日電

美國財政大臣宣言。發行三釐半公債券美金五千萬元。以三千兆元之美金。供給協約各國。庶協約各國。將此資金。可以將前此巨利之債券。先行收回云云。 華盛頓十日電

奧國船舶。泊於美國各口岸者。已被美國政府實行收管。當查收時。查有一船中之機械。已經破毀。 紐約九日電

威爾遜總統。已正式批准航務部所定新式木船之程序。共計千艘。每艘三千噸。五個月造齊。國會允撥款五千萬。 美京電

日皇電致美總統威爾遜。言美國加協約國之一方。主持人道正

義。日人聞之甚爲滿足云云。東京十二日電

墨西哥總統克爾蘭沙。宣言承認美國政府。謂墨國各地所產出之洋油。皆任美英二國。取供軍事之用云。華盛頓十三日電

美金七千兆元之戰債。已由美國衆議院一致贊成通過。內有美金三千兆元。可望借給協約各國。華盛頓十四日電

美國海軍大將西門司。已至英國倫敦。聞此行在議訂英美海軍之聯合動作辦法。俾得互相扶助。以得勝利。此外金錢資助。已有千四百兆鎊之多。現美國又願任大西洋之防務云。倫敦電

俄國前敵將士。聞內國兵工廠停頓之謠。特派員回國視察。見各工廠操作如故。工人皆熱心輔助戰事。俄京十三日電

巴拉格埃國對德態度。已定意與美國一致進行。

阿根廷巴西智利三國。現正會商。擬開南美諸共和國之大會於阿根廷京城。以組南美對於戰事問題之同盟。阿根廷電

俄國政府議定。凡貨之不關於國防者。皆禁自斐那狄伏斯圖運入。而有關於國防之貨。亦應先商務大臣之許可而後運入云。

烏拉圭國政府。致文美政府。贊成其與德國之宣戰。并願與美國以精神上之助力。阿根廷國中。現在仇德示威之舉動。正在進行。德使署及領事館皆被攻擊。阿根廷京城十五日電

德人以兵士尸身煉油與飼豕之殘忍事情。已經探出。德國拉加爾報之西境訪員。記愛佛格里科爾鎮事。謂當經過該軍尸體廠時。有一種臭味如燒石灰者。比利時報。詳載此事。則曰。尸體利用之發起。實德國科學爲之厲階。該公司資本共二十五萬。總廠設在比德交界之聖維特鎮。專熬西境兵尸。如成效良好。即當設廠以熬東境兵尸。該廠設於森林深處。在火車上稍可望見。其西北隅即火車卸尸之處。車到時。裸尸纍纍。由廠中工人運下。工人各穿油布長袴。戴假面具。將尸先運至消毒池。復過烤乾室。終至巨釜中。煮六時至八時。尸體解化。乃以機械撥動。即可用蒸溜法煉油。其油作深黃色。他項餘質。則用以製皂。廠中化學師及工人共約八十餘。皆係軍人。德人之殘暴。誠可謂達於其極已。

荷蘭國中。現在每人每日之麵包食量。限九英兩。又因食物缺乏。政府與國會議將軍人放假歸農。以增食料之生產。海牙電
聞美國將以一百兆英鎊。捐贈法國。以爲報酬。蓋一七六六年。後。美國革命時。法人對美。亦曾有金錢上之扶助也。倫敦電
上海美領事電致美國務院。大致謂德國近來對美純取仇敵之態度。美國自當用其全力。以爲抵禦。摧殘德國。完結戰事。但美國祇欲抑遏德政府之暴橫。并不仇視比民。美國并不欲獲私利。得

賠款。但期維持民主政治而彰公道云云。

美國元老院及衆議院。已通過議案。准許協約各國爲軍役之事。在美國招其國民入伍。華盛頓四月十八日電

法國政府。現派前國務總理現司法大臣維維里。以及霞飛員帥。同往美國。捧呈感謝美國加入戰事之公文。巴黎十九日電

美俄之間現已訂有契約。言明聘請美國鐵道專家五百人。前往俄國。整頓俄國鐵道事業。華盛頓四月十八日電

外間傳俄國臨時政府。因社會之主義。將與德奧單獨媾和一事。殊屬不確。惟俄國社會家曾勸告德奧社會家。推翻專制政治。在德奧建設民主政治云。紐約四月十九日電

俄國外交大臣密立克夫宣言。俄國臨時政府。將竭其能力。以摧殘德意志軍力橫行之主義。俄京四月十九日電

立加拉格國。有公文致美國政府。贊成對德宣戰。華盛頓電

阿根廷政府。以嚴厲之文。致德政府。要求對於擊沈阿國帆船之事。爲滿意之答復。阿根廷京城二十日電

英管食部新發命令。限制小麥唯可用以播種及製造麵粉。而米及麵粉。亦惟可供人類之食用。倫敦四月二十日電

美國上院軍事委員會報告。志願兵制度。收效太慢。現擬行收調

制度。按地定額抽調。以期速成。又議會將提出戒酒議案。

英國大使署。今日懸掛美旗。此實歷史第一次之事。威爾遜總統二十五日。將在白宮接見英國大員貝爾福君等。內閣已討論運糧食至北歐。免其流入德國之辦法。華盛頓四月二十日電

土耳其已與美國斷絕外交關係。華盛頓二十一日電

德國對於奧國政治風潮甚爲驚惶。奧皇主張將宣布政令用德文之事。交下月召集之帝國會議議決。奧國之祖德黨。多被推翻。德報亦載奧有離德之先兆。亞姆斯丹二十日電

英國軍事會議決帝國聚議之時。印度得派代表與議。

法國派往俄國之特使。有軍械部大臣在內。巴黎電

西班牙爲船舶爲德潛艇擊沈。已向德政府提起質問。柏林公布其公文。其措詞頗爲激烈。亞姆斯丹四月二十四日電

日本自一月起。對華貿易。出口高於入口一千九百餘萬元之多。又因中國有加稅之議。棉紗出口者多。價值遂因之大爲增貴。

葡萄牙首相言。葡國將有遠征軍。在法及東斐會擊德軍。

美國補助協約國之財政。每月約在八十兆金鎊至百兆金鎊之譜。內借與英國每月約四十五兆金鎊。法國約二十二兆金鎊。俄國約二十兆金鎊。意大利約十兆金鎊。此項金款專爲在美國購辦糧食軍械及其他軍需價金之豫備。華盛頓電

政治學要義 (續)

英國大學教授錫德威克著 江蘇王官鼎譯

惟就政府之重要任務而論。轉有難於計其所分配於各個人之利益者。若政府對於敵國宣戰。雖足保持國家之尊榮。權勢利然。確難以計其及於個人之利益。而用爲分配稅額之基礎也。

法官與警察對於特定個人常有扶助之事務。但依邊沁氏彌勒氏之所主張。『訴諸法律者。乃受法律政事保護至少之人。』因之以法院警察之費用使被迫而求其直接救助者。擔負固不可謂爲公平。反之分配於間接受其保護者之間。而欲得其適當亦屬難能。至於人民對於政府保護財產所償之代價。若契約之貼印花稅者。則可謂適合斯項原則。蓋其納稅之數視其受保護契據財產之額以爲定也。惟國家租稅其數至多。其不可合於此原則者。吾人自應別立他之原則以求公允也。

第五節 平均分配租稅之著要原則。除依政府所行事務爲比例而分配者外。是爲平均租稅所加於人民之擔負。斯密亞丹氏所主張之按照個人之收入財產分配似爲認定此原則者。惟細味之亦不能全與此原則相洽。合耳。夫各階級之人民擁有同額之收入者。其需要不能盡同。因之租稅所加之擔負。卽不能無異。第一各人因其手藝職業用具所爲之支出。在定額科稅之前。似須除出於收入之外。反而言之。則此項支出。又與娛樂用具之支出。難以區分。如文士之書籍。醫生之車輛。皆半供職業之用。半供娛樂之用者也。又有尤其著要者。如成家者與未婚者。工人因贍家養老之儲蓄。與資本家之資本收入。或同而其甘苦各異。至於貧民收入之科稅。或令其生活費用不能充足。而致有害於健康。此尤爲弊害。

中之重大者已。

職是之故。平均租稅之負擔。稅率依納稅人之收入而爲累進之說。固未可以厚。非惟其弊或不足以獎勵儲蓄。而令全社會資本消散。亦屬可慮。於是學者又有等級稅之主張。斯在使稅率依級逐漸低減。以至收入在一定之低額下者。卽不科稅。此低額之規定。并不依財產之收入總額爲準。而以全收入中。減除必要之支出爲準。庶人民之生活不致爲苛稅之所壓迫。此在公家擔任救貧支出之國。尤爲相宜。蓋救貧於既貧。究不若養民使不貧也。又在限額免稅之外。尙有應爲注意者。卽人民收入之數。或較高於定額。無多。若使依其全收入納稅。則其人納多數之稅。仍不得謂爲公平也。

由此觀之。個人收入中所可科稅之部分。固應在必要之個人家屬消費以及維持營業費用之外。但規定何者爲生活所必要。既屬困難。而計議各人需要之異點。尤難確切。是以此項原則。在直接稅之制度中。亦有不以完全實行者。言實用此原則之法。亦惟有使收入微末之人。僅荷間接稅之擔負。對於不必要之消費物品。依法則而納稅。庶乎其人。有取捨之地。步擔負可以輕減。生活不致危險。循此以行。雖因消費者嗜好體質習慣之各有不同。不平等之現象。仍所難免。然其弊竇實可謂爲微細。近似之擔負平均。固可以由此而得也。

科稅於物品。須注意於物品之消費。不致因科稅而大受限制。蓋此項限制。所以損及於公衆者。每較國庫之所得爲尤重也。但有若干限制。亦難免除。如煙酒等項。多用之。適足以傷害衛生。故重稅之。亦未始

非計也。此項物品之通常消費，可吸收消費者之餘剩部分而減多量之財富，故爲節制起見，當然對於中上階級之人既課其直接稅收入，又課以消費物品之間接稅，以相調劑，惟是合直接稅及奢侈品間接稅而言，計算各階級人民所荷之擔負，殊難得其正確，而求謀課稅之全然平均，直不可得，不得已而思其次，亦惟有將貧乏者之收入稅以及必要物品之消費稅，全然免除，庶乎各階級收入者之租稅擔負，可以得有類似之平等而已。

誠如上論，則租稅勿論爲間接稅爲直接稅，自可由政府徵稅命意所屬之人爲之負擔，而不致由此人更移轉於他人，是於租稅原理殊相符合，又奢侈物品徵收新稅，往往令供給此項物品之人蒙其負擔，此項稅則殊不應常時變更也。

第十二章 政府之侵佔與賠償

自第三章起，著者論政府之對內的職務，以及執行此職務所當遵依之原則，已經完畢，吾人第一當承認一道理，所謂「國家中之成年國民所仰望於政府者，大抵在受其保護，不致爲他人之侵害，干涉與夫他人不敢違背契約諸事」，此一原理，近世之政治學說中固多贊同，即各國法律制度中亦多採行。詳言政府所爲之保護，即設立法律禁止一切侵害，干涉之發生，而遇有違背者，即科以刑罰，或強之賠償是也。然政府對於私人之干涉，或有較此爲更甚者，而政治家并不以爲非，此其原因不一，可列舉之。有時在求保護個人完全不受損害，有時在保護被干涉者自己之利益，有時在保護國家之利益，非私

人所可賠償者。有時在保護社會中之貧民。使之生產財貨。愈爲得力。有時在保護不良於生存競爭者。不致愈趨愈下。此數情事。其需要政府之干涉。已爲近世國家所共認。但就著者之所思量。政府之爲此干涉。或有濫行抑制之弊。不可不爲注意。斯雖在於文明之國家。其政府目的。在以賢明之法。則維持國民之幸福。亦每發生此弊也。

政府之干涉。其越出乎適當之範圍。當以政府之干涉。屬於『間接個人主義』、『保育主義』。以及『社會主義』者。爲最顯明。惟政府之職務。即嚴限於極端個人主義。亦常有此項情事之發生也。吾人在論定財產權之範圍時。雖全依個人主義之原則。然必留有若干之疑點。斯對於土地財產權之事。人工勞力效果財產權之事。以及契約義務之範圍。莫不然也。又如上章之所論列者。政府之執行職務。必有其收入。以政府之需要者。使人民爲之負擔。而欲使其分配得當。其間亦有若干疑點。發現就此諸項疑點。觀之。更注意於文明實業之發達。人事關係之變遷。吾人當知政府立法事務之改變。雖在文明進化之國家。亦爲常時必見之事。而此項改變。對於個人之權利關係。權利欲望。根據於現時法律而發生者。亦必生有影響。舍此種改變。而外。政府行使特種之職務。對於個人所應得之權利。亦常有所侵犯。此諸項政府侵占人民權利之事。比諸個人侵犯個人權利之事。直少所差異。而實際上。又難於全免。因之。吾人於政府對於人民所爲侵占權利之事。當設法爲之防維。而遇有難於或免者。亦必設有賠償之法。庶乎個人之欲望。得因之而滿足也。

(未完)

國際道德論

(續)

英國鮑恩司著 義吾譯

一人屬於若干制度。此等制度可謂爲互相聯屬。但性質上仍未混其形跡。譬之一人午餐之時復聆音樂。雖全爲此一人一身所領受而餐與音樂仍爲二事。但當一人應用許多制度之時。其一制度雖無須超越於其他制度而意義上仍包含之。此制度之價值或較他制度爲高。如吾人由此所得亦或應較由其他所得爲多者是也。但吾人亦未能謂國家即較其他制度爲珍貴耳。吾人即由各制度所得而計算之亦不能謂何制度超於其他制度之上。雖衆善相比其中固應有一絕對之善。但此絕對之善種類甚多。或爲普通而非特別之事。美餐佳美文字佳美音樂以及自由幸福均爲文明生活上所必需之佳美之物也。然未能以一絕對佳者而犧牲其餘。即謂足以保持其生命也。因此之故吾人乃謂國家非超越於各項制度之上者。且不以教會或其他制度爲優勝者焉。近今生活乃一種種利益之規則的共和用以供給此種種利益之制度之關係。乃亦爲共和其目的間價值之差異。乃制度之所以存立。若有爭執則以此附彼。但彼等仍爲平等論列其所附屬者。並非他物。乃彼等所恃以存在之法律耳。

由國家與各制度之關係言之。可謂國家乃預備享受由各制度所生之良好結果之時機者。但由吾人觀之。國家並無特別機關。乃專爲媒介各制度之結果而設者。由普通言之。法律及政府乃國家作用之媒介。其目的乃求秩序及自由。所謂秩序乃不發生專制。所謂自由乃不可放肆。但近世國家並未預備技術科學。然此三者苟無秩序及自由。仍不得安然存立。蓋國家乃一制度處於衆制度中而爲文

明。生。活。所。必。須。要。者。是。也。政。治。定。理。即。當。由。此。種。關。係。土。定。之。焉。雖。然。此。尚。非。吾。人。現。今。日。之。所。須。要。也。蓋。若。明。乎。此。關。係。繫。乎。種。種。目。的。此。等。目。的。乃。各。制。度。之。所。以。存。立。也。

雖然國家固應預備文明生活之各種需要也。否則社會主義當與普魯士主義同一廢止。此駁論可由各制度之職務分別之法律上見之。吾人可以此法律以表明近世國家之特別目的。焉。例如中古時代之教會對於音樂圖畫戲劇等事皆有補助之力。與吾等今日視其對於宗教道德上所盡補助之力固相差無幾。中古時代精心剏造之教會建築種類甚多。如今日所謂音樂室美術陳列所博物院戲園等皆有之。然在中古時代一城之中並未見何美術陳列所也。戲園也非無此種建築物也。乃因以一制度補助衆制度之故耳。復興時代學術技藝乃另由新制度補助之。教會職務漸加限制。因漸加限制而教會乃漸專務宗教之事矣。吾人試準此以論近世之國家。蓋吾人固決不承認英國斯賓塞學派之見解。謂國家職務之限制即國家今日所行較往日所行較少耳。雖國家職務乃嚴格的政治關係。其今日作用之範圍較之當日以一制預備補助政治需要復補助其他文明生活所需要者已大為擴張。然無論如何國家之職務之限制並不使國家因而低落。亦如教會之職務之限制並不使教會低落也。若各制度各有特別之專務。反足以加增其權力而擴張其影響焉。英哲學家斯賓塞爾之誤解謂一制度擴張其自由國家必加增其束縛。即謂文明生活之需要由他制度補助之。則國家之權力必大縮小。由斯氏之見解則必為有一定分量之權力。一制度多得之。則他制度亦即多失之矣。或為有一有有限制之作用。

範圍各制度之分配。即發生於其中。權力增加。制度之活動範圍亦即擴大焉。故制度雖較昔日爲多。各制度所掌之職務亦較昔日爲大。各制度雖加自由。國家行爲仍無限制。而活動如故。國家之權力僅加以修正。且得指揮之力也。而各制度之職務限制並未限制權力焉。

吾人不必僅就英國言之。由各文明之國依次觀察。則知一國之中。其今日之行動固未較昔日爲多。與吾人將來所謂國際間之關係之變動。而謂爲國家行動之根基者相去尙遠。吾人久以擴張自由爲事。然人之初生固無自由。生長撫育。因身體之限制。智識之未足。仍無自由之權。其個人無自由者。其所屬之社會亦必無自由。蓋此社會之發展。爲其公民發展之限制。所制遏也。故國家當本其目的。以擴張其活動力焉。又如工業發達。所造之新經濟力。中尙無次序可言。乃由競爭而致有專利權。因專利權。乃致不滿足。且無次序供給。與請求絕對淆亂。有一方面之積貨太多。有一方面貨物常感不足焉。各階級間亦無次序。蓋法律雖曰仁慈。而無定見。貧民控訴乃多無效。此皆有關乎國家之行動者也。故吾人曰。實際上之政治家與宗教技藝。無直接關係。非謂無所措施也。由反面言之。則較之此等政治家所想像者。所爲尙較多也。

吾人今乃論及國家權力支配之問題矣。但非謂國家之權力施及各個人者。乃指其支配於組織之團體者也。制度之存在。舍維持法律命令二者而外。尙有他種目的也。其他種目的。即求所以整齊調理法律命令是耳。故教會可謂爲非國家之一部分。但遇迫害之時。仍必籌所以阻止之策。一貿易團體對於

不。隸。屬。於。其。團。體。中。之。人。員。可。不。圖。謀。其。利。益。但。如。此。貿。易。團。體。對。於。不。屬。已。團。之。人。而。加。以。妨。害。則。國。家。必。禁。止。之。也。一。公。司。一。團。體。可。不。依。國。家。之。力。而。存。在。然。其。行。爲。之。界。限。當。以。不。損。及。公。民。利。益。爲。其。範。圍。也。雖。然。國。家。之。地。位。雖。與。昔。日。迥。異。而。政。治。定。義。之。問。題。仍。不。可。勝。數。如。城。市。中。居。民。之。羣。集。世。界。市。場。之。製。造。近。世。利。益。之。駁。雜。近。世。經。濟。界。關。係。之。纖。密。皆。足。以。爲。新。地。位。之。引。導。而。由。此。混。淆。中。吾。人。仍。當。分。別。各。羣。之。人。及。各。種。之。制。度。此。等。制。度。乃。人。類。爲。種。種。目。的。而。使。用。之。者。也。一。種。制。度。乃。繼。續。宗。教。地。位。者。一。種。制。度。乃。繼。續。文。化。地。位。者。一。種。乃。繼。續。經。濟。地。位。者。此。外。則。爲。繼。續。昔。日。希。臘。政。治。之。地。位。者。焉。此。種。歷。史。上。種。種。變。化。乃。致。生。陸。續。改。變。之。職。務。最。後。乃。至。今。日。之。二十。世。紀。然。今。日。二十。世。紀。之。時。代。固。無。疑。爲。非。終。止。之。時。也。

但。所。謂。國。家。者。最。後。終。可。由。其。對。於。文。明。生。活。之。他。種。制。度。之。關。係。而。確。證。其。並。非。昔。日。哲。學。家。之。所。懸。想。之。見。解。也。則。必。然。矣。

第三章 一國與他國之關係

今日、國家、制度、與、昔日、之、異、已、如、上、章、所、述、而、國、際、間、之、關、係、亦、有、與、昔、日、情、形、迥、異、者、也、至、高、之、政、治、制、度、可、謂、之、爲、具、同、一、之、次、序、且、限、於、純、粹、之、政、治、範、圍、之、內、此、今、日、國、家、與、古、之、無、限、君、權、相、差、之、處、也、其、對、於、同、次、序、之、各、制、度、之、關、係、大、有、關、於、其、性、質、之、如、何、故、近、世、之、國、家、不、可、視、如、孤、立、之、地、位、昔、日、之、國、家、定、義、雖、無、具、體、表、示、固、原、以、國、際、關、係、爲、附、屬、物、國、家、之、要、素、乃、政、府、及、法、律、

(未完)

英國刑律綱要 (續)

英國法學博士康萊著

江蘇王官鼎譯

在一千八百四十三年間因一私人案件之爭議而刑律上精神病之意義乃有較爲確定之解釋有馬克勞吞者誤認政治家羅伯比爾之書記爲羅氏本人而殺之法廷審判卒以有精神病而放免當時物議頗不謂然貴族院對於此事亦生論議遂以抽象之問題徵求法官對於精神病之概念法官之所答者大要如下

(A) 凡人皆當假定爲神志清白之人有充分之理解力對於犯罪應負責任惟有反證經陪審官認爲確鑿者方作別論(B) 凡以精神病爲防禦理由者應表明當事者在犯事之時如何因心神疾病而致缺乏理解能力對其所行之事不能瞭知其性質或雖知其性質而不能辨別其是非(C) 若被告人知其事非所當行而其事又違國法者即當刑罰是知辨別是非之力并非泛指一切(D) 凡犯人幻想中誤認周圍事實因而犯罪若其幻想中之事實同於其意想之所及者其人當荷同等之責任

更當注意者凡藉精神病之幻想爲防禦須其行爲與幻想直接相連方可如幻想擊妻是類如以詐僞之言騙得錢財即爲犯罪雖其幻想中自認爲某貴族之嗣子可勿問也

前所論者精神病幻想及愚昧之效果也但精神病之效果不僅可及於人之信心并且及於人之感情意志如人殺其子自赴警局報告其事可謂自知其犯行之性質已但其人如果先有瘋狂之徵候而行事時無可見之意思行事後無隱匿之計畫者固仍可邀免於罪刑也

精神病之感情對於刑事責任有何效果。迄今尙無定論。在美利堅合衆國大理院及各州法院類皆認不可抑制之感情爲充分之防禦。雖自知其行爲之不正者亦所勿論。在於英國則尙無確定之見。有數案件法官固主張精神病之感情雖不可以控制亦不足爲論罪之防禦。而斯梯芬及他之法官則又主張精神病之感情苟其實不可以抑制爲非僅制不即可認爲論罪之防護。蓋由此所成之行爲非其人志願所成之行爲也。至如因受催眠術之行使而致失其精神上之感覺者其行爲似否應負刑事責任在英國亦未嘗有定論也。

凡以精神病爲防禦已得法官之認可者法官之判詞昔用『不爲罪』一語。但自一千八百八十三年瘋人審判法頒布之後判詞之用語乃改爲『行爲犯罪但因精神病之故依法對其犯事時之犯行不負刑事責任』。裁判既定法官乃禁此瘋人於瘋人禁錮院而奏知於英皇。非英皇命其出院其人當永禁於此。是以此項禁錮常成爲終身之禁錮。而由此原因英國高等法院之中犯人藉精神病爲辯護者乃不多見。蓋人非犯至大辟殊不願因求免罪而反至於禁錮終身也。

(丙)醉酒之人 人之沈醉於酒以至失其知覺其人殊有可責之處。使其更因此而有犯罪之事似不可以宥恕。已惟是人之醉酒亦有非出於己意者。或受惡友之勸誘或因飲用藥酒而致過度。在此情形之中醉人所犯之事似不可以論罪。蓋其人既無直接之犯意而飲酒又非出於本願。依常法論罪而不予以宥恕。卽未免爲苛也。

通常醉酒之事雖可咎責然亦有可以輕減刑事上之責任者茲列於下。

(A) 醉酒或發生事實上之錯誤而其錯誤自足以減免不法行爲於刑罰者如醉人思想錯亂誤謂人之劫殺威迫自己遂以自信之正當防衛權而襲擊其人是也。

據英國法官戴氏所言英國法廷對於醉酒者之處置其通則如下即凡人之入於酣醉之態不知其行爲之性質復不知其爲罪惡者其人之行爲可以宥恕是也。

(B) 醉酒者之刑事責任通常雖不見其輕減但於各項特別之犯罪須有特別之犯意然後成立者醉酒殊爲重要反證如謀殺及謀傷肢體之罪須有圖謀傷害之特別惡意而醉酒者則可見其未有也破扉而入人家可訴爲意圖竊盜而醉酒者則可見其無竊盜之意也婦人墮入井中可以謂爲輕生而醉酒者則可見其爲失足而誤入也總而言之對於有特別惡意之犯罪醉酒之人與清白之人所占地位固自有不同也。

(丁) 公司 公司在於昔日殊不在刑法懲治範圍之內公司而有犯罪之事祇能對於公司中之分子行其事者施以懲罰殊不能視公司自身爲一犯人對之而科罰也此項意見與刑事訴訟法之原則所謂刑事法廷以犯人自己到庭答辯爲要不應由律師出庭代辯者殊相洽合而且犯罪以犯意爲要素公司既不同於真實存在之人即不能有意思更何有乎犯意不有犯意安得論罪歟。

但在近數十年之間公司制度發達至於其極使其享有不爲罪之特權則公衆之危險何可限量因此。

之故立法主義乃爲之一變。公司之犯罪得對於公司而科罰。其所科之罰金亦卽於公司之財產中徵收之。更析言之。犯罪分作爲犯二項。其因作爲而犯罪者。公司之代理人及傭工自可就其事而受懲罰。公司自身自無受罰之必要。但因不作爲所致成之犯罪。公司中之代理人及傭工殊不能負其責任。自以處罰公司爲必要已。

夫公司之可以處罰。既爲各國之所公認。自無困難之可言。懲罰公司之困難問題。卽公司爲法人不能受刑罰。是已。公司有公司之財產。科以罰金固爲可能之事。惟刑罰以罰金爲最輕較之尤重者。尙有絞刑與徒刑。公司無身體詎可處以絞刑。處以徒刑。職是之故。公司之負刑事上責任。當以罰金之刑爲限。犯罪之處刑在拘禁徒刑以上者。對於公司卽無所用。其刑罰公司而有欺詐之事。可以處工司以罰金。公司而犯叛逆之罪。則不可處公司以重典也。惟公司犯有拘禁徒刑等罪。亦不可無處罰之方。處罰之法。維何卽就公司執事人之爲斯事者。對其個人處以刑罰。是已。於此猶有應注意者。卽公司犯拘禁徒刑。絞刑之罪。固當偵察公司中之執事人。關於此犯罪有嫌疑者。加以偵查。俾得其主名之人。依照法律施以正當之刑罰。庶犯罪者受有適當之懲創。而社會公衆亦可得保安寧。不致受有意外之危害。卽在公司所犯之事。依照法律可處以罰金者。法庭對於此事爲其審判。亦非以處公司以罰金爲必要。苟公司中之執事人指揮或實施此犯罪之事者。可以偵得。則仍宜對此實施犯罪之個人施以懲罰。夫如是當事者乃知所儆戒。而社會之公安幸福乃愈可以維持也。

衛生行政論 (續)

英醫士鈕滿原著

梅益盛譯述

預防疫病之方法。現在所有預防之法。非忽然而得之者。係由古時逐漸進步。且由衛生主義進步耳。中世紀歐洲常發現大疫。罹禍以死者。皆不知其確數。因無專司之登記所。惟大略知之。又未研究疫病之由來。故難實行預防之方法。嗣後人民受害匪淺。決意探求良法。以免疫病。故預防法日漸進步。現今已有效果。數種凶險惡症。驅滅殆盡。其餘尙未驅滅者。死人最屬輕微。拯救民命。不勝枚舉。此爲今日預防之大效矣。英國預防法分五項。一、有傳染病。必報告於衛生局。二、將患此疫病者。遷居於隔離院。三、行消毒法。四、已經查出疫病之來因爲何物。卽由衛生局設法以取締該物。五行血清療法。第一說。報告傳染病。既欲預防病疫。自當知病在何處。現在所定章程。某家發現傳染病。其所延請之醫士或該家人。皆有報告衛生局之義務。如云某街某號。或男或女。及現所患病之概要。俾得一一登記。倘匿而不報。後經局員查出。則當責罰其家人與醫士。按疫病有報告之必要者。爲天然痘、霍亂、白喉症、丹毒以及各種熱症與肺癆病。此外尙有傳染病之輕者。亦勸諭來局報告。照此而行。人人皆知其有益。因知傳染病之人數多寡。以及疫氣之或聚或散。皆足輔助預防之手續。至於既得報告之後。或施以消毒法。或禁止病家學生入校。皆爲應辦之事。第二說。遷患疫者隔離以居之。或在本宅擇一特別房間。或昇入治疫醫院。此由政府強迫以行之者。若本宅實有未便。則當強迫以遷至治疫醫院。惟人民均不樂於入治疫醫院。但行此隔離。終與大眾有益。且治疫醫院內。醫藥全備。較自居本宅。其方便爲何如乎。第三說。行消毒法。其

所用化學藥品之宗旨分爲三(甲)阻止微菌發達者。名曰防腐劑。Antiseptics (乙)去臭藥。Deodorants (丙)能滅微菌者。Germicides 乃將病人身外之微菌而滅之。如病人所居之房。與所服之衣。所臥之牀鋪。及一切用具。皆宜濡染以滅菌之藥水。免他人用之以受傳染病。滅微菌之法。人民可以自行。或衛生局代行之。其法有三。一、用熱氣薰灼。二、用藥料濡染。三、用淨水洗滌。病人之居室。尤宜收拾潔淨。其法以硫磺燃燒。每千立方尺之空間。以三磅硫磺方足。或者以加波利克酸灑於牆壁間以洗之。至於牀鋪衣服則用蒸汽法。及消毒藥料。以蕩除其餘毒。或者以衣服置櫃中。薰之以硫磺亦可。更如病人所排出之大便。及膿等汗穢。亦用消毒藥水。免旁觀之健康者受其毒害。第四說。取締致疫之物品。按已經將病人送入隔離醫院後。再行研究該病原。何由而來。蓋免健康人再受此毒物之害。若此病人係受彼病人之傳染。則將彼病人亦迫令入院。若此病人係飲不潔之水。與不清潔之牛乳。則取締此水及此牛乳。禁止流衍以害他人。或因食他腐敗之物品。則禁止再行購食。一切法則。皆抵制病之根原。但法則均係良好。究不如先事預防之爲妙。所以衛生局之宗旨。即欲平日檢查物之危險而取締之。免致一人染疫。此爲至要。古語云。智者防患於未然。殆此理也。第五說。血清療法。夫患疫病而未抵於死。必期病勢漸退而愈。退病之意。即內部之抗毒素強。而勝此病毒。或曰。病毒在血中。不但有害人之能力。又能產生一種抗毒素。苟力能勝病。而病勢即退。有數種病退時。抗毒素依然存在。以後該疫病再不能侵犯。名曰敵傳染病之能。Immunity 昔有法國理科士。試驗人體內部。有多少血昧。係具滅穢之功用。名曰滅穢昧。

Phagocytes 蓋能勝過病毒耳。凡人身皆有滅穢朧。強則能勝病。弱則爲病所勝。更有一英國著名之醫士。試驗人之內部。不僅有滅穢朧。更有血液具抗拒病毒之能力。因血液之中。先有最小之物。預備會合新發生之滅穢朧。其意即預備者。Opsonins 故身內有滅穢朧。又有預備者。漸能抵制病症之黴菌而勝之。預防疫病之法。在古時所行者。即隔離法一種。至後世羣居周密。隔離法不易完全有效。所以另籌預防法。最著名者曰痘漿。曰血清。蓋痘漿所以防天然痘。血清所以防白喉症等。皆以補隔離之不足也。種痘之法。在一七一七年。英國派於土耳其駐使某。其夫人由土返英。報告曾在康士但丁城。見土國人以人之天然痘漿傳種之。當時英國天然痘盛行。故聞某使夫人報告土國之法。急行效之。其意蓋寧肯種人痘漿而得輕病。不肯俟天然痘而得重病。此法在英行之百餘年。至一八四零年。國會禁止之。因此時已發明牛痘漿耳。查人痘漿之種法有數。大半種於手臂。所種者係天然痘之毒。所發者仍係天然痘。故多危險之虞。一七九六年。英醫生哲納爾。研究牛乳棚之工作人所發現一種病症。名曰牛痘。此病愈後。不生天然痘。推想牛痘。必有預防天然痘之能力。故以法試驗。嗣以牛痘漿種於人身。以防天然痘。不必再用天然痘之漿種之。當時人多反對。後因行之有效。故信用日著。國會乃頒布法令。民間須種牛痘漿云。自發明牛痘漿之時起。數十年來。信者益多。至一八五四年。英國乃行強迫種牛痘之法。雖然仍有未盡信從者。一八九八年。國會更易法令。苟有人心實不信。則親詣官府報告不信之理由。仍可任其自由。故現在英國嬰孩。未種牛痘者。尙有三分之一。或問種牛痘之法有效否。答曰有。前一百年天然痘

迭見流行。近年此病罕見。不但此也。已種牛痘之人。即患天然痘。死者亦少。或問曰。天然痘之罕見。恐係衛生進步之關係乎。答曰。未盡然。此等效果。非盡關於衛生進步耳。實因已種牛痘也。一九零一年。倫敦城末次天然痘症流行。事後檢查。患是病及死於是病者之表冊。可知已經種痘而染是病死者。僅十分之一。未經種痘而染是病死者。十分之三分二。或問曰。種牛痘既有預防之效。何以已種者尙染天然痘症乎。答曰。一種痘之時效。僅限十年之久。過此一遇疫症。仍多懼怯。二、已種痘者其數多。未種痘者其數少。疫發現時。少數之中。染疫者自少。多數之中。染疫者自多。蓋比較者多。非真已種者染病多於未種者也。吾人斟酌於近時天然痘症流行之日。有三事可以證明爲實在。一、已種牛痘之人。若在十年之內。再染天然痘。其人數必較未種牛痘而染病者少。二、設若已種牛痘者。再染天然痘。竟至於死。較未種牛痘而染病死者少。三、可知種牛痘之效力。其最大者則在近數年。後漸減其效力。或問種痘之事。有害於被種之人否。答曰。若牛漿潔淨。刀具亦潔淨。自無害於人。苟不謹慎。一切均有汙穢之虞。則危險矣。血清以防白喉症。此法與種牛痘之宗旨不同。種牛痘在於引導。種血清在於抵制。且所用之漿。係就牲畜已患此病者而取之。因牲畜愈後。抗毒素強。特取出以種於人身。預防白喉膜之發生。本書前云。黴菌入內部。能生毒以致病。又云。內部自生一種抗毒素。以抵抗病毒。但病之初起。毒重。抗毒素又弱。故醫學家探討而出補足人身抗毒素之法。俾菌毒不能獲勝。防制白喉症之血清。現在即取於馬之身。因馬患白喉症時。多生出抗毒素。至於病退。其身內用不能盡之抗毒素。取之而出。與馬亦無妨害。種於人身。

此法行之二十餘年。尚有效力。查倫敦城登記表冊。在一八九零年。未行血清法。患白喉症而死者。十分之三。今行此法。患此病而死者。不過十分之一。此乃證明血清之益人也。

第六章 結核症

結核一症。人民多受其害者。頗爲人類之大敵。英國英格蘭威列士兩處。每年因此病死者。不下五萬人。倫敦一城。每年略有七千人。即中國各大城。患此病者亦不少。但此病若用心預防。非不可診治者。一八八二年。德國醫學家柯克 Koch 表明結核係黴菌所致。此黴菌微小已極。若直徑連絡接吻一萬餘。僅佔一寸長之空間。其微小可想而知。然害人之力量甚多。故結核症皆原因於此。但前篇曾申明患疫病之故。不僅在於黴菌。亦關係於身體之能配合與否。結核病亦然。若遇此等黴菌。身體不能抵制。則發生極速。而強健之身體則不然。雖遇黴菌。亦不發現。按結核病有數種。名稱亦有區別。或生於肺。則爲肺癆病。或生於面。鼻亦剝蝕。則爲狼瘡。 Lupus 生於... 盡。則爲瘰癧。 Scrofula 生於腦筋。則爲腦膜炎。 Tubercular Meningitis 生於腸懸膜。則爲腸間膜炎。 Tabes Mesenterica 此數者。皆爲結核症之一類。但結核症之意。人多視爲肺癆病。因此病多故也。

結核症如何發起及如何傳染。傳染法分三項。一、黴菌由外皮而入內膚。入膚之法亦不少。有因皮肉傷痕。黴菌即趁傷痕以入之者。二、黴菌由口入食管。是蓋由小孩以不潔之物納於口。故物上之黴菌。得以進入。或健康人與病人接吻。由病人之口傳入。或飲食中本有此黴菌。人飲食時。藉以入口。以上皆可

由口以入食管。達於胃上。而病生焉。三由氣管而入肺。查黴菌從此入之者。較由口入者多。但無論如何入內。其害處宜知之而防之。否則受其損害。肺癆症。漸致損壞其肺部。肺病之人。唾其痰涎。內雜活黴菌。殆至痰涎枯乾。被風吹散。灰塵隨帶以散布四周。故四周人吸氣。即隨吸黴菌以入氣管。此所以爲他人被其傳染之故也。患肺癆病者。其原因即由此。至於涕沫亦能散於空氣中以傳人。此害與痰涎同。故宜預防之也。供給牛乳之牛。亦間染是病。此牛乳入人身。亦能傳及之。故衛生局嚴查牛棚以防是病。至於牛乳以煮沸者。始能安心飲之也。

身體結核病之傾向如何。前段曾云結核症。非遺傳之病。多因本身所感受。但可畏者。並非遺傳病。即在出於本身感受耳。夫傾向出於本身之自動。內外有何傾向。內外即有何感應。故使身體較爲薄弱。一遇黴菌。即受其害。茲略說傾向病毒之關係有數項。一本身稟賦。即有此病之傾向。或身有特別弱點。易於接受結核病。如鼻或喉有病時。其吸氣必多用口而少用鼻。不知以鼻吸氣。有可阻黴菌之來路。苟以口而不以鼻。是亦傾向結核病之漸。如癩症。如喉管火。如鼻沫炎。皆用鼻不便。而用口便也。然一用口。而病菌即由是以入。又如人之胸部狹小。難以寬舒。此亦爲癆病之傾向。二房屋部置不善。即有此病之傾向。如黑闇。或溼潮。或不潔淨。或同居人過多。此皆足以致此病。惟陽光普照。能具殄滅結核病之效力。故黑闇無光之室。黴菌必滋生而不已。倘室隅汗穢。渣滓堆積。病毒得以保全。易爲傳染之媒介。且患結核病之人所居屋宇。本有遺毒存留。毒氣鬱結。仍屬有害。故狹小之宅。人多擁擠。不但人易致病。即此屋亦種毒無窮。卒之仍中於人身。故改良居宅爲最要。俾得消滅病毒之本原也。

宗教與社會之體制 (續)

何樂益 黃治基

(乙)又有一種之國教其神爲夫婦考其由來始或國王若家族所拜推之於民遂爲民所共有之神未可知也亦有唯一無二之神較王神之興尤早如猶太國是也此過程由心理學上觀之族長之神似爲神學最末級之進化在森美得 Semite 人中其進化已超越族體制時代而成完全之政體其第一之神意卽其王也推羅之神號爲美加 Melcarth 者或爲其王抑爲邑主皆可推想而得之推羅之殖民亦認之獻以禮物輸什一之稅什一稅者東方王者所宜享也亞門人之神名美江或曰馬江者蓋王之義焉摩押與以色列族皆有之或彼國本有此多數之國神與打非知同歟

(丙)第三種過程而爲混合說(或折衷說)漸合本有區別之神而爲一此等混合無論何級皆得有之惟是國民性識成時或兩國或兩教化合併而成亦容有之此等混合其出於自然乎抑因戰勝而然乎末由稽核矣西阿非利加海岸有由 *Yahweh* 族者有神隍之神(大半卽戰神)亦有土著之神與萬物神併合且合數國之神而神之此國神爲有機能者或自然者如天空電光生殖器等與 *Yahweh* 族神較(芝族卽阿非利加全岸該族之教化視由族爲小)可表由族之神卽芝族之神皆由理想而生者芝族原有無數本土之機能神與由族併而爲一如電神由五六百之多合併而爲一神者此電神地各有一像而其所用禮儀則處處從同矣夫合併之關係足使各土著神之由來因之而失此各土著神本各附一物以爲區別後乃盡絕離其所附之物像合併而爲一神因此過程所附物之主義誰復能知其源流者

如在阿非利加之西岸。有普通之神。不附某物。亦不以某物爲依。在由族 *Tribe*。宗教亦有一奇事。足述蓋此族之宗教。由二級驟進。四級竟越三級而過之。厥故蓋由母系的體制化而爲父系的體制也。

在古希臘。此過程亦同。古希臘各處皆有萬物之神。與鬼及地方神。神之性質皆同。惟同中每處又各有其特別之性質。迨希臘教化進步。各類之神。多加入他處鬼神之性質。而併合之緣。此各處之神。乃驟變而爲尤美而大之巨像。此過程可名爲類聚。亦可稱爲彙集。蘇師者希臘最大神也。又有海神。此二神所在。有之教化進步後。各城邑聯絡一氣。諸神之性質亦遂併而爲一。自是希臘諸邦。幾獨有一神矣。雖然猶有待。就各地之蘇師。而論。人不惟重其本土蘇師之性質。亦有加他處蘇師之性質。而融合之者。以此各處之蘇師。守其個體之性。亦有特別之號。如在 *Aradia* 曰蘇師路開阿。 *Tykaos* 則殺人以祭。曰蘇師都波羅。 *Trophonios* 則在洞事之。曰蘇師美李可。 *Melichios* 則或以爲人。或以爲蛇者。以上所舉之蘇師。乃證明其各具特別之性質。每處改換蘇師之概念。則依其所影響。其影響則蘇師所在之處。爲尤大。且各地本土之蘇師。亦受普通蘇師之影響。而改換焉。又有此處地方神。與他處地方神。或化合。或改頭換面者。是皆或有之事。然如在 *Oropus* 之蘇師。民直以爲是特殊之神。與普通之蘇師。無涉矣。甚矣神之統一之難也。

戰勝他國之民。而使其神併而爲一。且徵一事。加母拉比 *Khamurabi* 在西歷前二千四百年。戰勝歐法拉河谷。

(未完)

工程學要義 (續)

王漱石

第四章 灌溉大計畫

數年前某地學雜誌刊布威卡克氏所著米索不達迷亞灌溉之計畫世人靡不注意此事越數日冒克尼夫君乃有威卡克君傳略之作刊於雜誌之內其中稱揚威君之工程上經驗實勝已萬萬茲亦不復贅述即如前章中所述尼羅河之工程文中各節即足爲威君工程上成功之明證也其灌溉米索不達迷亞之計畫略述之如下當威君既應土耳其政府之聘乃於籌畫計策之前先從實地測驗米索不達迷亞之地位情勢着手測驗既畢威君對於土耳其政府所獻第一計畫爲先免除阿付臘底斯河氾濫之厄然欲免河水泛濫別無他法惟鑿通支渠以洩水勢乃定洩水於古匹松河之計畫焉威氏計此次工程開鑿之費共需三十五萬磅但威氏預計功竣之日可耕農田較前當增二倍其出產之麥則當較前加增三倍則所得效益固非常之鉅也

威氏第二計畫乃欲於底格里斯河及阿付臘底斯河之間鑿一大運河計此河可灌米索不達迷亞良田三百萬英畝蓋底格里河及阿付臘底斯河之間白格達城西北一帶地勢低下如阿卡古湖水淺之時湖面不過四十英方里湖水汎濫湖面或超越三百英方里焉湖面較阿付臘底斯河低三十五英尺較之底格里斯河低十英尺阿付臘底斯河水乃由沙那威亞以入湖中故即欲利用之以爲中間之運河如此則阿付臘底斯河及底格里河均有所制遏矣阿付臘底斯河工程頗爲易易僅需於沙那威亞

間。加。以。壩。功。以。防。水。勢。汎。流。入。湖。於。沙。那。威。亞。阿。付。臘。底。斯。河。下。流。築。堤。設。閘。水。大。之。時。阻。回。水。勢。使。不。踰。其。常。度。焉。

底。格。里。河。工。程。則。稍。爲。困。難。矣。白。格。達。之。北。部。河。身。較。湖。高。六。十。英。尺。欲。築。一。壩。由。壩。之。上。流。引。一。運。河。以。灌。田。土。而。水。又。可。洩。入。其。中。如。此。則。湖。中。不。致。生。洪。水。汎。濫。之。患。焉。由。湖。再。引。一。大。河。旁。於。底。格。里。河。之。右。岸。焉。

故。阿。付。臘。底。斯。河。水。汎。濫。之。患。已。得。如。何。防。止。之。策。而。運。河。左。岸。可。作。爲。大。堤。以。阻。底。格。里。河。水。之。汎。濫。如。此。乃。可。設。一。鐵。道。以。爲。被。灌。沃。土。生。產。之。物。運。出。以。供。世。界。各。地。之。所。需。要。焉。

由。此。計。畫。此。湖。將。或。爲。一。大。濾。器。蓋。河。中。泥。土。甚。多。與。田。土。又。無。益。處。今。河。水。洩。入。湖。內。底。格。里。河。及。阿。付。臘。底。斯。河。中。之。沙。土。皆。沉。入。湖。底。清。流。汨。汨。皆。南。下。以。作。灌。溉。之。用。矣。豈。非。一。大。效。益。歟。非。特。此。也。此。計。實。行。之。後。工。成。之。日。灌。溉。之。地。有。六。百。萬。畝。其。結。果。每。年。世。界。中。增。產。一。百。萬。噸。麥。一。百。萬。噸。棉。花。數。百。萬。頭。羊。及。若。干。家。畜。焉。以。如。斯。之。出。產。則。出。口。貿。易。必。然。興。旺。威。氏。乃。備。爲。籌。畫。曰。可。敷。設。一。鐵。道。由。白。格。達。以。達。巴。勒。士。登。海。岸。焉。

威。氏。乃。又。於。某。雜。誌。中。詳。密。論。證。其。計。策。云。西。歐。雨。水。豐。多。如。此。工。程。原。難。實。行。但。乾。燥。之。地。則。不。如。是。如。巴。比。倫。昔。受。水。患。而。卒。成。建。治。河。之。法。以。底。功。成。現。今。余。對。於。灌。溉。米。索。不。達。迷。亞。之。計。亦。深。信。其。將。來。必。有。成。功。之。一。日。也。但。威。氏。之。計。終。因。土。人。反。對。乃。未。得。實。行。焉。

吾今將述澳大利亞洲引水灌溉之計畫焉。澳洲政府對於河道工程原頗注意。農人亦多有抱改良之意。某歲澳洲大旱。人畜死者無數。災况之大。可謂澳洲歷史中所僅見者。於是政府之人乃愈以修治河流。謀爲灌溉之事。其中一重要動力。尤以發見金鑛一事爲甚焉。澳洲西海濱。距弗蘭曼脫海港三百六十三英里之遠。有靠格底者。發見金產甚多。但該地缺乏雨水。夏季炎熱之時。人幾無水可飲。故經此地者。蓋罕有其人。偶有一二探險家。經其地者。人莫不詫其勇敢可敬焉。既發見其地出產金苗。人民乃亦不顧危險。爭趨是地。而是地之缺水。則如故也。政府乃籌畫維持之計。掘池築堤。以蓄水。然其結果。不過使水價較前稍賤。昔日每格倫值二先令六辨士。後每千格倫值七十先令耳。當時亦建築鐵道。但因缺水之故。至夏季酷熱之時。鐵道一日需水之費計一千萬磅也。雖有人設法掘地求水。然掘至三千英尺之深。亦未獲涓滴之泉源也。

在一八九五年。林約翰君至此產金之地。考察考察。既畢歸國。乃宣言彼設一唧水。至產金之地之法焉。至一八九六年。林君乃著一說帖。述其籌畫之法。乃建一水槽。聚弗羅曼脫附近之海耐那河之水。然後每日唧水。至卡哥那及靠格底。至一八九八年。立法會議。乃通過此條陳焉。其第一要事。乃保全所唧得之水。距佩斯約三十英里。有二大港灣。海耐那河水。卽經是處。乃定意卽於是地築堤。以混凝土堤障。回河流。因水槽中欲容水甚多。故堤基深百英尺。其寬由八十五尺至一百二十英尺。往上漸尖。至寬十五英尺焉。

所用之管極大乃用以唧水者也各管有二十八尺長由四分之一英寸之鋼板製成直徑三十英寸每個重一又四分之一磅共七萬個以備運水往各地之用管式頗異各管均由二個半圓部分合成以水壓機器使之強固結合管有極大伸縮力故當各管應用之前均加以試驗以驗其能否每平方寸受四百磅之壓力焉以如此容積其數又如此之多之管其運送之費蓋可知矣

按原擬每日唧水五百六十萬加倫管徑三十寸則一日以二十四時計算經路約三百三十英里則管中之水每秒應行二尺共建八站今述其工作情形如下由第一站至第四站各站設三唧水機器及三汽灌各機每二十四小時皆能唧水二百八十萬加倫首高四百五十尺故二機全量之水唧入大管之內其一管內之水供預備之用由第五站至第八站各站設二機器各能於每念四時中唧水五百六十萬加倫首高二百二十五尺故一管供唧水之用一管以供預備之用第一站設於附近海耐那河堤根之地水上升四百二十一尺入於一混凝土製之槽中槽能容四十六萬八千加倫水設於第二站內此站距首站一英里半由第二站所出之水唧高三百六十尺約經二十三里之遠入於一混凝土製之槽此槽能容五十萬加倫乃由此又入一槽槽仍容五十萬加倫距原槽十八里低於原槽九十四尺水仍往下流又入一槽內容一十萬加倫水距海耐那河已七十八里各站備一混凝土槽此槽作用乃兼受與吸之作用者也由代大尼地(第八站)水流入一槽槽容一千二百萬加倫至此水乃入於儲水池而分散本地以供應用矣

(未完)

近世科學思想概說

王漱石譯

吾人對於飛動之電子。當然假定其爲由負電感應之分子。蓋彼與負電極相反撥也。此事可由多法證明之最簡之法。如電子受磁力之引力。生有方向。吾人卽由此方向以證明之焉。

銀行之中。計算出入金幣之數。誠爲一至繁之事。然銀行職員爲之殊易。蓋彼等簡便之法。乃取所有金幣而權其重。知其全重。則知其含某分量之幣若干數矣。吾人若仿此方法以測日中或屋中微塵之數。則毫無價值之可言焉。愛忒開氏曾發明計算日中微塵之數之法。吾人可假用此法以計算電子之數。此法已經實驗知爲可行焉。

吾人既能計算電子。則更可得其他成績。論及此等不可見之分子焉。例如吾人由試驗可易測定由某量電子所生已傳電氣之總量。既能計算有若干電子。則以簡除法卽可知各電子所生之電氣量矣。至電子乃含有負量電氣。吾人業已明悉。則吾人亦卽知所生之負電氣之量矣。

若於一空管中測飛動電子飛行之速。及其最大速力。誠爲困難之試驗。但近已設一方法。乃使電子流受磁力範圍內感應之力。及受電力範圍內感應。則電子之速力殊易於測定矣。

故吾人由試驗知飛行電力之速。因一定之狀況而改變。如有一管經電氣放電。電子乃由管之極端陰極射出。則電子之速力自然依電氣放電之密度而定焉。由此乃更可認定其速力亦依於管中真空之度數而定焉。蓋留於管中之空氣分子。立於飛行分子之路上。能妨礙之也。若管中空氣並未抽盡。則電

子之速。每秒有五千英里。以此速力較鎗彈之一秒僅行三分之一英里者。誠大莫與京矣。然電子之速力則決不以此爲其極度也。若以一真空之管。則電子之速力每秒或六千英里。幾約電之速力之三分之一焉。如此速力。誠艱於想像。然吾人可擬其如以一秒鐘橫過大西洋。或以不足四分鐘之時。已由地球達於月焉。但吾人應知吾人並不能以此速力射電子。使之橫越大西洋。蓋此乃吾人由真空玻璃管中所得之成績。非真空則不能如此也。

故吾人常發生一疑問。即電子是否能飛過空氣中耶。此問無待詳思。可知吾人非得真空之管。決不能引一電子之流。吾人僅可由電氣卵形器中引出空氣時。則電氣火花變爲光輝之線。最後乃成爲幾不可見之陰極光。此即飛行電子也。當吾人見陰極極端以最大速力射出電子之時。則見玻璃管之端阻止其前行。則吾人能否製一玻璃管。電子可飛過管端入空氣中。此事之決難實行。蓋可想見。原管端既能任電子逃出。則亦必任空氣侵入。而管中已非真空矣。但此言雖似合理。而事實上又有不然者焉。李納耳特氏曾製一真空之管。此管不使空氣侵入。而聽電子之自由飛出其管端之形。宛如一蓋。乃由極薄鋁金屬片製成。當電子在管中飛行。既至管端。乃並不停止。直飛入空氣中。但電子既難目見。何以知其飛出。蓋吾人雖不可見其飛行。而可見其入空氣中之痕跡。當電子方飛過管端之時。原遇有周圍空氣之大抵抗力。空氣中分子受此不可目見之彈攻擊。乃生暗淡燐光。但此光甚小。僅鋁管近端之暗中見之。若由此管復入真空管。則光將甚大。雖然若用燐光遮蔽物。其發見之像空中亦可顯見之焉。(未完)

雜纂

說美國農業推廣部

金陵大學農林科教員鄒秉文

振興農業之事有三。一曰農業教育。二曰農業試驗。三曰農業推廣。農業教育所以造成農學人才。農業試驗所以發明農業新理。而農業推廣則以農校之所講授者。農場之所發明者。普及之於一般農民。以促進農業之改良。此三者實相輔而行者也。吾國於農業教育及試驗。已略具萌芽。而農業推廣則尙賦缺如。去年之夏。始有人於江蘇省教育會提議及之。茲篇專言美國農業推廣部辦法。以備熱心農業者之參考。

美國推廣農業之機關。其在中央政府者。則爲美國之農部。農部分司凡二十。如植物實業司。畜牧司之類。就中以各邦聯絡部 (State Relation Service) 通問部 (Office of Information) 賽會部 (Expert of Exhibits) 印刷部 (Publication Department) 貿易及農鄉組織部 (Office of Merchant and Rural Organization) 與推廣農業有密切之關係。其在各省則有各省之省農業司。與省立之農科大學主其事。美之農科大學。其大者。對於農業推廣。皆於校中特設專部。可謂知所要矣。其在人民之推廣農業。則有各種農人所組織之農會 (Farm Bureau) 司其事。此項農會。大多受中央政府及本省政府補助而承其指導者。

美國農業推廣部之事業辦法。就其事業辦法而論。可分之爲四。一曰文字之農業推廣。二曰演講之

農業推廣。三曰實驗之農業推廣。四曰俱樂部之農業推廣。

文字之農業推廣者。以文字普及農學知識及改良農業之謂也。其在農部。則有四種。曰年報。年出一冊。厚五六百頁。專以記載農部每年所進行事務之報告及各專家所研究之文章。曰農業研究月報。月出一次。載有各項之短篇研究文稿。專為與各科學家互相切磋者。曰農部短刊 (Departmental Bulletins) 專以報告各種農業之研究。以備農夫及農學家參考之用。計於一九一五年中。此項印刷品。共出過一百六十八期。每期印二千至四萬本不等。至其頁數。則每期自數十頁至百餘頁不等。曰農夫短刊。與前無甚殊別。惟極其普通而簡明。專為農夫參考之用。其頁數至多不過數十頁。計一九一四年共出過一百七十六期。每期印二千至四萬份不等。此外則各省有各省之農場報告。就其文章之深淺而論。約可分為二種。一則曰科學的報告。議論較深。非少有農學知識者不易明悉。一曰通俗的報告。則專為農夫計者。美國聯邦凡四十有九。每邦有農場一或二或三。以每場每年出印刷品二十種計之。則美國各邦之農業印刷品。每年當不下九百八十種。加以農部之三百三十二種。則得一千三百二十種。每種以印一萬份計算。則年可得一千三百餘萬冊。一概送閱。即郵費亦無須自出。故散布於農人中。極廣且易。不僅此也。一書之成。動需時日。而農業知識之散布。有時尤貴神速。故美國農部在一九一三年特於其部中設新聞通信部。專以普及農業知識之新聞。遍登通國之日報及星期報。計第一年中寄登各日報之新聞。凡五百十二次。而寄登各農鄉星期報者。每星期自十張至二十張不等。統計美國各報每月登有此種農業新聞。在二萬五十萬頁以上云云。

英美之禁酒

愚公

歐西人士多半嗜酒。其害甚大。歐戰期中。各國政府以及人民。乃愈感酒之爲害。既以法律禁止之。人民亦各本其天性。互相禁戒。酒之貿易。乃爲之銳減。現各國仍力加禁止。吾人可預料有種種地方。酒之貿易將永遠不能恢復。其以前勢力。蓋今日反對酒之勢力極大。人民昔日原因道德上觀念。而反對酒。今乃重之以經濟上觀念焉。昔日稱飲酒者爲狂醉之人。其反抗酒之武器。爲訓言。爲宗教上之言論。今日稱飲酒者曰中酒毒之人。其反對酒之武器。更僕難數。禁酒會中。明訂章程。街衢布以廣告。以及身體保險之檢驗等。莫不注意人之嗜酒否也。

英國之禁酒。禁酒一事。初僅限於數地。今已徧布世界。而今日使各國厲行此種政策者。則嗜酒之人。多爲敵之偵探。故英政府決意對於製酒賣酒業者。皆加禁止。其意實以當此戰爭之時。不謀食品。而人尙營此狂醉毒劑之業。豈不有若瘋顛英之婦孺。亦莫不痛恨此事。亦以使無力戰鬪。醉酒之人。而使身處火線之下。是枉送人之生命。英人某君。有一信曰。現今僅有一工廠。即造酒廠是也。余觀今日營酒業者。其得利既巨。營業亦異常發達。吾一月以來。家中無生火之煤。蓋因礦工鐵道。皆較往日所需加多。吾乃無地可得此物。而觀之製酒廠中。則煤車川流不息。以入廠內。彼廠主人語余曰。余人從無忙迫。如今日者。余等固不計及酒價之如何高也。總之。德人以全力謀英。乃成英禁酒之志。今且欲使嗜酒之人。既經禁酒。必能自盡其力。爲國效力焉。

美國之禁酒。禁酒之故。乃因酒既有害衛生。復虛糜金錢。歐戰期中。交戰各國。固然如是。即中立各國。太平之時。亦如是也。此美國之所以熱心禁酒之故也。合衆國各邦。中賣酒一業。大半作爲違法之事。禁酒之法。甚爲周密。各村各市。皆禁開設酒肆。故美國已藉各地方之熱心毅力。以禁酒。酒肆不復能受法律上之保護。經如是種種合法行爲。禁絕酒肆。自可定爲永遠之制。然其中困難之點。則未禁酒之邦。酒尙私運入於已禁之邦。欲防此害。則非合衆國政府統籌全國以禁止之不可。而合衆國政府於此。亦有難焉。此邦禁止製酒賣酒。而他邦則許其營業。豈非一困難之事。一八九零年。威爾生法律。乃將昔日凡販酒之商。以原來裝盛之酒箱酒瓶。並未經更動者。雖在禁酒之國。亦可出售。之制。廢止。至一九一三年。國會中又立一制。凡由一邦運酒至他邦。此酒乃激烈之品。則無論何用。無論另裝與否。苟背此邦法律。均禁止之。如此。乃剝奪列邦中烈酒貿易之權矣。此律未行之前。酒亦如其他商品。其由一邦運往他邦也。亦作轉運商品。達其所至之地。今則若察出爲意圖售賣之酒。則可以沒收之焉。

禁止之法律。尙不止此也。另又立更嚴之法律。由國會中提出議案。凡販烈酒。除作聖餐工業醫藥用品等外。無論何人。皆犯刑事上之罪。故此法較以前所訂者。均更加嚴矣。凡禁酒之邦。得此。乃增加勢力。觀通告各邦之言曰。若各邦有於本邦之內。原禁製酒售酒者。則可完全禁止酒之輸入。各邦得此法律。則較一九一三年所訂之律。勢力更加鞏固。限制之力更大焉。

雖然禁酒之律。仍將有進未已。全國禁止。並非無望。蓋美國先有各地方之禁止。乃蔓延爲一邦之禁止。

則由各邦之禁止亦必可蔓延爲全國之禁止也。

無論何酒均爲少益之品。現今所採禁酒之法律對於酒之性質何者爲可製造可販賣者何者爲不可製造不可販賣者似仍含有不善之處。蓋如此乃開方便之門擾亂之處也。以著者之意此分別僅當就純粹醫學用品言之。僅當一定百分之數超乎此者有作爲飲料之用品者均作爲違法之品焉。

運動法

莫安仁 王公潔

野外遊行

近年以來野外遊行之事頗爲衆所嗜好。其所以能如此者未始非自行車家注意此種戲之所致也。行李之重量容積皆務求其輕便。如此彼遊行家之運行自由車也。乃靈便如常。遊行之快樂生活毫不爲其所累。夫野外遊戲之有固定場所者。用具之量多而且備。自屬甚善。但有若干之人願擇最愉快之地點留駐其處。以消磨其假日者。此亦人情之常。而攜帶輕減之行李於自由車移動良便。此固足使青年活潑之人增其遊行覽勝之興趣也。又遊人搜尋旅館客店而居住之。常足發生厭煩。而個人自攜棚帳而遊行。則隨地可以休息。自由殊甚。而生活之費用亦不過每日一二先令爲止。蓋其所支出者簡。而其所享之快樂利益則甚宏也。

本篇所論者。注意於乘自由車之野外遊行。蓋野外遊行之人。有大多數皆輕其裝束。用自由車爲其遊行之運物器具也。至於多人遊行及遊行之期間延長。至於一二星期以上者。或駕輕舟。或馳摩托。亦所

常見本篇所論與之有關者亦復甚多焉。

茲列述初學者所當注意之模範行李如後。

每一人所用之輕便行李。簡單之帳篷附以繩索機件及木釘等物。棒桿。地毯其質料須求其堅固。鴨絨毛所製成之臥褥或鴨絨毛所製成之睡枕。煮具與鍋壺酒精爐蔽風之物及酒精罐。小號之鋁製油煎鍋。帆布製成之水桶。飲食用之杯盤匙刀等物。鋁製裝調味物之具。單麵包麥粉及茶之三罩具。臥枕。繩索袋籠具及皮帶。統計以上各物之重量約在九鎊半至十鎊之間。若用普立摩司之火油爐則當增重一鎊焉。

較爲完備之行李。格普塞式之帳篷或附之以繩索。繩機件及木釘等物。棒桿。爐具所用蔽風之物。地毯及羊毛製成之鋪地氈單。臥褥及鴨絨毛製成之被。爐具支柱及煮具。酒精罐。煮鍋及油煎鍋。杯盤刀匙叉等飲食用具。裝置牛油之具。實用之豫備袋。盛糖之器。盛皂之器。飲牛乳用之杯。帆布製成之水桶及盆具。臥枕。繩索袋籠具及皮帶。以上各物統計較輕便行李所包含者爲重。全重量約在十八鎊之內焉。

增一人所應增之物件。臥褥及廣大之鴨絨被。杯盤匙刀叉等飲食用具。臥枕。籠具皮帶等物。統計所增之物其重量約在三鎊之間焉。

其餘各物。妝飾用具。茶壺。通常用磁製者。蠟燭及安置蠟燭之臺具。手巾及檯布等物。洗浴用之服飾。雨衣及護膝等物。橡皮製成之禦雨套鞋。裝鞘之刀。應用之肥皂。火爐上挑刺之用具。烘炕所用之器具。紗綢及銅鐵絲製之網布。茶之灌貯用具。以上各物若爲行裝之完備起見亦可攜以應用。惟重量則當然有所增加已。

文苑

雨中葦灣觀荷口占志喜

仁和吳觀禮

秋心無限託蒼葭，碌碌車聲出郭斜。
潤到遠香清一抹，恰從看雨後看花。

桑麻滿地自荷陂，縱目荒亭有所思。
億萬生靈仰膏澤，莫辭聽過雨喧時。

昨朝生日綺筵開，詞客珊珊故後來。
萬斛瓊漿作芳醕，爲花更勸碧筩杯。

灑袂風聲似綠荷，菰蘆鄉思入秋多。
生慙賀雨詩情蹇，不逮吳儂打槳歌。

女牆一角枕陂塘，鏡對菱花儂曉妝。
頗憶寺門香夾岸，滿身風露拜錢王。

酬謝舍人時將游太原

兼旬譚藝破羈愁，真積如君況遠謀。
豈意同年垂卅載，始覩早日命千秋。
風雲晚霽翔皋鶴，烟水初涼狎海鷗。
爲問黃金臺故址，夕陽無語共句留。

伐蛟無自問山虞，早魃蝗蝻更載途。
世事寧惟勞瘁歎，吾曹頗復耐飢驅。
文章供養煙雲積，哀樂銷磨歲月徂。
我愧繁霜滿鬢髮，君

珍舒景未桑榆

山行觸熱念車中，會短離長恨况同。
留與多情武夷月，若爲方便石尤風。
照人古誼精神注入坐，吟身夢寐通我憚。
乘桴君不出，可無游約幔亭東。

平生知己相敦勉，師友之間定幾人。
聞道已遲還惜別，所思在遠復經春。
一寮風雨今猶舊，三晉雲山主與賓。
因君並叩高書記，佳句如何便入神。

舍人臨行口占送別

瘦骨迎秋減帶圍，銷魂遠道送將歸。
臨歧強就陽關曲，更乞香理玉徽。

送君匹馬度盧溝，萬里長風一鴈秋。
縱復登高休望遠，浮雲終古使人愁。

家柳叟招同人重游葦灣用伯潛韻

積雨蘇百葦，游侶催蠟屐。行途避行潦，彌望足膏澤。
灌木蔽女牆，西南窺深碧。聯翩出郊坰，邈迤識畦陌。
山翠豁新霽，青眼向坐客。似傲真率交，跌宕據几席。
朱華耀晴曦，嫣然悟疇昔。薄莫振衣歸，清風送兩腋。
瞻言素心者，相將數晨夕。

七月四日招同人由天寧寺至北河泊觀荷仍集葦灣余撥

柳叟登舟遠橫兩人牽連墮水篇中戲及之

尊收肅澄景百鳥喧曉晴攬衣獻儔侶復此出鳳城山靈遮道語
語余且北行遠香宵始縱益使埃壙清華實自並茂寧必人知名
少憩招提境沿緣達平汀芰製動今羨蘭橈追昔情遐討擬散髮
清尚希濯纓壺觴未從徑遠造葦灣亭妍花相視笑相視顏俱頹
怪余夙止酒胡爲含微醒誤叩水僊闕蹋破雲母屏仙人怒狂客
澆波亟拄撐同儕笑舉罰吾頑含盡觥重訪舊相識真率肯忘形
灼然侶首肯解佩紛瑤瓊乍若草廩士丹赤一已傾春蕙昨田田
秋蓮修盈盈持登王母席與子祈遐齡談諧日漸下斜景穿碧櫺
偃仄循菊畦扶疎經豆棚臨去時願賞尙恐有遺英

再用前均簡柳叟

吾宗侍御天骨奇翫荷縱步彼澤陂有蒲夾波纖輓碧簾涼錯認
黃琉璃靈妃肅客乍延入驚起鴛鴦翔後集居然攜手賦同行君
之餘潤能波及浮空澹蕩鱗堂闕仙人水室無纖埃西池上壽進
蓮子似聞殿上呼朔來却思造物意難測寶劍豐城終拂拭直臣
精氣徹九淵波光乍紅風不黑明鏡忽破山上山手引屈子還葦
間亦愁塵俗羨晶闕要殊衰老淹玉關連宵冷露垂珍珠鵲橋七
夕仙靈趨爲問河漢水清淺年年還有風浪無雲耕會看天孫至

好取荷杯共將意侍御不溺奈愁何富貴壽考庸庸多

七夕詠古

昔年璇宮夜語時漢皇舉男神武姿阿嬌夫婿湯餅日金屋長門
寧豫期李夫人合蒙嬖幸可憐死別逾生離英雄分異兒女子好
大喜功須有爲夜月機絲愁化石却看習戰昆明池樓船伏波下
南越藏君蒼海臣東夷詔求將相才異等能使絕國宜次之張騫
告歸贈底物此意早被君平知甘泉長楊從羽獵坐惜六宮機莫
支承華殿上接王母如何恭儉忘相規玉屑枉餐仙掌露傷心方
士爾庸醫

東鄰曝衣狐腋集西鄰曝衣貂錦襲文章黼黻更爛然終日七襄
慚不給雲中下視諸阮庭光掣華裾斜照入危竿高挂幘鼻禪阿
咸爛漫不收拾鯁生大拙謀生疏乞與機巧嗟何及有梭擲付牛
衣妻無錢買絲祇羞澀秋風萬戶寒無襦邊庭苦催礪杵急八紘
衣被煩經綸天孫何計與補緝仰天曬我腹中書蠻府參軍餘袴
褶

黃金爲罽白玉壺方平七夕招麻姑蔡經老饕腹背張搔癢能受
神鞭無殺板傅土粟苗細瓜盤刻翠花瓣蠶人間供張太不臆今
年况乃田園蕪穰山王子控鶴去安公赤龍不可呼願求辟穀出

塵世帝女尙鑒誠區區憤分餘巧作狡獪擲米何苦成珍珠麒麟
驀脯酒闌未肉糜行乞仙家廚

人間良會數今夕離病憂患多間隔不如天上相見歡歲歲鵲橋
駕空碧豈有毒龍噓陣雲更無蟻痕在胸膈銀河不愁風浪生羨
煞長安酒家客青鳥難傳思婦書知望紅橋情脈脈刀環有夢落
銀州或恐射雕去沙磧旅人此際幽怨多未暇張筵薦肴核匏瓜
獨處鎮相望欲往從之無羽翮重逢休賦入夕詩變徵聲填天地
寒

送仲勉歸閩

海涵地負才成聚特啓螺洲篤世家舊德洪媿知有幹少年厚重
故無瑕名山積土翹隆棟大冶鎔金就莫邪青眼高歌離恨促不
勝瞻矚在天涯

長天秋水靜波瀾開拓心胸得大觀悱惻恩推胞與廣馳驅力任
歲年寬莫矜傳世空談藝要使匡時總耐官十載元方忠謹鬱共
儲舟楫濟艱難

星斗南

斗南一人大星墜內訌外寇乃馴致帳中自呼星斗南騎箕天上
迴戎騁平生未快屠鯨手力挾豐隆海西走島夷千載未祠神遂

震威靈薦圭宙中奉歷朝天可汗惟一个臣在廡右寫金教識麟
鳳姿覆孟肯攬蒲萄酒漢民掠買歲幾千惟神護持撫摩久豈無
虐死爲鬼雄會當搏噬奮功狗吁嗟乎男兒生不遑請纓死將叫
閻與帝爭不共戴天寧反兵穢人何物來要盟衆仙排雲孰可使
須駿馬監傳介子龜茲就戮匈奴臣笑斬樓蘭目壯士靈旗旣下
犁鞦城視我將星東北指朮赤遺封生虎狼包藏禍心越疆理神
力驅除冰海頭銅柱拓邊還萬里異姓藩開奇渥温世扞牧圉承
皇恩聲教四訖彌海垠一洗諸派婆羅門神兮歸來配丞昝丹青
自有凌煙閣

蜀兩生行

石城山頂窺峨眉胚胎靈爭幽奇岷源水入錦江碧奔流到海無
盡時兩生生長山水窟合有清氣相扶持我知兩生名初未識兩
生五色動眸子雙壁誇連城青鸞鑿羽大鵬息黃金之臺高不極
有才自與歲月深里閤何殊在京國但令每飯念宵衣莫辭三載
聊家食炎曦嗚人行路難十旬羈滯猶長安長安冠蓋富豪俊事
賢友仁良所歡喬生好客肝腸熱門限將穿眼森鐵與人媿媿不
忘規言泉噴落離堆雪毛生廣坐兀徘徊階如石筍撐寒梅閉門
頌酒自孤枕夢吞溟渤杯中來一盞一照頗殊致兩人測交敦古

誼攜手同行胡弗徐投詩話別憂時事九州饑饉流民多况聞苦
早家書至焚滅搖芒室壁間仰視太陽麗天驕斗車憑戴筐騎衛
信環侍霧縵升降豈有徵楡桂參差且循次汝今涕泣悲路歧我
剩淒涼已無淚望雲羨汝共言歸坐令兀兀吾心醉不敢嚼杏矜
談天爲汝少損摩兜韃般憂啓聖瞻昔

先帝中興方冲年采芑江漢翰師旅騶虞麟趾依親賢拊膺玉几
迭霜露天荒地老愁神仙

宣仁堯舜終乾乾所嗟中外多備員及今英劭爲時出奮發猶可
追先轍行矣各自愛劍氣騰星躔願友天下士更攬形教全南下
吳淞叫精衛西入夔巫號杜鵑山澤崇朝有霖雨畎畝要在能力
肩余生早衰盼雙杖道逢叩竹煩留連

送張大令(佩經)之官浙江時尊府君提刑公入祀名宦祠
浙西官閣鯉庭陪報祀新傳奉救回不葬桐鄉依帝所終編箬嶺
惜公才去思此際尋碑讀坐處他時避席來爲憶華亭臚治行伯
兄名亦上容臺

八月十四夜

液池今夜月天地又雙清桂子何能落菰蘆空有聲相看自圓相
未忘示冲情幻景鏡雲水惟應徹底明

耳鳴

珊瑚仙佩下墀城握手花間理玉笙話別耳鳴紅暈頰教儂休說
許飛瓊

將乞歸示同志

別離在俄頃一刻逾千金茫茫百端集匪獨悲牙琴白日自天上
浮雲且勿侵神仙諒虛語忠孝珍素心但恐同志少終苦力弗任
掉頭已巢父淮南秋漸深不見空中書祖筵酒重斟酒酣論古事
涕淚沾衣襟圯上一謀面赤松何日尋僧寮芋初熟未解長源簪
炊梁不就枕息羽寧入林歲月積薪暇陟屺思故岑瞻言審出處
所願加砭鍼踟躕乞片語坐右以爲箴

別意

誰言出手國醫難藥我真能見肺肝孤負鍼盲無限意一編未乞
訂叢殘 汝翼

相逢都市昔年春親面寧知我意親人海茫茫自來去最難割捨
在情真 剛侯

踟躕勞謙不自由誰知皮裏有陽秋陶公百變殊勤苦勵志何妨
第一流 介軒

成童詩酒早淋漓落拓年來作畫師卅六光陰足珍惜晝長須有
閉門時 詩孫

養一齋詩話

山陽潘德輿著

黃氏生謂六朝好擬古往往無其事而假設其詞杜詩詞不虛發必因事而設此即修詞立誠之旨王氏士正謂新婚無家諸別石壕新安諸吏哀江頭兵車行諸篇皆樂府之變也滄溟詩名冠代祇以樂府摹擬割裂遂生後人詆毀則樂府寧爲其變不可以字句比擬也明矣諸說皆可與蔡氏之論相證合總之杜有樂府而無樂府無樂府之樂府乃樂府真處而非後世所可及也又沈氏德潛曰唐人達樂者已少其樂府題不過借古人體製寫自己胸臆耳未必盡可被之箏絃也据此則後世詩人本宜自擬一題詠歌時事沿襲舊題情理未篤故余竊謂杜之樂府非變也真也今之好沿樂府題者非古也僞也若于鱗之比擬字句更不足笑矣沈氏德潛曰蘇李十九首以後五言所貴優柔善入婉而多風少陵才力標舉篇幅恢張縱橫揮霍詩品又一變矣其爲國愛君感時傷亂憂黎元希稷禹生平抱負無不流露於楮墨中詩之變情之正也新寧高氏列爲大家具有特識按李于鱗謂唐無五言古詩而有其古詩蓋言唐人之五古與漢魏六朝別也王元美遂謂杜長篇曼衍拖沓於選體殊不類又謂五言選體太白以氣爲主子美以意爲主太白多露語率語子美多穉語累語置之陶謝間

便覺不倫乃欲使之奪曹氏父子耶王貽上亦以于鱗元美爲定論而謂唐五言古詩杜甫沈鬱多出變調愚皆以爲不然李之古風六十首直追正始以前其才力更在射洪曲江而上昔人旣以復古許之不待言矣杜之短篇有建安氣骨者昔人屢言之今亦不縷述即以杜之長篇論北征一作謂與風雅相表裏可也況漢以下乎奉先詠懷一作非即蔡文姬悲憤之規模而又超出其上者乎且焦仲卿詩贈白馬王彪詩或千餘字或四五百字皆非寥寥短章故胡氏應麟謂杜之長篇敘事有漢人遺意乃于鱗元美貽上等第以選體之清婉簡淨者號爲古詩而忘漢魏詩之犖犖大者遂覺杜公之恢闊嶮嶮創此變調耳確士亦不敢定爲漢魏以來之正體而轉尊之曰詩之變情之正此與高達禮不敢目爲正宗而別以大家尊之同一遷就調停之見而不自知其眼光纖仄也且天下文章有非正宗而足爲大家者耶名目瑣碎而無理解徒成笑柄耳確士以爲特識何哉至統李杜之全集以觀露語率語穉語累語誠間有之然徑謂其五古病率坐此不足以爭衡陶謝更不敢望曹氏門庭立論之果敢而無忌莫此爲甚矣況杜之似選體者正復不少概謂變調杜亦不受也夫子鱗元美貽上確士皆詩家之錚錚者而議論之沿訛習謬乃如此此無佗徒就

成見以立言而蔽於所不見也是故特識未易自許亦未易推人也

胡氏應麟曰七言古初唐以才藻勝盛唐以風神勝李杜以氣概勝而才藻風神稱之加以變化靈異遂成大家又曰李杜歌行雖宕逸沈鬱不同然皆才大氣雄非子建淵明判不相入者比又曰李杜之才不盡於古詩而盡於歌行又曰李杜歌行廓漢魏而大之而古質不及按胡氏論七言古以李杜並稱大家頗有見地不似漁洋論七言古詩獨推老杜橫絕古今同時大匠無能抗行而以太白與嘉州並稱也然李杜分別處言之尙不詳駁予考弁洲云李杜歌行之妙冠於盛唐詠之使人飄揚欲仙者大白也使人慷慨激烈欲絕者子美也確士云七言古詩李供奉鞭撻海岳驅走風霆非人力可及爲一體杜工部沈雄激壯奔放險幻如萬寶羅陳千軍競逐天地渾奧之氣至此盡洩爲一體分論兩家各肖其妙較胡氏爲勝雖胡氏亦嘗分別李杜之歌行曰闔關縱橫變幻超忽歌也位置森嚴筋脈聯絡行也太白多近歌少陵多近行此又不免強別歌行以狀李杜耳且李杜才不盡於古詩而盡於歌行尤不然詩各有體體各有才才各宜盡謂李杜之才不盡於古詩齊子建淵明歌行絕少其才猶有未盡者耶無怪乎謂

子建淵明與李杜爲判不相入也無怪乎謂李杜七古靡大於漢魏而古質不及也蓋胡氏以貌論詩不知古詩歌行貌分而才一故亦不知豐約文質貌異而神融殆所謂皮相之士也耶至張氏篤慶又謂初唐七古轉韻流麗動合風雅爲正體工部一氣奔放宏肆絕塵爲變體此又揚何信陽李滄溟之餘波予已辨于李詩說中不更贅矣

李氏夢陽曰疊景者意必二闕大者半必細此最律詩三昧如浮雲連海岱平野入青徐孤嶂秦碑在荒城魯殿餘前景寓日後景感懷也如詔從三殿去碑到百蠻開野館濃花發春帆細雨來前半闕大後半工細也唐法律甚嚴惟杜變化莫測亦惟杜按嶮嶮學杜摹擬有痕刻劃過甚誠開剽竊之風若此論五律一則則方圓之規矩也胡氏應麟亦謂老杜五律雖中聯言景不少大率以情間之故習杜者句語或有枯燥之嫌而體裁絕無靡冗之病乃初學入門第一義不可不知此與崆峒皆爲閱歷之言今人自以爲情景交融而不知夙非老手何可揮霍任意哉然周氏弼必謂前聯情而虛後聯景而實輕前重後乃均若前聯景而實後聯情而虛前重後輕多流於弱又未免拘執過甚視律詩如印板矣胡氏應麟曰五言律體工部氣象巍峨規模宏遠錯綜幻化不可

端倪宏大則昔聞洞庭水富麗則花隱掖垣暮感慨則東郡趨庭日幽野則風林纖月落餞送則冠冕通南極投贈則斧鉞下青冥追憶則洞房環珮冷弔哭則他鄉復行役等皆神化所至不似從人間來者按胡氏鋪敘杜公五律勝場美矣大矣然盧氏世灌曰五言律至盛唐諸家而聲音之道極矣然未有富如子美者既富矣又有用也感天地動鬼神訂謨定命遠猶辰告蒿目時艱勤恤民隱主文而詭諫言者無罪聞者足戒所謂有用之文章也如盧氏所論乃洞澈杜公五律勝場處胡氏猶論其粗焉者耳學者於胡氏之說求杜律之大於盧氏之說求杜律之情不患不得門而入矣

高氏標曰七言律詩盛唐作者不多而聲調最遠品格最高崔顥賈至王維岑參各極其妙李頎高適當與並驅少陵七言律法獨異諸家篇什亦盛如秋興諸作前輩謂其渾雄富麗小家不可翫翫信然按杜之七律較勝諸家處不在渾雄富麗也高岑何嘗不渾雄王李何嘗不富麗哉且秋興八首與象聲色誠爲名構然持較九日藍田崔氏莊聞官軍收河南河北登高登樓諸將詠懷古蹟等詩則秋興猶非杜公七律之止境也胡氏應麟曰近體莫難於七言律高岑明淨整齊所乏遠韻王李精華秀朗時覺小疵學

者步高岑之格調合以王李之風神加以杜陵之雄深變幻七律能事畢矣又曰七言近體盛唐至矣充實輝光種種備美所少者曰大曰化耳故能事必老杜而後極二段於杜律勝諸家處獨得其微過高氏遠矣然胡氏以錦江春色來天地玉壘浮雲變古今等句爲字中化境二儀清濁還高下三伏炎蒸定有無等句爲句中化境昆明池水老去悲秋等爲篇中化境強爲分晰殊屬多事蓋既曰化境則從心所欲神動天隨何篇章字句之能辨哉王元美曰七律句法有直下者有倒插者倒插非老杜不能此與胡氏同一膠而不化之見不可以論變化無方境與天會之杜詩也周氏敬曰少陵七言律如八音並奏清濁高下種種具陳真有唐獨步也然其間半入大歷後格調實關中晚濫觴之端按中晚七律能手如劉賓客柳柳州白樂天王仲初許丁卯杜紫薇溫八又羅昭諫之流皆絕不學杜非杜詩開之也略能學杜而涉其藩籬者惟一李義山遂爲晚唐七律之冠杜之七律何誤於人周氏不加詳考徑立議論妄矣張氏遠曰杜詩七言律往往入竹枝樂府如十二月一日三首之類俱有厚力深思淺學不能及亦不可學觀此則杜律有不可學者或坐古質太過耳烏得謂濫觴中晚乎中晚流易穢禮惟不學杜故至此今轉以爲杜罪豈不冤哉

郝氏敬曰子美才富學博其爲近體長篇多至千言而氣力愈壯稱擅場矣然詩家妙義正不在多且如麟趾甘棠每章十餘字漢高大風二十三字傾動千古自三百篇一變爲辭再變爲賦汎濫旁薄於古風壯浪豪舉於近體者足矣若夫長律娓娓祇足當其富有無關係情蓋詩至近體不免雕琢更加湊砌與味已盡葛藤蔓延甚覺無味故予於長律不甚解頤按高氏棟曰排律之作源自顏謝諸人唐興始專此體開元後作者之盛聲律之備少陵獨得其兼善者其出入始終排比聲韻發斂抑揚疾徐縱橫無施而不可也据此則排律導源甚遠不得疑其在近體之後而少陵之無施不可又不可以雕琢湊砌葛藤蔓延斥之也郝氏必謂詩家妙不在多而以麟趾甘棠大風爲例則賓筵閣宮何以列於雅頌孔雀東南飛一作何以高於漢人詩殆未可以多少論也然僕竊疑少陵酬應之章排律爲多卽如贈翰林張四學士贈集賢崔子二學士贈鮮于京兆等作大都褒稱先達感述沈淪習染時賢格亦無甚變化較之謁元元皇帝廟行次昭陵重經昭陵等作精力甚遜蓋亦猶五七律中有率不經意之篇也平心而論排律一塗杜直以餘力行之固不可慕其宏富闢靡夸多亦不可斥其冗長舉一廢百胡氏應麟曰杜排律五十百韻者極意鋪陳頗傷蕪碎

惟贈汝陽哥舒見素李白諸作格調精嚴體骨勻稱每讀一過無論其人履歷咸若指掌且形神意氣踊躍毫端如周昉寫生太史敘傳逼奪化工而杜從容聲律間真古今絕詣又曰杜大篇鉅什如謁先主贈哥舒等作闔關馳驟如飛龍行雲鱗鬣爪甲自中矩度又如淮陰用兵百萬掌握變化無方雖時有險樸無害大家此二段措議平允不似京山概貶長律爲無關性情太高而無當也若楊誠齋云杜排律多矣獨奉觀嚴鄭公廳事岷山沱江圖一首瓊枝寸寸是玉榜檀片片皆香然排律僅可止此五十韻百韻非古法矣予嫌其以次乘爲上矧既不甚的又詩患長而無力不在古人有之與否若能以筆筆奮迅之才行滔滔百韻之體雖自我作古何害誠齋以少爲古是亦京山之見也若德州盧氏統謂杜公排律自六韻以至百韻無不從容研玩鋒發韻流盡洗排當力由天授此則一例推尊予亦未之敢從耳

盧氏世灌曰天生太白少伯以主絕句之席亘古今來無復有騷乘者矣子美恰與兩公同時乃恣其驅強之性積然自放獨成一大家可謂巧於用拙長於用短精於用粗婉於用韞者也按胡氏應麟曰以少陵之才攻絕句卽不能爲太白詎不若摩詰彼自有不可磨滅者無事更屑屑也又曰五七絕各極其二者太白五七絕

俱無所解者子美也又曰少陵不甚攻絕句徧閱其集得東逾遼水北溟沱中巴之東巴東山二首與太白明皇幸蜀歌相類信如胡氏之言是杜之五七絕大率無足法矣然敖氏英曰少陵絕句古意黯然風格矯然用事奇崛樸健與盛唐諸家不同鍾氏惺曰少陵七絕長處在用生往往有別趣有似民謠者有似填詞者但筆力自高寄托有在運用不同看詩取其音響稍諧者數首則不如勿看觀此二說則知杜公絕句在盛唐中自創一格乃由其才大力勁不拘聲律所致而無意求工轉多古調與太白龍標正可各各單行安得謂其不屑爲此遂致絕無所解祇東逾遼水中巴之東二首足傳哉盧氏謂崛強自放獨成一家乃在箇中但又有巧於用拙云云則似此老弔詭爲心求勝同時名士此小家閃奸伎倆心術不廣文章必怪杜公一生平直似無此見地也果如盧氏之說曷不全力出奇而又爲花卿龜年風流蘊藉之作何哉總之杜公天挺之才橫絕一世無所不可自率本懷則爲絕句創調偶從時軌則爲絕句冠場疑其不習者非疑其弄巧者亦非學者論詩當兩體兼收不可專取音響稍諧者亦豈可專仿詞氣奇僻者哉黃氏生曰杜公絕句不入正聲特聞蜀中竹枝之音聊戲效之耳讀者不必律以正法此則不知其爲大手拗調而徑斷其爲

摹仿戲作譏彌倘矣

劉氏會孟曰子美年四十五自鄜陷賊明年自拔取拾遺扈從還京又明年始外補又明年始弁官入秦州自是流離展轉凡三遷當時朝廷雖亂道路無壅雄藩賓客之盛自若也公以三朝遺老負海內詩名其遊跡所經如錦江洞庭意氣浩然江湖勝境樓臺高會長歌短賦傾晤賓主當奔走流離倉卒患難而所遇猶若此宜其詩之淋漓悲壯邁羣傑出乎又曰古今窮詩人獨稱子美然在天寶則及見麗人友八仙在乾元則扈從還京歸輦左掖其間苦厄惟陷鄜數月耳後來流落夔蜀田園花柳亦與杜曲無異按江氏盈科曰李青蓮是快活人當其得意時斗酒百篇無一語一字不是高華氣象及流竄夜郎後作詩甚少當由興趣蕭索杜少陵是固窮之士平生無大得意事中間兵戎亂離飢寒老病皆其實歷而所閱苦楚都於詩中發出故讀少陵詩即當得年譜看此君論杜與辰翁却相反然予每笑辰翁之論杜與此君之論李同是一副鄙陋心胸而考之又不知也夫詩爲心聲枯苑窮通皆可自見今謂少陵之出羣由於東道之豪盛已覺不成議論又以得見麗人爲少陵喜幸此其鄙惡居何等乎青蓮奇氣凌雲視爵賞如塵芥今謂流竄夜郎以後興趣索然此稍有氣概者所不爲况

儻慕如青蓮者乎就使少陵境遇稱懷亦不得謂詩之冠世卽由乎此就使青蓮夜郎以後詩篇少見安知不由編輯零落亦不得斷其興趣積唐而况皆不然哉今詳据杜公年譜並核其詩以爲證廿四歲赴京兆貢舉不第詩所謂忤下考功第者也其後遊齊趙在東都至長安既未通籍困境可知三十六歲帝詔天下有一藝詣殿下李林甫命尙書省試皆下之公應詔而退詩所謂青雲却垂翅踴躍無縱鱗者也四十歲進三大禮賦始命待制集賢又爲宰相所忌明年召試文章送隸有司參列選序其實無以自遺詩所謂才桀俱登用愚蒙但隱淪微生需忌刻萬事益酸辛有儒愁餓死早晚報平津飢臥動卽向一句敝衣何曾聯百結不見空牆日色晚此老無聲淚垂血者也四十四歲始授河西尉不拜改右衛率府胄曹參軍乃得一官詩所謂耽酒須徵祿者也十一月往奉先詩所謂入門聞號咷幼子飢已卒所愧爲人父無食致天折者也四十五歲自奉先往鄜州自鄜奔行在途陷賊中其痛苦不待敘四十六歲四月脫賊謁上拜左拾遺此一生最得意處然家室未卜存亡詩所謂此聞同罹禍殺戮到雞狗山中漏蒨屋誰復依戶牖者也旋即以疏救房琯詔三司推問賴張鎰救之獲免八月放還省家詩所謂晚歲迫偷生還家少歡趣經年至茆屋妻

子衣百結者也卽在諫省中亦不甚濡足詩所謂朝回日日典春衣我貧無乘非無足者也明年六月卽出爲華州司功詩所謂無才曰衰老削迹共艱虞孤城此日腸堪斷者也四十七歲關輔饑七月棄官西去度隴客秦州詩所謂車馬何蕭索門前百草長囊空恐羞澀留得一錢看者也十月發秦州往同谷寓焉詩所謂無食問樂土無衣思南州歲拾橡栗隨狙公手脚凍皴皮肉死短衣數挽不掩脛男呻女吟四壁靜者也十二月入蜀至成都寓居浣花溪寺詩所謂古寺僧牢落空房客寓居者也明年卜居浣花溪詩所謂卜宅從茲老爲農去國餘百年粗糲腐儒餐飯飢稚子色淒涼者也又明年公年五十仍居成都間往蜀州仍歸成都詩所謂老被焚籠役貧賤出入難蜀酒禁愁得無錢何處賒布衾多年冷似鐵嬌兒惡臥踏裏裂入門依舊四壁空老妻睹我顏色同者也五十一歲仍居成都詩所謂畏人成小築褊性合幽棲年荒酒價乏日并園蔬課者也其秋至綿州冬挈家至梓州又至射洪詩所謂計拙無衣食途窮仗友生將老愛貧窶筋力豈能及者也五十二歲在梓州間往漢州秋往閬州冬復回梓州是歲召補京兆功曹不赴詩所謂世亂鬱鬱久爲客路難悠悠長傍人窮愁但有骨使君寒贈袍別家三月一書來避地何時免愁苦者也五十三

歲歸成都草堂嚴武表爲節度參謀檢校工部員外郎賜緋魚袋
此晚年最適意處然屈居幕下實非其志詩所謂束縛酬知己蹉
跎效小忠白頭趨幕府深覺負平生者也五十四歲辭幕府歸草
堂嚴武卒遂離蜀南下自戎州至渝州六月至忠州秋至雲安居
之詩所謂往時文采動人主此日飢寒趨路旁空看過客淚莫覓
主人恩者也五十五歲自雲安至夔州詩所謂杖藜歎世者誰子
泣血送空回白頭沈綿疲井曰倚薄似樵漁者也五十六歲遷赤
甲又遷瀘西又遷東屯復還瀘西詩所謂亂後居難定窮荒益自
卑囊虛把釵釧米盡拆花鈿無錢從滯客有鏡巧催顏者也五十
七歲出峽至江陵秋移居公安冬晚之岳州詩所謂暮年飄泊恨
今夕亂離啼倚著如秦賚過逢類楚狂饑藉家家米愁徵處處杯
者也五十八歲自岳州至潭州未幾入衡州夏復還潭州詩所謂
窮困挫囊懷常如中風走羸骸將何適履險顏益厚艱危作遠客
干請傷直性年年非故物處處是窮途者也五十九歲春在潭州
夏再入衡州欲如郴州因至耒陽詩所謂隱忍根棘刺遷延胝跡
瘡蕭條向水陸汨沒隨漁商疏布纏枯骨奔走若不暖妻孥復隨
我回首共悲歎者也而其秋竟以寓卒矣統觀一生無非窮困樓
臺高會田園花柳特偶一遭逢耳安得謂其苦厄之境祇居郵數

月乎辰翁讀杜不熟遂論其詩亦可嘆矣若太白以乾元元年戊
戌長流夜郎以寶應元年壬寅冬卒首尾四年餘耳然此四年中
自流夜郎留別宗十六環詩流夜郎贈辛判官詩以下數之長歌
短賦不下四五十篇其中高華豪邁之作指不勝屈也况又有蒐
輯未備分年未的者哉且太白臨終尙有詩安在其興趣索然也
雪濤任意擲揄當由心境猥瑣而考古不審貽誤後人與辰翁所
論皆李桂之障蔽也予故不憚詳覈以辨之且以戒世之譏鄙而
學疏者

趙氏次公曰杜陵野老負王佐之才有意當世而訕讕不偶胸中
所蘊一寓於詩其曰許身一何愚自比稷與契又曰致君堯舜上
再使風俗淳此其素願也至其出處每與孔孟合尙憐終南山回
首清渭濱則有遲遲去魯之懷勳業類看鏡行藏獨倚樓則有皇
皇得君之意按杜公之詩人之推服至極者如秦少游以爲孔子
大成鄭尙明以爲周公制作黃魯直以爲詩中之史羅景綸以爲
詩中之經楊誠齋以爲詩中之聖王元美以爲詩中之神亦蔑以
加矣其爲人則新唐書本傳云數嘗寇亂挺節無所污爲歌詩傷
時憊弱情不忘君人憐其忠云數語亦簡而核然本傳又謂甫放
曠不自檢好論天下大事高而不切則於杜公之經濟出處猶未

之識也考杜公詩於國家之利病軍國之成敗往往先事而謀援古而諷無不洞中竅要而其難進易退去就皎然亦何嘗非接浙而行三宿出晝之宗派哉詳見集中各詩不及備述趙氏止引二聯尙屬挂漏然斷之曰王佐之才出處與孔孟合則信非溢美矣故杜公祠堂凡有數處而鄜州學孔廟戟門則祀子美夫以子美之詩扶經心執聖權以從祀孔子廟不較勝於唐人之從祀何休王弼哉元順帝追諡文貞爲千古詩人之僅事亦當之而無愧色者也黃氏徹曰東坡問老杜何如人或云似司馬遷但能名其詩耳愚謂老杜似孟子蓋原其心也據此則諡以文貞其美尙有不盡者歟

李氏綱曰肅宗之怒房瑄人無敢言獨子美抗疏救之由是廢斥終身與陽城之救陸贄何異於世罕稱之者殆爲詩所掩故耶予因序其集而及之使觀者知公遇事不苟非特言語文章妙天下而已按葛常之詩話引張無盡孤憤吟云房瑄未相日所談皆臯夔一朝陳陶下覆沒十萬師中原已紛潰老杜尙嗟咨蓋爲瑄罷相時杜上疏力救而發也是則瑄之馭師非無罪而杜之救瑄爲徇私矣然瑄之敗也由於恢復兩京之邊固志大而慮疏而瑄之初意亦欲持重俟時中人邢延恩等促戰倉皇遂及於敗則亦不

當專爲瑄罪也况考瑄之罷相舊史卽係之兵敗下殊覺失之不審新史曰瑄時敗陳濤斜又以客董延蘭罷相雖兼二事言仍未覈也予檢杜公奉謝口勅放三司推問狀云瑄以宰相子少自樹立晚爲醇儒有大臣體時論許瑄必位公輔陛下委以樞密衆望其允觀瑄深念主憂義形於色畫一保秦素所蓄積而性失於簡酷嗜鼓琴董庭蘭今之琴工遊瑄門下有日貧病之老依倚爲非瑄之愛惜人情至於玷汚臣不自度量歎其功名未垂志氣挫覲觀望陛下棄細錄大所以冒死稱述據此則瑄之罷相自爲琴工董庭蘭事與陳濤之敗了無交涉蓋陳濤之事在前一年也且瑄嘗建議遣諸王爲都統節度祿山見分鎮詔書撫膺歎曰吾不得天下矣則瑄之善謀業已功在社稷似可與陳濤之罪相抵今祇爲琴工一事遽免宰相是欲使秦穆必替孟明以一眚掩德也豈用人之道哉杜公救瑄之疏自爲國家起見故當時名臣如顏真卿韋陟則謂甫此疏不失諫臣體如張鎰則謂朝廷罪甫必塞言路皆爲能見其大而舊史新史旣以瑄之罷相仍爲陳濤斜之故又以公之救瑄專爲布衣交之故於瑄則不考時事於公則測以私心均不足爲信史若張無盡之作詩揶揄尤闕陋而不足道也嗚呼觀公陳濤之詩則知公於瑄無徇私諱匿之心觀公救瑄之

疏則知公於國有愛惜人材之意直筆忠悃可質百世故公之謝推問狀云陛下貸以仁慈憐其懇到不書狂狷之過深容直臣勸勉來者夫以肅宗震怒之餘而公之引罪曰懇到曰狂狷曰直臣亦可謂自信而不疑果毅而有守矣世人見瑄素負時名而談釋老仿車戰名實不稱比之殷浩不知瑄於建議分藩外如救王思禮薦嚴武頗能裨益帷幄殷浩釣名之鄙夫非其倫也公救瑄之明年瑄爲賀蘭進明所譖兼謂及公同時貶謫瑄既功名不終公亦羈旅以老皆屬時命無可言者然進明已殺張許又譏房杜凶人之讒賊善類如此持論豈可更揚其餘餘而助之哉李肇云宰相自張曲江之後稱房太尉李梁公爲重德司空圖房太尉詩云物望傾心久向渠破膽頻劉克莊云房瑄雖敗不失爲名相綜是數說瑄之德望豈易企及若董庭蘭依倚一事考之朱長文云薛易簡稱董庭蘭不事王侯散髮林壑者六十載貌古心遠意閒體和撫絃韻聲可感鬼神給事中房瑄好古君子也庭蘭聞義而來不遠千里予因此說亦可以觀房公之過而知其仁矣當房公之爲給事中也庭蘭已出其門爲相豈能遽絕哉賅謝之事予疑謂瑄者爲之庭蘭朽毫豈能辨釋遂被惡名耳故房公貶廣漢庭蘭諸之公了無愠色也觀長文所辯房公誠不失爲長者而易簡卽

天寶時人其言又信而可徵也然則董庭蘭尙不足以累房次律何足以累杜子美哉李伯紀比諸陽城之救陸贄夫次律卽非敬輿匹而子美實無愧於亢宗也後人讀唐史輒以房貽口實杜之救房卽同瑕玷予故錄伯紀語而歷歷證之如此蓋伯紀一代偉人故能洞悉賢達事君交友之心胸而歎其不苟於事彼萬立方張無盡之徒何足以知之

黃氏生曰杜公屢不第卒以獻賦受明皇特達之知故感慕終身不替雖前後鋪陳時事無所不備而於當時荒淫失國惟痛傷而不忍譏此臣子之禮也說者不得公心影響附會輒云有所譏切此注杜大頭腦差失處妄筆流傳杜公之目將不瞑於地下矣按朱氏濂曰註杜者稱其一飯不忘君發爲言辭無非忠君愛國之意至於卒爾詠懷之作亦必遷就爲說子美之詩益不白於世此論最通夫杜卽愛君豈有篇篇寄意者果如是徒形其瑣屑好名而已矣此注者之鑿也黃氏之說劇得杜意然黃氏亦有所本宋張戒歲寒堂詩話已譏唐人詠楊妃者爲無禮於君矣此等處有關名教學詩者之開宗明義章也顧黃氏謂杜公獻賦受明皇特達之知故感慕終身不替此論亦陋君臣之義無所逃於天地之間何關窮達事使明皇不賞三大禮賦子美將肆其詆謔耶抑肅

代二帝於子美無知己之感便可不需感慕耶意在主持名教而發論不本於性入即不可以教忠而明禮然則大頭腦差失處黃氏亦未能免子美詩云葵藿傾太陽所性固莫奪斯言也乃純臣之言也

黃氏微曰性豪業嗜酒嫉惡懷剛腸飲酣視八極俗物都茫茫子美胸中語也宜其孩弄嚴武藐視禮法而朱老阮生皆與莫逆遭田父泥飲至被肘而不悔其內直外曲強禦不畏矜寡不侮非世俗所能測也按舊史杜本傳云嘗憑醉登武之牀武曰嚴挺之乃有此兒武性雖急暴不以爲忤新史語與舊同其下云武亦暴猛外若不爲忤中銜之一日欲殺甫及梓州刺史章彝將出冠鉤於簾三左右白其母奔救得止獨殺彝新史本雲溪友議不足信故魯嘗以嚴武鎮蜀章彝入覲證其僞劉克莊云世傳嚴武欲殺子美殆未必然觀子美哭嚴僕射詩云老親如夙昔部曲異平生極其悽愴至列之八哀詩中忠厚藹然王嗣爽亦云觀公九日寄嚴大夫嚴公巴嶺答杜二見憶兩詩兩人交情形骸不隔可知欲殺之訛觀八哀中小心事友生句亦知武無欲殺公事以上諸說皆足明嚴之未嘗忤公矣若公之憑醉登牀斥嚴家諱一事舊史則貶之曰性褊躁無器度恃恩放恣新史則貶之曰性褊躁傲誕

此亦未免已甚也史稱公與武世舊而武又少於公十四歲則知挺之已與公爲交好公親見武之成立故入哀詩云昔在童子日已聞老成名朋友其父也唐人朋友呼名如李詩稱杜甫杜詩稱李白不足爲異其直呼挺之用此禮也特施之死後而對子名父爲不宜耳然玩其語意實是追念故交且愛武之極乃有此驚喜過望之詞以沈醉不檢故脫口觸諱本非不足於武何褊躁傲誕之有是以武雖下急亦能略其形迹諒其心曲而不以爲釁且待之加厚也今以醉中一言之疵遽概之曰褊躁傲誕其性實然則杜詩中所以愛美嚴公不一而足者皆將儕於虛言而不足信而公之醒時轉爲諛佞詐僞之流非第褊躁傲誕之過而已也豈知杜公者哉至其在武幕中之詩曰強移栖息一枝安曰蹉跎效小忠曰白頭趨幕府深覺負平生方若有不屑俯就之意未嘗以爲恩也何恃恩放恣之有吾歎作舊史者之視富貴人太重而視公太輕也然即其不屑相就者亦自嗟時命之乖不能展其康濟之志耳非有憾於武也以欲大庇天下之大而老作諸侯之客謂稱其本懷感恩思報不可謂形諸嗟詠即同怨望亦不可惟登牀一語不能謂非無心之小失而要當如史臣科斷云云也若常明黃氏直以公之醉語爲疾惡剛腸爲孩弄嚴武爲不畏彊禦此又於君子之過從而爲之辭者

選論

整理財政條陳（續）

江蘇王官彥

四推行新稅務尙寬大也 民國承前清寬弛之後人民納稅義務之觀念極其薄弱雖推行新稅之法令固極正當而人民總不免目爲煩苛此固當一方振起國民之國家觀念以治其本而一方制定寬大稅法以治其標考各國之立法也其始都從簡易其後乃臻完密蓋立法必求簡便官吏方易於率循行政必尙寬仁商民斯樂於遵守疏關節目輕減稅率所謂寬一分則小民受一分之賜者寧獨小民受其賜國家固亦間接受其賜蓋法令寬簡賦額公平國民所任租稅之負擔不敵其謀隱匿規避之勞苦自必踴躍輸將毫無吝色於是既養成其納稅之習慣方可徐謀收入之增加前述之各種新稅無論矣其尤重要者則爲遺產稅夫吾國習慣與西方異父之資產傳於其子視爲天經地緯不可磨滅其遠親屬不因相續之關係固不能繼承其他之財產至不相關係之人而能得他人之遺產者蓋更屬罕見故開通之士尙知此爲正當之稅法蚩蚩者氓或且詫爲奇異之事實寬其法令輕其稅額其爲此稅之首務也五宜定免稅之額也 西方理財家有言曰「租稅當於有者取

之無者舍之」夫所謂無者非謂其人毫無收入純然一游民也乃謂其所得微末生計艱難取其收益中一部分以作租稅則必減其仰事俯畜之必需故各國對於僅有生活最少費者之免稅均極注意而凡施行所得稅之國家尤爲特別注重之今設有一人其全部收入僅足支持其一家之低等生活費若委其中之一部分於租稅則此人不能維持其一家之生活必仰助於救濟貧民之制度國家於此不啻以此手所得之金錢而由彼手還之也吾國生計困難之人民其數非少今且多方籌畫裕國民之生計厚國家之元氣則征稅之時必需定免稅之額無可疑義至各國有濫用此原則免稅之額太鉅如一八九四年美國所得稅爲四千元之免除致國家收入上遂生有危險者竊以爲免稅額之高低應視國民生活程度爲轉移今吾國人民之生活程度既不能與泰西相提並論則免稅之額自不需過高於推行新稅之中寓體恤民隱之意不致蹈損下益上之弊庶乎可矣

六宜行累進原則也 西儒亞丹斯密斯倡租稅四大原則至今一般理財家羣以爲不可侵犯其開端乃爲平等之原則考其所謂平等不在形式而在實質非求數目上平均乃求比較上

平均故等級區別爲今世改良稅務家所重視夫人民收入愈豐者其自由所得愈多即其納稅力亦愈厚使租稅而果能從於納付能力以爲賦課勢固不得不採用累進稅矧吾國消費稅制度未經釐正米穀有釐食鹽有稅舉凡日用之品鮮有未經徵稅者準德國鹽格爾博士所定最有價值之經濟法則謂「收入愈大則食費之率愈小」及「無論收入大小若何其服用費常相同」等語而論則吾國之消費稅貧者已較富者擔負爲多則更不可不於取得稅中設法調劑之惟於吾國近狀提採用累進稅之原則尙有困難蓋登記之制度未實行人民總收入之數不得而知勢惟有考察個個稅源之性質而採用之其有毫無疑義者則於推行新稅之際如所得遺產等稅固必需採用此原則也

七嚴杜不良稅法也 夫依據道德而言今日之講稅法無非擾民之財以爲國有但此種理論雖爲法治國所不取而究不可因此遂越乎義理之外如奢侈稅策人從事於節儉菸酒稅使人注意於衛生是藉租稅之勢力頗足維持社會之道德反之如法之門窗稅害及衛生德之麥粉稅侵及食料雖行之有年大爲世所詬病吾國今日此等稅法尙尠惟現今印花煙土不

免蹈入此弊至於請開賭捐舉國皆知其非固不待煩言之矣八法令不宜屢更也 方今世界各國多行定率稅以其富於彈力性當國家需財孔亟之時便於伸張也然吾國甫經推行新稅之際萬不可師其意蓋吾國人民對於金錢之支出均樂於照舊而厭於更新抑租稅由重改輕始歎聲載道由輕加重則怨謗叢生矧當推行新稅之初尙未養成人民納稅之慣習者乎故制定新稅法當斟酌盡善然後施行既行之後即不宜驟改如近來印花稅法幾經修正非所宜也再於通俗教育宣講之際演述國民對於國家之關係解釋納稅爲其當然之義務於養成人民納稅義務之觀念或亦不無小補焉

考古之言理財者以上下交益爲最善損上益下次之損下益上又次之上下交損爲最下今所謂上者當爲國家下者當爲國民國家之生存發達既不能不恃夫財則今日理財之道不傷及國民之普通生計方可與謀國家之生存發達也官產草莽下士學識淺庸詎敢挾策以干時聊貢愚者之一得謹呈

編 莫 某 安 仁